

Présidence: M. Lucien Weiler, Président
M. Jos Scheuer, Vice-Président

Ordre du jour

- 1. Communications
- 2. 5646 - Proposition de loi portant organisation d'un référendum populaire concernant la réalisation d'une ligne ferroviaire souterraine avec plusieurs arrêts sur le territoire de la ville de Luxembourg
(Déclaration de recevabilité)
- 3. Ordre du jour
- 4. Dépôt d'une résolution par M. Charles Goerens
- 5. 5600 - Projet de loi concernant le budget des recettes et des dépenses de l'État pour l'exercice 2007
(Discussion générale)

Au banc du Gouvernement se trouvent: M. Jean-Claude Juncker, Premier Ministre; M. Jean Asselborn, Vice-Premier Ministre; M. Fernand Boden, Mmes Marie-Josée Jacobs et Mady Delvaux-Stehres, MM. Luc Frieden, François Biltgen, Mars Di Bartolomeo, Lucien Lux, Jean-Marie Halsdorf et Claude Wiseler, Ministres; Mme Octavie Modert, Secrétaire d'État.

(Début de la séance publique à 15.00 heures)

» M. le Président.- D'Sitzung ass op. Huet d'Regierung eng Kommunikatioun ze maachen?

(Brouhaha général)

Här Vize-Premier, huet d'Regierung eng Kommunikatioun ze maachen?

» M. Jean Asselborn, Vice-Premier Ministre, Ministre des Affaires étrangères et de l'Immigration.- Neen, Här President.



1. Communications

» M. le Président.- Ech hu folgend Kommunikatiounen un d'Chamber ze maachen:

1) La liste des questions au Gouvernement ainsi que des réponses à des questions est déposée sur le bureau. Les questions et les réponses sont publiées au compte rendu.

2) Les projets de loi et les projets de règlement grand-ducal suivants ont été déposés au Greffe de la Chambre des Députés:

1. **5647** - Projet de loi portant approbation de l'Accord entre le Gouvernement du Royaume de Belgique avec la Région wallonne, la Communauté française et la Communauté germanophone, le Gouvernement de la République fédérale d'Allemagne, le Gouvernement de la République française et le Gouvernement du Grand-Duché de Luxembourg relatif à la coopération dans les régions frontalières, conclu par échange de lettres le 23 mai 2005 à Luxembourg

Dépôt: Monsieur Jean Asselborn, Ministre des Affaires étrangères et de l'Immigration, le 08.12.2006

2. **5648** - Projet de loi portant approbation de l'Accord entre les États du Benelux (le Royaume de Belgique, le Grand-Duché de Luxembourg, le Royaume des Pays-Bas) et la Bosnie et Herzégovine relatif à la reprise et à la réadmission des personnes en situation irrégulière (Accord de reprise et de réadmission) et de son Protocole d'application, signés à Sarajevo, le 19 juillet 2006

Dépôt: Monsieur Jean Asselborn, Ministre des Affaires étrangères et de l'Immigration, le 08.12.2006

3. **5649** - Projet de loi portant approbation de l'Accord entre les Gouvernements des États du Benelux (le Royaume de Belgique, le Grand-Duché de Luxembourg, le Royaume des Pays-Bas) et le Gouvernement macédonien relatif à la réadmission des personnes en séjour irrégulier (Accord de réadmission) et de son Protocole d'application, signés à Voorburg, le 30 mai 2006

Dépôt: Monsieur Jean Asselborn, Ministre des Affaires étrangères et de l'Immigration, le 08.12.2006

4. **5650** - Projet de loi portant approbation du „Notenwechsel vom 29. April 1998 über die Rechtsstellung der dänischen, griechischen, italienischen, luxemburgischen, nor-

wegischen, portugiesischen, spanischen und türkischen Streitkräfte in der Bundesrepublik Deutschland“

Dépôt: Monsieur Jean-Louis Schiltz, Ministre de la Défense, le 11.12.2006



2. 5646 - Proposition de loi portant organisation d'un référendum populaire concernant la réalisation d'une ligne ferroviaire souterraine avec plusieurs arrêts sur le territoire de la ville de Luxembourg

Déclaration de recevabilité

An hirer Réunioun vum 7. Dezember huet d'Präsidentekonferenz sech fir d'Recevabilitéit vun der Proposition de loi 5646 vum Här Mehlen iwwert d'Organisatioun vun engem Referendum iwwert de Bau vun engem ënnieredeschen Zuch an der Stat ausgeschwat.

Ass d'Chamber domat averstan?

(Assentiment)

Dann ass et esou décidéiert.



3. Ordre du jour

Wat den Ordre du jour vun dëser Woch ubelaangt, huet d'Präsidentekonferenz Folgendes virgeschloen:

An deenen dräi Sitzunge vun haut de Mëtteg, muer de Moien a muer de Mëtteg féiert d'Chamber d'Budgetsdebatten.

Muer de Mëtteg no de Budgetsdebatten hu mer de Projet de loi iwwert de Congé parental an e Projet de loi, deen d'Holdingsgesetz ännert. De Projet de loi 5610 iwwert d'Lëtzebuergesch Bedeelegung un der Association Internationale de Développement an dem Fonds International de Développement Agricole ass weider virgesinn, a schlussendlech nach de Projet de loi 5626, eng Ofännerung vum Code du Travail.

Et sief drop higewisen, dass d'Diskussiounen souwéi de Vote vun deene Projeten, déi e Mëttwoch de Mëtteg net méi géingen drukommen, en Donneschdeg no der Orientéierungsdebatt op den Ordre du jour gesat ginn.

Iwwermuer Donneschdeg hu mer fir d'éischt d'Motioun vun der Madame Brasseur iwwert d'Reformen am Schoulsecteur, an zweetens eng Orientéierungsdebatt iwwert d'Energiepolitik, déi vum Grupp vun deene Gréngegen ugefrot ginn ass.

Ass d'Chamber mat deem Ordre du jour averstanen?

(Assentiment)

Dann ass et esou décidéiert. Mir kommen elo un d'Budgetsdebatten.

(Interruption)

Pardon, den Här Goerens huet d'Wuert.

» Plusieurs voix.- Oh!

(Hilarité)

» Une voix.- Entschëllegt Iech beim Här Goebbels!

» M. le Président.- Den Här Goerens. Ech hunn awer Här Goerens gesot.



4. Dépôt d'une résolution par M. Charles Goerens

» M. Charles Goerens (DP).- Ech hat och esou verstanen, Här President.

(Interruptions)

Här President, ech wollt d'Wuert froen, fir eng Ännerung um Ordre du jour virzuschloen, an zwar fir den Dépôt vun enger Resolutioun, déi handelt vun der Organisatioun vun enger Conférence internationale, déi den 11. an 12. Dezember zu Teheran stattfënnt an déi Zweifel un der Schoah thematiséiert. Mir fannen dat net an der Rei.

Ech wëll och direkt hannendrop soen: Et ass net déi éischte Kéier, datt mer als Chamber dat do condemnéieren, mä mir sollen dat ni reaktiounslos hinhuelen, wat de President vun der République Islamique d'Iran suggéiert a wat en à la fin du compte och wëllt duerchzéien. Et soll een déi mam Wuert huelen. Wann dat viru 70 Joer esou gemaach gi wär, bräichte mer haut vläicht net driwwer ze schwätzen.

» Plusieurs voix.- Très bien!

Résolution

La Chambre des Députés,

- attirant l'attention sur les prises de positions répétées du Président iranien Mahmoud Ahmadinejad contestant la réalité de la Shoah et qualifiant de mythe l'Holocauste;

- ayant pris connaissance de l'organisation d'une conférence internationale les 11 et 12 décembre 2006 à Téhéran mettant en doute la réalité de la Shoah;

- considérant le génocide perpétré par le régime nazi sur le peuple juif comme une réalité historique;

condamne

- avec fermeté toute velléité révisionniste et négationniste au sujet de la Shoah;

- toute idéologie antisémite;

- les propos du Président iranien Mahmoud Ahmadinejad contestant la réalité de la Shoah;

- l'organisation d'une conférence internationale les 11 et 12 décembre 2006 à Téhéran mettant en doute la réalité de la Shoah.

(s.) Charles Goerens, François Bausch, Ben Fayot, Robert Mehlen, Michel Wolter.

» M. le Président.- Ech ginn dem Här Goerens Akt vun dem Dépôt vun där Resolutioun. Mir kucken, weini dass mer déi op den Ordre du jour huelen, fir ofzestëmmen.

Mir kommen also elo zu de Budgetsdebatten. D'Riedezäit ass nom Modell 7 festgeluecht. Et si bis elo ageschriwwen: den Här Wolter, den Här Meisch, den Här Fayot, den Här Bausch, den Här Gibéryen, den Här Jaerling, den Här Mosar, den Här Goerens, d'Madame Mutsch, den Här Hauptert, d'Madame Brasseur, den Här Negri an den Här Klein. Als éischte Riedner ass ageschriwwen den honorabelen Här Michel Wolter. Här Wolter, Dir hutt d'Wuert.



5. 5600 - Projet de loi concernant le budget des recettes et des dépenses de l'État pour l'exercice 2007

Discussion générale

» M. Michel Wolter (CSV).- Här President, Dir Dammen an Dir Hären, mam Budgetsprojekt fir 2007 gétt eng Trendwend ageleet. Den Trend tëschent deem e puer Joer sichtbaren a spierbaren Ausenanerdrifte vu Recetten an Ausgabe beim Stat gétt mam virleiende Budget gebrach. D'Schéier tëschent deem, wat de Stat erakritt vun de Leit an aus der Wirtschaft, an deem, wat en ausgëtt, geet net weider op.

D'Entwécklung vum Ausenanergoe vun Einnahmen an Ausgabe war de Grond zu deels heftege Kontroversen an der Budgetsdebatt vum leschte Joer. Net jiddferen hat de Message vun dem Statsminister senger Ried vum 12. Oktober 2005 hei an der Chamber richteg verstanen. Au contraire, d'Erkenntnis, dass et net kéint esou weidergoen, dass mer mëttelfristeg och hei zu Lëtzebuerg net méi Sue kënnen ausginn, wéi mer der erakréien, huet sech staark a Grenze gehalen.

Bei munchen hei an der Chamber, an der Regierung, bei de Sozialpartner an an der Bevölkerung hat d'Ried vum Statsminister noweislech net dat Émdenke provoziert, wat d'Viraussetzung zu enger positiver Trendwend géng duerstellen, an d'Bereetschaft, och sâi Bäitrag dozou ze leeschten.

D'Chamber huet dat lescht Joer richteg reagiert, wéi se verlaangt huet, dass net nëmmen mëttelfristeg, mä och kuerzfristeg misst gehandelt ginn. Si huet d'Regierung virun hir Verantwortung gestallt, an de Rapport vun eisem Kolleg Roger Negri war doranner ganz dättelech.

D'Regierung huet dës Responsabilitéit ugeholl an an der Tripartite duerchgesat, dass mer iwwert dräi Joer nees an de budgetären Equilibre kommen. Och d'Sozialpartner hunn agesinn, dass mëttelfristeg nëmmen nei Politike kënnen gemaach ginn, wann den néidege Spillraum dozou besteet.

Ech wëll duerfir d'Unerkennung vun der CSV-Fraktioun ausdrécke fir d'Efforten, déi d'Regierung an d'Sozialpartner gemaach hunn, fir d'Haus nees an Uerdnung ze kréien.

Den Horizont, op deem de budgetären Equilibre nees soll erreecht ginn, ass dee vum Joer 2009. Dat ass den Endpunkt vun där Zäitschinn, op där dës Regierung an dës Majoritéit kënnen gestaltend wirken. Et ass de Schlusspunkt vun dëser Legislatur, iwwert deen eraus keng Regierung sech kann zu eppes engagieren.

Et gëtt awer och deenen eenzelne Parteien d'Méiglechkeet an d'Geleeënheet, dem Wieler an hire Wahlprogrammer méiglech Optiounen fir d'Zukunft virzeleeën. Un de Leit ass et dann, fir sech fir dës oder déi Optioun ze entscheeden.

De Rapporteur, den honorabelen Här Lucien Thiel, huet a sengem exzellente schrëftlechen a mëndleche Rapport d'Ursaache vum Ofdriften duergeluecht. Hien huet et awer och fäerdeg bruecht, de Budget an eng mëttelfristeg Perspektiv ze setzen an op eng Rei Erausforderungen opmierksam ze maachen, déi mer meeschtere mussen. Hien ass vu ville Säiten dofir gelueft ginn. Ech wollt mech dësem Luef uschlëssen an him am Numm vun eiser Fraktioun Merci soe fir e Bericht, deen a sech geschloss a kohärent ass.

» Plusieurs voix.- Très bien!

» M. Michel Wolter (CSV).- Här President, Dir Dammen an Dir Hären, de Budgetsprojekt fir 2007 kann net richtig betruecht a bewäert ginn, ouni e Réckbléck op d'Evolutioun zënter 2002 ze maachen. Den 21. Dezember 2001 huet d'Chamber op Virschlag vun der Regierung fir d'lescht zolidd Plus-valuen affektéiert. Aus dem Joer 2000 hate mer en Iwwerschoss vu 760 Milliounen Euro, dee mer zum allgeréissten Deel den Investissementsfongen zougefouert hunn. Da koumen nach eng Kéier 150 Milliounen aus dem Joer 2001, an duerno war et eriwier. 2004 an 2005 schliesslech hate mer Defiziter amplaz vu Plus-valuen.

Dat, wat an där Zäit passéiert ass, huet de Rapporteur exhaustiv beschriwwen. Wéi a woufir dat am Fong huet misse passéieren, wëll ech nach eng Kéier kuerz widderhuelen: Déi Automatismen, déi d'Ausgabe steige loossen, hu weider voll gespillt. Et sinn nei Politike mat neie Kreditter an de Budget geschriwwen ginn. Den Investitionsvolumen ass weider geklommen an d'Recettë sinn eben net méi esou aussergewéinlech gewuess, wéi dat tëschent 1997 an 2001 de Fall war.

Dobäi kouw den Effekt vun enger substanzierter Steuerreform an de Joren 2001 an 2002, déi sech zwar séier positiv op eis wirtschaftlech Dynamik an op d'Konsumverhale vun de Leit ausgewierkt huet, mä där hir éischt Effekter, esou wéi dat normal ass bei Steuerreformen, an de Joren 2003 bis 2005 och Ausfäll vu Recetten no sech gezunn hunn. Méi prezis war et en Uklamme vun

**Mardi,
12 décembre 2006**

11

Einnahmen, dat am internationale Kontext nach ëmmer substanzéiell, awer wäit manner däitlech war wéi dat vun den Ausgaben, déi sech am zweestellege Prozentberäich fest-gesat hunn.

Eis Partei, Här President, huet déi antizy-klesch Politik vun der vieregter Regierung ënnerstëtzt. Et war eng wësSENTlech a wëllent-lech Politik, d'Ausgaben net anzefréieren, mä bewosst weiderzefueren, fir der Wirt-schaft d'Chance ze ginn, an eng konjunktur-rell besser Zäit ze kommen, esou wéi mer se dann och säit Ufank vun dësem Joer nees kennen.

Allerdéngs huet esou eng Politik wéinstens zwou Limiten: 1. Si ka sech net iwwer grouss Zäitraum weiderschreien; an 2. si notzt näischt, wann d'Defiziter, an eisem Fall d'Ausgabesteigerung, net konjunktureller, mä struktureller Natur sinn.

Parallèll dozou gouf déi al Budgetsnorm op-ginn. Dat war zwar ni eng exakt Wëssen-schaft. Et muss een dat ënnersträichen. An dach hu mer se bis an d'Joer 2000 strikt ap-plizéiert. Duerno gouf se opginn.

Déi Rechnung, no där den Ausgabewuess-tum vun Stat net huet däreife méi klammen, wéi dat mëttelfristeg Wirtschaftswuesstum inflatiounsberengegt prognostizéiert gouf, hu mer net méi zwanghaft bäibehalen.

Dat hat eng Rei vu Grënn. Net zulescht war et a mengen Aen doduerch begrënn, dass d'Regierung sech an de Joren 2000 an 2001 vun der Oppositioun, de Gewerk-schaften, engem Deel vun der Press perman-ent huet misse virhale loossen, si séiz op de Sue vun de Leit a géif regelrecht am Geld schwammen, ouni et nees un d'Steier-zueler wëllen zrëckzeginn.

Dee Stress, deen deemools gemaach gouf, war op Dauer net ze packen - schliesselech waren d'Plus-waluen do: 450 Milliounen '99; 670 Milliounen 2000 -, an et gouf fir d'Regie-rung onméiglech, sech där Bewegung, déi onbedéngt nei, méi a strukturell nei Bud-getsausgabe wollt hunn, ze widdersetzen. Dat beschte Beispill fir dëse Mouvement ass an eisen Aen dee berühmte Renten-dësch.

Ënnert dem Androck vun ëmmer méi héije Plus-waluen, huet sech eng Dynamik age-stallt, där sech kee méi konnt entzéien. Wéi op enger Stee hu sech déi eenzel Parteien zu ëmmer neie Prouessen eropgeschwon-gen. Leit, déi zur Virsicht ugemahnt hunn, sinn nëmmen nach matleedeg bekuckt ginn, wéi wa se vun engem anere Stär géife kommen. Dass de Rentendësch iwwerzunn huet, dierft haut jiddferengem kloer sinn.

Alles matenee konnt awer net gutt goen. No deem spektakuläre Fall vum Wirtschafts-wuesstum vun 9% 2000 op knapp 2% dat Joer duerno, koume méi moer Joren op eise Budget zou. D'Wuesstumszuele bloufe jore-laang niddreg. D'Steierverwaltung huet mat aller Kraaft versicht, ausstoend Steieren an-zezéien, fir dass net alles sollt aus dem Gläichgewiicht geroden. An d'Investisse-menter vum Stat hu missen héich bleiwen, fir d'Perspektive vu méi Croissance net op d'Spill ze setzen.

Bis 2005 definitiv kloer ginn ass, dass mer e gutt Stéck Geld méi géifen ausginn, wéi es géif erakommen. A bis Enn 2005 e Budget fir 2006 gestëmmt ginn ass, deen däitlech gemaach huet, dass dëst Joer misst d'Trendwend kommen, wann d'Land sech net an eng néfaste Defizit- a Scholdespiral sollt eraginn, un där hirem Enn eng finanziell Katastroph géif stoen.

Mam Constat, datt 2006 eppes misst ge-schéien, fir de budgetären Equilibre nees erbäizeféieren, net ruckarteg, mä graduell, an duerfir net manner zilorientéiert, ass Ufank 2006 d'Tripartite mat der Problematik befaasst ginn.

Si war eigentlech schonn amgaangen, an der Form vun enger Kompetitivitéitstripar-tite, an huet sech duerno méi geziilt mam Redressement vun de Statsfinanze be-schäftegt.

Iwwregens ass et eis Iwwerzeegung, dass dat eent an dat anert Hand an Hand geet. Nëmmen opgrond vun ausgeglachtenen öf-fentleche Finanzen ass eng Verstärkung vun eiser Wettbewerbsfäegkeet méiglech. Deemno huet d'Tripartite eigentlech eng duebel Aufgab erfüllt.

Dëst entléisst d'Politik net aus der Flicht, am Joer 2007 - an de Premier huet et déi lescht Woch hei gesot - sech Gedanken ze maa-chen, wou d'Prioritéiten unzesetze sinn, fir nei wirtschaftlech Entwécklungen ze förde-ren. Mäi Fraktiounskolleeg Laurent Mosar wäert sech a sengem Beitrag méi intensiv mat dëse Froe beschäftegen.

Den 28. Abrëll konnten d'Partner sech schliesselech op e Programm eenegen, deen et méiglech gemaach huet, mam Budget fir 2007 déi Trendwend ze packen, vun där

ech a menger Einleitung geschwat hunn. Ouni dat, wat d'Regierung mat de Sozial-partner ofgemaach huet, a wat bis Enn nächster Woch och duerch dës Chamber wäert goen, hätte mer eis öffentlech Finan-zen net an de Grëff kritt.

D'CSV-Fraktioun, Dir Dammen an Dir Hären, steet dann och voll a ganz hannert de Pro-poseden, déi aus der Tripartite erauskomm sinn, an zwar an allen Domänen. Dëst géllt net nëmme fir de finanziellen, mä beson-nesch och fir den ëmweltpoliteschen, aar-bechtsrechtlechen a soziale Volet vun där Tripartite. An deem Mooss, wou en Accord e Ganzt ass, wou all Partei eng Rei vu Kon-zessiounen huet misse maachen, ass et noutwendeg, wann een d'Tripartite als solch net op d'Spill wëllt setzen, déi eenzel Kapi-telen och ëmzesetzen.

Et grenzt un en Trauerspill, wéi Leit an Orga-nisatiounen, déi mat um Dësch souzen an deene leschte Méint a Wochen, op schonn eng bal penibel duerchsichteg Manéier al-les versicht hunn, fir eenzel Deeler aus dem Pak nees a Fro ze stellen oder ze kippen. Si musse wëssen, dass si domadder net nëm-men d'Glafwierdegkeet vun der Tripartite, mä och hir eege ganz staark a Fro stellen.

Här President, Dir Dammen an Dir Hären, d'Tripartite huet am Abrëll der Chamber pro-posedéiert, dass duerch eng Rei Moossname sollen am Budget vum nächste Joer ronn 400 Milliounen gespuert ginn. Couragéiert Moossnamen zu engem gudden Deel: den Index aussetzen an zäitversat zur Uwen-dung bréngen; d'Kannergeld ze désindex-éieren; e puer Cotisationsleeschungen er-opzesetzen. Dat alles ass kee Kannerspill. An all déi, déi dësen Accord matgedroen hunn, verdéngen eis Unerkennung fir déi Responsabilitéit, déi si iwwerholl hunn.

Ouni d'Spuerdécisiounen vun der Tripartite an ouni déi 50 Milliounen Euro zousätzlech, déi de Stat bei sech selwer a sengem deeg-leche Fonctionnement wëllt spueren, hätte mer 2007 ronn 450 Milliounen Ausgabe méi.

Domat léich den Defizit vun der Zentralver-waltung bei bal annerhallef Milliard Euro am-plaz bei enger Milliard. E wier méi héich wéi dat lafend Joer, wat contraire zu eisen Engagementer am europäesche Stabilitéts-pakt wier, a géif sech, a Prozenter vum PIB ausgedréckt, net op 2,9%, mä op 4,2% be-lafen.

Esou e Budget hätte mer net kënnen zou-strécken an zoustëmmen. Den Defizit vun der gesamter öffentlecher Hand - Stat, Ge-mengen a Sozialversécherung - géif sech op 750 Milliounen Euro belafen, wat 2,2% vum PIB ausmécht. 2,2% am-plaz vun 0,9, net 0,8, erof, mä 0,5 erop par rapport zum leschte Joer.

Dee Projet, deen elo virun eis läit, ass an ei-sen Aen dee wuel ausgeglachensten, dee mer zu dësem Zäitpunkt kënnen hunn. Et ass e Projet, deen a Richtung Equilibre weist, deen nei Piste beschreift, déi zum mëttelfristegen Erreeche vun équilibréierte Finanze vum Zentralstat féieren.

Et bleift, Dir Dammen an Dir Hären, dass eng Milliard Euro feelen, dass der zéng sol-len ausgi ginn an der awer nëmmen néng erakommen. Mir sinn deemno nach laang net aus eiser Verantwortung entlooss.

De Budget fir 2007 ass e Budget vun der Consolidatioun. Déi Dallsuel, déi mer 2006 erreecht haten, ass duerschisrhatt. Mä mir musse wëssen, dass eis Erausfuederun-gen - et gouf onzähleg kéiere scho ge-schriwwen a gesot - struktureller Natur sinn.

Strukturell Problemer kritt een eleng mat en-ger besserer Konjunktur, wéi mer se am la-fenden an hoffentlech och am nächste Joer erwaarden, net geléist.

Strukturell Problemer fuerderen och struktu-rell Léisungen, woumat d'Tripartite am Joer 2006 net konnt opwaarten. Dat huet se och net missen. Fir de Moment ginn hir Konklusiounen duer.

Fir déi méi laangfristeg Stabilitéit vun de Lëtzebuenger Finanze brauche mer awer méi. An do ass eindeuteg d'Politik an der Flicht ze weisen, a wat fir eng Richtung den Zuch soll fueren.

Apropos Konjunktur: 6% Wirtschaftswues-s-tum dëst Joer; 4% 2007. Dat si gutt Zuelen; iwwerduerschneëttlech gudder am euro-päesche Kontext.

Mä mir kënnen net sécher unhuelen, dass alles esou geet. Kee weess, wat déi geopo-litisch Evolutioun op deene kritesche Plaze vum Planéit am nächste Joer eis wäert be-reeden.

Bal all dës kritesche Plaze produzéieren in-teressanterweises Pétrol. Genee dëse Pétrol huet awer eng enorm Lenkungsfunktioun fir déi global wirtschaftlech Entwécklung.

Irak an Iran sinn a bleiwe Problemfäll. Déi afrikanesch Fournisseuren hunn net déi Sta-

bilitéit, déi ee sech fir ee gesécherten Ap-provisionnement géif wënschen. Russland fonctionnéiert als gigantesche Liwwerant vun Energieträger net mat där Rou a Sereni-téit, wéi ee sech dat ideal kéint virstellen.

Alles an allem bleift d'Fro vun den Energie-präisser an hirem Impakt op déi global, op déi europäesch an op déi Lëtzebuenger Wirtschaftsentwécklung also gestallt.

Vun 1999 bis 2000, Här President, hate mer véier Joer mat Iwwerschëss. An dat Geld, wat mer während deene puer Jore konnten op d'Säit, also an eis Investissementsfon-gen tässelen, huet eisem Land erlaabt, fir déi schwéier Momenter no 2001 ze meesch-teren.

Mir wäere frou, wann déi nei Wirtschaftsdyna-mik laang genuch géif unhalen. Mir kënnen awer net sécher sinn, dass et esou wäert sinn. Tatsächlech ass an de Vereenegte Sta-ten eng wirtschaftlech Réckbildung am-gaange sech ofzezechnen, an de Risiko vun enger méi gemellecher Entwécklung op de Bourssen ass permanent do. D'Verga-an-genheet huet eis bewisen, wéi séier et geet.

Sollte mer deemno am Joer 2006 méi Steuer-recettë kënnen verzeechne wéi geplangt - et gétt vu 700 Milliounen Euro geschwat -, dann ass et kloer, glaskloer an eisen Aen, dass déi integral de Fongen zougefouert musse ginn, fir dass mer eis nees kënnen an eng Logik vu Reserveschafung an de Fonge beginn.

Des Weideren huet de Stat 2007 ronn 50 Milliounen a sengem Fonctionnement wëlles anzespueren. Dat packt een net e puermol hannerteneen. Dës Bewegung ass zimlech eemoleg an et muss ee sech bewosst sinn, dass iergendwou och am Statsapparat bei de lafende Konsumausgaben d'Grenze vum Spueren erreecht sinn.

Schlussendlech huet d'Regierung an hirem Budgetsprojéit fir 2007 ongeféier 200 Mil-liounen zousätzlech Einnahme par rapport zum lafende Joer ageschriwwen, déi reng konjunkturbedingt sinn, dovun 120 Milliounen Taxes d'abonnement, déi op eng soute-néiert Bourssenaktivitéit opbauen, an 80 Milliounen aus Dividenden, déi op bal déi-selwecht Grënn zrëckzeféiere sinn.

Fir d'Rechnung dann nach eng kéier ze maachen: Ouni Tripartitesaccord an ouni konjunkturrell bedingte Mehreinnahme stéin-gen 2007 bei der Zentralverwaltung 990 plus 450 plus 200 ass gläich 1.640 Milliounen Euro Defizit, oder 4,8% vum PIB. Am Gesamtstat wären et der 310 plus 450 plus 200 ass gläich 960 Milliounen, dat sinn 2,8% am-plaz déi 0,9%, déi mer elo kënnen an Erfëllung vun eise Stabilitéitspaktverpflich-tungen op Bréissel mellen.

Här President, Dir Dammen an Dir Hären, de Lëtzebuenger Budget kennt e puer ganz grouss Rubriken. Do ronderëm gravitéieren déi politesch Aktionen an Akzenter mat deene mer Zeeche wëlle setzen, Pistë wël-len exploréieren, nei Chancé fir d'Land wël-len erschléissen.

A ronnen Zuele gétt de Stat 2007 zwou Mil-liarden Euro u Gehälter aus. Seng Investis-ementer kaschten eng Dräivéirelsmilliard. En transféréiert eng Milliard an d'Pensiouns-keesen, 800 Milliounen un d'Familljen a Form vu Kannergeld a soss Subventiounen, 700 Milliounen u Krankekeesen, 400 Milliounen brauch de Beschäftegungsfong. Ent-wécklungshëllef, Sécherheet an öffent-lechen Transport brauchen zesummen nach eng kéier eng Dräivéirelsmilliard.

Zesumme stellen dës zéng Kategorien also 7,5 Milliarden Euro duer. Dat sinn dräi Véirel vun den Ausgabe fir d'Joer 2007. Rechent een nach d'Transferten un d'Gemengen derbäi, ronn 500 Milliounen aus Akomes-steier, TVA an Autossteuer, da si mer op ee-lef Bléck, déi véier Fënneftel vun allen Dépense vum Budget ausmaachen.

Deementspriedend fällt et wuel net schwéier ze realiséieren, dass strukturell Léisunge fir den Evolutionsproblem vun ei-sen öffentleche Finanze virun allem an deen eelef Gebidder leien, déi 80% vun all ei-sen Ausgaben duerstellen.

Wou ech grad bei de Mengen an der so-zialer Sécherheet sinn: D'Regierung huet hir Budgets-presentatioun dëst Joer domadder ugefaangen, dass se betount huet, an Zu-kunft verstärkt, wann net exklusiv op déi sougenannte Maastrichter Budgets-presen-tatioun zrëckzegräifen. Dëst begräift dräi Voletëit de Statsfinanzen, an zwar den Zentralstat, d'Gemengen an d'sozial Sé-cherheet. D'Finanz- a Budgetskommissioun huet de Ball opgehoen, deen hir vun der Re-gierungssäit zougespillt ginn ass, a sech am Detail mat dëser Fro beschäftegt.

Am Kader vun där Diskussioun hu mer mis-se feststellen, dass awer eenzeg an eleng den zentralstaatleche Volet vum Budget zu dësem Zäitpunkt gutt dokumentéiert ass.

Bei de Gemenge bleiwen an dëser Hisiicht vill Efforten ze maachen. An d'sozial Sécher-heet, déi opgrond vun den enormen Trans-fertsleeschungen vum Stat à court terme e positiven, souguer e séier positive Finan-zéierungssold opweise kann, ass an der Budgetsdokumentatioun nëmme mangel-haft duergeluecht.

Mäi Fraktiounskolleeg a President vun der Budgetskommissioun Laurent Mosar wäert sech mat deem Sujet nach weider beschäf-tigen an och eng deementspriedend Mo-tioun hei déposéieren. D'Chamber ass op jidde Fall bereet, mat der Regierung op de Wee vu Maastricht ze goen, pour le meilleur et pour le pire.

Här President, Dir Dammen an Dir Hären, e Bléck an d'Zukunft beweist, dass d'Eraus-fuerderungen, déi op eist Land duerkom-men, gewaltig sinn. Si verlaangen no Krea-tivitéit an der Fäegkeet vernetzt ze denken. Mir wëssen, dass mer den Defizit vum Stats-budget an de Joren 2008 an 2009 weider zrëckféiere mussen, an zwar bis op de Punkt vum Equilibre. Dat bedeit, dass en hallwe Prozentpunkt PIB pro Joer muss un Defizit ofgebaut ginn. Esou verlaangt et den europäesche Stabilitéitspakt vu senge Memberen, besonnesch vun deenen, déi mat esou positive Wirtschaftsdaten operéie-ren, wéi mir se de Moment kennen.

Dat ass zwar méiglech, mä et geet net vum selwen. Mir wëssen, dass mer laangfristeg iwwer eng ganz Aarbechtsgeneratioun ge-rechent 4% Wirtschaftswuesstum an der Moyenne brauchen, fir eis Pensiounskeesen iwwert d'Ronnen ze kréien, mä am Fong just, fir bei 700.000 Awunner feststellen, dass mer ouni Reform annerhallef Millioun brauchen, fir dass de System weider ronn-dréint. A mir wëssen, dass déi 4% tëschent 2001 an 2004 nëmme mat ganz vill Krämp-es ze erreeche waren.

Mir wëssen, dass mer bei de Krankekeesen e strukturelle Problem hunn, dee sech spéit-stens dann auswierkt, wann déi haut 35- bis 50-Jähreg, déi an der Alterspyramid vun ei-sem Land dee gréissten Deel ausmaachen, an deen Alter kommen, wou se Sécurité-so-ciales-méisseg méi kaschten, an dat ass an der Regel vu 55 Joer un.

Mir wëssen, dass 2006 12.000 nei Aar-bechtsplazen zu Lëtzebuerg geschaf gou-fen, déi mat 9.000 Frontalieren an nëmme mat 3.000 Residenté besat goufen, dat bei enger Aarbechtslosegkeet op héije 4,5%, wat ronn 10.000 Leit ausmécht. Zu Lëtze-buerg ginn dëst Joer bal esou vill Aar-bechtsplaze vu Frontaliere besat, wéi eise ganze Chômage ausmécht, an awer geet en net erof, mat all deem, wat dat un indivi-duell dramatesche Schicksaler ausmécht.

Mir wëssen an deem Kontext och, dass Bil-dung, Ausbildung a Weiterbildung fir d'Re-duktioun vun der Aarbechtslosegkeet abso-lut kruzial Viraussetzung sinn, déi eis inter-pelléieren, fir un de schouleschen Optiounen an der Leeschtungs-fäegkeet vun der Lëtzebuenger Schoul dringend benéidegt Verbesserungen erbäizeféieren.

Mir wëssen, dass mer ewell dagsiwwer zu Lëtzebuerg zu iwwer 600.000 sinn, dovun just 280.000 Lëtzebuenger, mat all deem, wat dat u gesellschaftlecher Integratiouns-leeschung verlaangt, un Infrastrukturen, déi kaschten, an un Transfertsleeschungen, déi, wann net haut, da muer musse bezuelt ginn.

Mir wëssen, dass d'öffentlech Hand sech nach munches muss afale loossen, wa se méi bëllegt Wunne fir eis Jonk wëllt erméig-lechen, an am Fong iwwerhaapt er-schwénglecht Wunne fir all Mënsch. No-deems op der Steuer- a Subventiounssäit an deene leschte Jore bal alles gemaach ginn ass, wat iergendwéi méiglech ass, bleift nëmmen nach d'Méiglechkeet, duerch méi Angebot de Präis ze stabiliséieren. Ouni eng méi incisiv Roll vun der öffentlecher Hand wäert eis dat net am erfuerderleche Mooss geléngen.

Mir wëssen, dass an engem räiche Land och Aarmut existéiert. Do wou Liicht ass, ass och Schiet. An déi Leit, an et sinn dau-senden hei zu Lëtzebuerg, déi am Schiet musse liewen, hu sech dat net alles onbe-déngt gesicht. Onzouräichend Ausbildung, Aarbechtslosegkeet, iwwerdeiert Wunnen a mënschlech Keelt kënnen e Spiraleffekt aus-léisen, un deem sengem Enn Aarmut an Ex-

klusioun stinn. Dëst muss d'Politik mat alle Mëttelen an natierlech och ënner Réckgrëff op déi national Solidaritéit bekämpfen an andämmen.

Pake mer et un an engem positive Geescht, andeems mer déi richteg Décisiounen huelen, andeems mer d'Geschéck hunn, déi richteg Prioritéiten ze setzen, andeem mer dat Wesentlech vum Onwichtigen, dat kuerzfristegt Stëmmgewënnend vum laangfristeg Sënnvollen trennen!

Här President, Dir Dammen an Dir Hären, wat vun Investissementer am Beräich vum öffentliche Transport, vum Logement, vun den öffentleche Bauten op eis duerkënnt, wäert considéabel Zomme verschléngen. Nei Spideeler, eng nei Organisatioun vun der medezinescher Betreiuungslandschaft, wéi se aus den elo ufänkenden Diskussiounen ëm déi nächst Spidolskaart erauszeliessen ass, wäerte sech an der Bilanz mat héijen Ausgabepostë manifestéieren. Ausgabeposten, déi mer net kënnen endlos strecken an drécken, wa mer, wéi dat jo kee géif bestreiden, d'Zil vun enger optimaler Gesondheetsversuergung fir jiddferen zu Lëtzebuerg weider virun Aen hunn.

Déi Schoulen, déi mer nach musse bauen, an zwar esou, wéi mer an Zukunft wäerte misse Schoule bauen, fir dass mer nei Bildungsziler kënnen erreechen, si net zum Braderiestarif opzeriichten - PPP hin oder PPP hier. Nei Garen, nei Zuchlinnen, Opfang- an Ëmgehungsstroosse kënnen mer net realiséieren, ouni substanzéiell Kreditter zu hire Gonschten auszeweisen. D'Beruffsa Familljeliwe matenee kombinéieren, Uni a Recherche opbauen, Kyoto meeschteren an eis Entwécklungshëllef weider ausbauen, wäert net zum Nulltarif sinn.

Dës erneiert Logik viséiere mer un, virum Hannergrond vun engem nach net ëmmer équilibréierte Budget, an deem mer op déi eng oder déi aner Manéier zousätzlech zu den ze gestaltenden Ausgabe musse 500 Milliounen pro Joer spueren, fir bis 2009 nees an den Equiliber ze kommen. Näischt vun deem, wat mer elo politesch bewierkstellegen, steet am Fong zur Dispositioun, esou dass mer net einfach kënnen soen: Hei gëtt elo e grouse Block ausgeschnidden, an da leeft et nees virun.

Mir hunn net 500 sozial Milliounen, déi mer kéinten oder wëiten einfach esou zesum-mesträichen - fir eng kloer Ofso un d'Adress vun all deenen ze riichten, déi esou eppes nach ëmmer schéngen ze mengen. Méi eng selektiv Ënnerstützungspolitik ze maachen, kann net heeschen, grad deenen, déi se am dréngendste brauchen, d'Ënnerstützung ewechzehuelen.

Déi bewäerte Politik viruschreiwen a se mat neien, néidegen, erstriewenswäerten Elementer an Akzenter kombinéieren heescht, eis budgetär aneschtens ze organiséieren. Et heescht och, Saachen a Fro ze stellen, déi zwar praktesch, komfortabel a gemitt-lech sinn, awer weder besonnesch zukunfts-trächteg nach vun engem voluntaristesche Politikusaz inspiréiert.

Här President, Dir Dammen an Dir Hären, dat wat ech elo probéiert hunn ze beschreiwen, ass als Gesamtpak onauswäichlech. Mir müssen eng Partie Ziler gläichzäiteg viséieren, a mir müssen eng ganz Partie vu Resultater gläichzäiteg erreechen.

De Budget nees an e Gesamtéquilibrer ze kréien, dat ass keng Optioun. Et ass eng Viraussetzung an eng Noutwendegkeet, fir nei Politike kënnen unzegoen.

Nei Politiken ze definéieren an ëmzesetzen, ass och keng Optioun. Et ass dréngend noutwendeg, fir d'Zukunfts-fäegkeet vun eiser Gesellschaft ze assuréieren.

Déi Wiesselwirkung tëschent dem Ausgläiche vum Budget an der Realisatioun vun neie Politike fir d'Land a fir d'Leit ass keng einfach. Eisen Handlungsspillraum op dem Spannungsfeld tëschent Spueren an Investéieren ass enk, méi enk wéi fréier. Hien optimal notze bedeit, dass mer eis müssen eng kloer a verpflichtend Prioritéitenuerdnung fir déi kommend Jore ginn.

Ech hunn d'Investissementer an d'Défien op deem Chantier ugeschwat. Méi bezuelbare Wunnengsraum, verbessert Mobilitéit fir eis Leit, eng besser Ausbildung fir eis Jonk, d'Bekämpfung vun der Aarbechtslosegkeet

an der Ausgrenzung, dat müssen déi absolut virrangeg Ziler vun där Politik sinn. A si verlaange resolut Investissementer, déi eis all zegutt kommen.

Ganz besonnesch déi méi spierbar schoulesch Erfolleger vun eiser Jugend konditionéieren de weidere Succès vun der Lëtze-buerger Gesellschaft. Mir kommen net duer, wuer mer wëllen hin, wa mer net op déi kommend Generatiounen setzen, déi d'Heft kënnen an d'Hand huelen a Stat a Gesellschaft orientéieren, amplaz just vun hinnen orientéiert ze ginn.

D'Entwécklung vum Chômage, déi vun der Kriminalitéit an der Gewaltbereitschaft an der Gesellschaft, déi vun eiser Kompetitivitéit an eiser wirtschaftlecher Leeschtungs-fäegkeet hänke vun der Ausbildung an der Bildung vun deenen of, déi muer zu Lëtze-buerg solle schaffen. Natierlech müssen déi Leit sech och kënnen logéieren a sech bewe-gen.

A si wäerten zu méi sinn, wéi dat haut de Fall ass! Mir kréien all Joer 5.000 nei Awun-ner bäi. Dat sinn der 50.000 an zéng Joer. Ech muss kengem e Bild molen, fir duerze-stellen, dass ëm 2050 d'Lat vun de 700.000 Mënschen zu Lëtzebuerg esou wäert er-reecht ginn. An deem Zeenario wahrschein-lech mat ronn 300.000 Frontalieren. Dat mécht eng Millioun Leit, déi sech um Hori-zont vun der iwwernächster Generatioun wäerten zu Lëtzebuerg befannen a sech bewegen.

Un eis ass et haut, fir d'Viraussetzungen do-fir ze schafen, dass si dat an enger Atmos-phär vu sozialem Fridden an am Kader vun enger équilibréierter Gesellschaft kënnen maachen. D'Schafe vun dëse Viraussetzun-gen huet alles ze di mat der Aart a Weis, wéi mer eis Budgeten déi kommend Joren agencéieren. D'Erausfuorderung ass deem-no gestallt. D'CSV-Fraktioun, Här President, Dir Dammen an Dir Hären, ass bereet se un-zegoen.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Wolter. Nächste Riedner ass den honorabelen Här Meisch. Här Meisch, Dir hutt d'Wuert.

» **M. Claude Meisch (DP).** - Här Presi-dent, Dir Dammen an Dir Hären, d'Demo-kratesch Partei kuckt no vir! Dat sinn dem Statsminister seng Wiederer vun der leschter Woch - op jidde Fall, esou hunn ech se emol verstanen.

D'DP kuckt no vir, well mer eis Suerge maa-chen ëm eist Land, well mer eis Suerge maachen ëm d'Zukunftschancen hei am Land, well mer fäerten,...

(*Interruption du Président*)

...datt dat, wat laang Joren hei am Land ge-gollt huet, op eemol net méi de Fall ass, nämlech datt jiddferen d'Chance kritt, sech, seng Famill an domadder och dat ganz Land no vir ze bréngen. A mir hoffe jo emol, datt mer net déi eenzeg sinn, déi sech heibannen doriwwer Suerge maachen.

Ech si vun Natur aus Optimist, kann ech lech soen - wéi ganz vill aner liberal age-stallte Leit -, an ech übe mech ganz seelen a Schwarzmolerei. Den Optimismus dierf awer net blann maachen, fir dat ze erken-nen, wat schifleeft, wat déi grouss Eraus-fuorderunge vun der Zukunft sinn. En dierf eis net dozou verféieren ze mengen, ier-gendwéi géif et scho vum selwen erëm rich-teg gutt goen.

Wann ee gesäit, datt trotz intensive Spuer-moosname fir d'Joer 2007 e strukturellen Defizit am Statsapparat vun enger Milliard Euro virgesinn ass, da kann een dat net ein-fach esou hinhuelen. Dat heescht nämlech, datt de Stat fir 2007 eng Milliard méi dierf ausginn, wéi e rechent eranzekréien.

Trotz den Aschnëtter vun der Spuertripartite geet de geplangten Defizit an der Adminis-tration centrale, also dem Statsapparat, grad emol ëm 150 Milliounen par rapport zum Defizit am Budget 2006 erof. Wa mir an deem Rhythmus virufueren, da wäert de Budgetsminister nach laang müssen Defizi-ter presentéieren. Dofir si mir der Meenung, datt op där enger Säit déi Spuererefforten net dierfen noloossen, an datt mer op där aner-er Säit alles müssen drusetzen, datt och weiderhin eng dynamesch Ekonomie zum Finanzement vum Statsapparat ka bäi-droen.

Nu maach d'Liesart vum Budget no der SEC-95-Method - also kompatibel mat de Kritäre vum europäesche Stabilitéitsplang - eng aner sinn, mä Tatsaach ass, datt de Stat plangt, vill méi Geld auszeginn, wéi en era-kritt - an dat nach iwwert déi nächst Joren.

Wa mir net all Joers duerch déi exzellent Konjunktur méi Geld an de Statssäckel kréien, wéi no realistesch Aschätzungen

erwaart gëtt, da riskéiere mer d'Reserve ganz schnell opzebrauchen an deene kom-mende Generatiounen eng säfteg Schold ze hannerloossen.

Dofir maache mir eis Suergen ëm d'Zukunft. Et ass de strukturellen Defizit an de Statsfi-nanzen, dee momentan nach zum Deel duerch konjunkturell Plus-valuen ofgediert gëtt. Mä kee weess, ob dat nach déi nächst Joren esou bleift. De Schock vun 2001 misst eis jo alleguerten nach an de Schanke stie-chen.

Nu mierkt ee bei der Regierung an och bei de Majoritéitsparteien en intensiven Drang, fir d'Presentatioun vum Budget an Zukunft ausschliesslech no der SEC-95-Method vir-zehuelen, fir konform ze si mat Maastricht, fir eis besser mat den europäeschen No-pe-re kënnen ze vergläichen, fir déi finanziell Situatioun vun de Gemengen an de Sozial-keesse kënnen mat anzerechnen.

Dat mécht och Sënn an eisen Aen, mä et dierf awer net dozou féieren, datt d'Reali-téit verzerrt gëtt. Wann nämlech den Defizit beim Zentralstat mam Iwwerschoss bei der Sécurité sociale verrechent gëtt, da schéngt et, wéi wann d'Statsfinanze besser géingen dostoan, wéi se a Wierklechkeet sinn.

No Maastricht kann dat Sënn maachen, mä et soll jo kee mengen, den Iwwerschoss aus de Sozialkeesse kéint wierklech dozou dén-gen, dem Stat seng Dépenses ze decken. Dat Geld ass net disponibel, mä dat Geld muss op d'Säit geluecht ginn, fir deene Jon-ke vun haut muer hir Pensiounen ze bezue-len.

Och wann no der SEC-95-Method den Defi-zit fir 2007 just op 310 Milliounen chiffriert gëtt, huet de Stat e reelle Besoin de finance-ment vu ronn enger Milliard. A wann no der SEC-95-Method den Defizit 2009 bei null läit - an dat ass jo d'Zil vun dëser Regierung -, dann heescht dat nach ëmmer, datt den Zentralstat nawell en Defizit vun 2,3% vum PIB mécht. Vill méi transparent ass dat do-ten och net.

Et dierf also net drëms goen, de Budget aneschtens ze presentéieren, fir ze ver-heemlechen, datt de Stat am Laf vun de-enen nächste Joren op Käschte vun de kom-mende Generatiounen leeft, an dann 2009 e Budget ze presentéieren, deen zwar am Maastricht-Equiliber ass, mir pro Joer awer ëm déi honnerte vu Milliounen méi ausginn, wéi erakommen. Neen, Maastricht hin oder hier, eis Ustrengungen, fir d'Recetten an d'Dépensé méi no beieneenzebréngen, dierfen net noloossen!

Här President, Dir Dammen an Dir Hären, de Statsminister huet d'lescht Woch ge-mengt, d'DP géif ze vill no vir kucken an do-bäi de Bléck zrëck - virun allem op déi re-zent Vergaangenheet - vernoléisseg.

Ech wëll hei soen, datt d'DP zu deem steet, wat se an de Joren 1999 bis 2004 selwer ini-tiéiert huet, an och zu deem, wat se matge-droen huet. Dat kann ee jo net vu jiddferen-gem heibanne behaapten!

D'DP steet zu de Steierreduktiounen fir d'Pri-vatpersounen an d'Betriben aus de Joren 2001 an 2002, well se de Leit an de Betriben méi Loft ginn hunn, fir ze consomméieren an ze investéieren.

D'DP steet zu de Beschléss vum Renten-dësch, well domadder e politesche Problem geléist gouf, dee laang Joren d'Land ge-spléckt huet. Et ass do ëm Gerechtegkeet gaangen, et ass drëms gaangen, datt kee misst am Alter, no jorelaangem Schaffen, an Aarmut falen.

Dobäi ass d'DP déi Partei, déi scho virun 1999, duerno an och haut nach proposéiert, eise Rentensystem méi breet opzestellen, en duerch Elementer vu Kapitaldeckung ze verstärken, fir datt en dann och nach d'Laaschte kann droen, wann déi an d'Pen-sioun ginn, déi dëst Joer, also 2006, fir d'éischte Kéier eng Cotisatioun bezuelt hunn. Do konnten tëschent 1999 an 2004 éischt Akzenter gesat ginn. Zënterdeem ass awer net méi vill geschitt.

D'DP steet och zur antizyklescher Budgets-a Finanzpolitik vum Ufank vun deemem Jor-zéngt. Et war richteg, d'Konjunktur net duerch iwwerdriwwer Spuererefforten nach weider ofzewiergen, wéi déi international Ekonomie dat souwisou schonns gemaach huet. Mä eng antizyklesch Budgetpolitik besteet jo net nëmmen doranner, a schlech-ten Zäiten d'Konjunktur duerch d'Akafhuele vun engem Defizit ze stäipen.

Déi aner Säit vun der Medail gesäit vir, a gudden Zäiten den Defizit nees ze redu-zéieren - an eigentlech méi wéi dat. D'Rech-nung geet jo mëttelfristeg nëmmen op, wann a gudden Zäiten och nees deement-sprechend Reserve kënnen ugeluucht ginn, also Iwwerschëss kënnen accumu-léiert ginn, déi da bei där nächster Talfahrt e wäertvollt Polster kënnen duerstellen.

Grad deen Effort ass momentan bei engem Defizit vun enger Milliard Euro net ze erken-nen. D'Reserve ginn och a gudde Jore wei-der ugezaapt. A wat géif geschéien, wann d'Ekonomie kuerzfristeg nees géif abrie-chen? Da géif Lëtzebuerg ganz schnell mam Réck zur Wand stoan.

Mir gesinn eis zrëckversat an d'70er Joren, wou d'Politik a ville Länner esou gemaach huet, wéi wa se ganz streng no de Virgabe vum Här Keynes géif fueren, op deem seng Theorie sech dat do jo baséiert, mä duerno awer ganz schnell an Zäiten, wou den Defi-zit hätt erëm misse reduzéiert ginn, dat si gelooss huet an d'Geld awer weider aus-ginn huet. Déi Länner leiden haut nach oft ënner engem Scholdebierg, dee se dee-mools accumuliert hunn.

Wou an e puer Joer esou vill Geld ausgi-gouf, datt déi nokommend Generatiounen nach haut müssen zrëckbezuelen.

Wou d'Schold- an d'Zënslaaschten all Mar-gen opfriessen, fir nei Politike kënnen ze ge-stalten.

Wou d'Hänn engem da gebonne sinn, wann néideg Strukturreforme musse begleet ginn.

Wou näischt méi bleift, fir de Konsequenze vun der Globaliséierung entgéintzewierken oder se nëmmen ofzufiedereen.

Wou d'Demographie schwéier op de Rente-system dréckt, mä weineg Spillraum ass, fir den Émbau vum System ze ënnerstëtzen.

Wou de medezinesche Fortschrëtt ze deier gëtt, fir datt jiddferen dovunner ka profi-téieren.

Wann d'DP virun esou engem Zeenario warnt, da kann een dat weder als Autismus nach als Schizophrenie bezeechnen, dann ass dat eng Politik vu klorem Mënschever-stand. Dofir plädéiert d'Demokratesch Par-tei fir weider Efforten ze maachen, fir mëttel-fristeg wierklech nees mat deem Geld vun haut eens ze ginn.

Et wär méi einfach fir d'DP sech als Sproochrouer vun all deenen ze profiléieren, deenen all Dag afällt, wéi de Stat nach méi Geld kéint ausginn. Et wär einfach, vläicht populär, mä et wär awer falsch! Mir kréien eis Zukunft net preparéiert, wa mir esou maachen, wéi wann alles kéint beim Ale bleiwen.

An datt ee mat esou enger éierlecher Oppo-sitiounspolitik och eppes bewierke kann, hu mir am Laf vun deemem Joer méi wéi eng Kéier gesinn.

Et war d'Demokratesch Partei, déi vun Ufank u plädéiert huet, d'Budgetskris net duerch en Dréinen un der Steierschrauw ze léisen. Esou wéi d'Steierreduktiounen vun 2001 an 2002 am Endeffekt méi Geld an d'Statskeess bruecht hunn, esou schaaft d'Erhéijung vun der Steierlaascht nëmme kuerzfristeg eng budgetär Entlaaschtung, well d'Betriben hir Aktivitéit verlageren an de Konsum ofgewiergt gëtt. Duerno geet et dem Statsbudget net besser wéi virdrun. Am Fall vun enger klenger Ekonomie, déi duerch d'Dynamik vum Finanzsektor ge-droe gëtt, nach éischter vill méi schlecht.

An ech muss lech soen: Mir sinn erliichtert, datt déi gréisste Sënnen, déi d'Regierung am Mee vun deemem Joer geplangt hat, elo emol op Äis leien.

(*Interruption*)

D'Erhéijung vun der Solidaritéitssteuer ëm 1% fir Privatpersounen a Betriben wär mat Sécherheet e falscht Signal gewiescht an hätt eiser nationaler Ekonomie nohalteg ge-schuet. Dës Steuer ass en Instrument, fir an enger Krisesituatioun déi national Solidari-téit kënnen spillen ze loossen. Se géif elo awer just dozou féieren, datt manner Aar-bechtsplaze géingen entstoen, also de Contraire vun deem, wat mer brauchen, a vun deem, wat mer hoffentlech alleguerte wëllen.

Et war d'DP, déi als Eenzeg am Land géint deen Nonsens do Stuerm gelaf ass, a schlussendlech huet d'Regierung missen noginn. Eise Problem läit nämlech net doranner, datt net genuch Geld an d'Stats-keesse kënnt. Dat gesi mer jo, wa fir dat la-fend Joer iwwer 700 Milliounen méi schéngen eranzekomme wéi geplangt. Et sinn d'Dépenses, déi eis fortlafen. Do musse mer usetzen, wa mer dee strukturellen Defizit vun enger Milliard wëllen erofsetzen.

Här President, Dir Dammen an Dir Hären, d'DP begréisst et och, datt d'Regierung elo emol zumindest driwwer schéngt nozeden-ken, fir d'Steiertabell un d'Inflatioun unze-passen. Ech wëll dat hei kloer soen, well dat ass jo schonn emol e grouse Fortschrëtt par rapport zu deem, wat mer am Mee vun deemem Joer hei héieren hunn.

D'DP huet scho beim Budget fir d'Joer 2005 op déi schliächend Steiererhéijung op-mierksam gemaach, a mir stelle fest, dass de Krees vun deenen, déi eis Recht ginn,

ëmmer méi grouss gëtt. Mir befannen eis do a gudder Gesellschaft vu CGFP, LCGB an aneren, déi datselwecht fuerderen.

Zënter dem 1. Januar 2002, wou déi deemoleg CSV-DP-Regierung d'Akommessteuer däitlech reduzéiert hat, hunn d'Steierzueler hei am Land wesentlech méi un Akommessteuer bezuelt, wéi dat dem deemolegen Tarif no noutwendeg gewiescht wär. Zënter datt dës Regierung am Amt ass bis haut hunn d'Leit insgesamt 280 Milliounen Euro méi u Steiere bezuelt. Eleng fir dat lafend Joer mécht dat ëm déi 140 Milliounen aus. An et muss een dovunner ausgoen, datt mat där am Dezember erfallender Indextranche d'Erhéijung vun der Akommessteuer fir 2007 nach emol wäert méi héich ausfalen.

Et ass virun allem hei de Mëttelstand, dee méi bezilt. Et sinn net déi sougenannten Déck, deenen den Här Frieden an d'Täsch gräift, well fir déi och duerch d'Inflatioun d'Maximalbelaaschtung net iwwer 38%erausgeet. Et sinn déi schaffend Leit: Aarbechter, Employéén, Fonctionnaires. Et sinn da besonnesch och nach Famillje mat Kanner, bei deenen zougeschloe gëtt, also déi, déi schonn duerch d'Verschiebung vum Index, duerch d'Autossteuer, duerch d'Erhéijung vun den Accisen hu misse Plomme loossen.

Nieft dem Kafkraaftverloscht musse se dem Stat fir d'nächst Joer 140 Milliounen Euro méi Akommessteuer bezuelen, wéi laut Tarif noutwendeg wär. E Jonggesell mat engem Akommes vun 2.500 Euro de Mount am Joer 2002 bezilt doduerjer, eleng datt den Index zënter dem 1. Januar 2002 ëm 13,1% gestiegen ass, elo ronn 37,4% méi Steiere wéi nach 2002.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Wéi vill Euroe sinn dat?

»»» **M. Claude Meisch** (DP).- Dat ass een Drëttel...

»»» **M. Jean-Claude Juncker**, *Premier Ministre, Ministre d'État, Ministre des Finances*.- Wéi vill Euroe sinn dat?

»»» **M. Claude Meisch** (DP).- Ech kann lech dat soen, wa mer an d'Steiertabelle kucke ginn, Här Juncker. Et ass en Drëttel méi wéi hien 2002 bezuelt huet. Ech kann lech aner Beispiller nennen.

(Interruptions diverses et coups de cloche de la Présidence)

»»» **M. Gast Gibéryen** (ADR).- Den Här Statsminister misst dat dach wëssen.

»»» **M. Claude Meisch** (DP).- Eng bestuete Koppel mat zwee Kanner a mat engem Akommes de Mount vu 4.000 Euro bezilt souguer 72,3% méi Akommessteuer wéi 2002. Ocho do kënnen mer schnell nokucken, wéi vill Euroen datt dat dann ausmécht.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Wéi vill Euroe sinn dat?

»»» **M. Claude Meisch** (DP).- Ma mir kucken dat elo no, Här Juncker. Da stelle mer eis zesummen iwwert de Barème an da siche mer et no.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Très bien.

»»» **M. Claude Meisch** (DP).- Den Index, dee jo elo emol net méi duergeet, fir d'Kafkraaft ze erhalen, muss dann och nach hierhalen, fir dem Stat méi Steieren ze bezuelen.

Dat sinn ze vill Laaschten op deene Schëlleren, déi eist Land sollen droen!

A wéi d'Partei mat engem „S“ am Numm datt dann och nach als eng sozial Politik kënnen verkafen, dat muss emol een eis erklären.

An da kënnst den Här Frieden am Eescht heihinner a seet, 2007 géingen d'Steieren net eropgoen. Wann nieft der Autossteuer, den Haussé vun den Accisen, der TVA fir liberal Beruffer, dem Plus vun der Cotisatioun fir d'Fleegeversécherung ëm 40%, dann och nach iwwer 140 Milliounen zousätzlech un Akommessteuer fälleg ginn - wann dat awer keng Steiererhéijunge sinn, da freet ee sech, wat den Här Frieden sech ënner enger richteger Steiererhéijung alles virstellt.

D'lescht Woch huet de Premierminister d'Diere fir eventuell Steiererlicherterungen eng Spléck wäit opgemaach. Ech bedauern awer, datt de Premier net méi determinéiert war, grad wéi et ëm d'Erofsetze vun de Steiere gaangen ass, an hien huet sech do méi wéi och nëmmen eng Hannerdeit opgelooss.

Eiser Meinung no muss et ganz kloer d'Zil vun der Politik sinn, fir de Leit an de Betriber

hei am Land e groussen Deel vun deem Geld, wat se duerch hir Aarbecht verdéngt hunn, ze loossen.

D'Lëtzebuerger Economie glänzt jo och doduerjer mat grousser Performancen, well den Know-how an d'Kapital zum Deel aus dem Ausland kommen. D'Wëssen, d'Erfahrung an d'Fäegkeete vun dausende vu Leit droen zum Wuelstand vu jiddferengem bäi. Dat Wëssen, déi Erfahrung an déi Fäegkeete kënnen awer och schnell nees verluer goen, wann d'Leit gesinn, datt de Stat sech hei zu Lëtzebuerg ze vill zerwéiert un deem, wat si geschafен hunn.

D'selwecht ass et mam Kapital, dat hei investéiert ass. Wann et enzwousch anescht méi ofwerft, da geet et iergendwann dohinner. De globale Steierwettbewerb wäert Lëtzebuerg net ophalen, an dofir musse mer nieft der Akommessteuer och d'Betriebsbesteuerung iwwerdenken; net fir Cadeauen ze maachen, mä fir sécherzestellen, datt och muer nach grouss Benefisser mat zwar verstännege Steiersätz kënnen besteiert ginn. Da kënnst nämlech vill méi Geld an d'Statskeess, wéi wa mer hei nach just e puer Entreprisë mat dann zwar ganz héije Sätz kënnen besteieren.

Duerfir kann et haut net méi sinn, datt eng Entreprise schonn um investéierte Kapital besteiert gëtt, éier se iwwerhaupt schonn hir Dieren opgemaach huet. Den Droit d'apport gehéiert net méi an dës Welt, a mir sollten net op d'EU-Kommissioun waarden, fir hei eppes ze ënnerhuelen.

D'Taxe d'abonnement ass jo keen Argument, fir d'Fongenindustrie hei zu Lëtzebuerg ze halen. A well ee jo weess, datt an deem Domän d'Konkurrenz an a ronderëm Europa méi grouss ginn ass, muss een och hei zu enger Strategie zrëckfannen, fir sécherzestellen, datt de Stat sech och nach duerch d'Aktivitéiten op der Finanzplaz ka finanzéieren, an dës Aktivitéiten awer gläichzäiteg kann heihalen. Méi eng differenzéiert Taxe d'abonnement géif do sécherlech Sënn maachen, fir zum Beispill eng Rei vu spezifesche Produitë besonnesch ze förderen.

Mir sollten eis seriö mat de Propositionen an den Iwwerleeunge vun der Chambre de Commerce zur Betriebsbesteuerung beschäftegen. Well mir als Land de Choix geholl hunn, mat niddrege Steiere vill Aktivitéit wëlen unzezéien, musse mir hei besonnesch e Bléck op eis europäesch Noperen halen. Duerfir sollte mir eis ganz schnell Gedanke maachen iwwert d'Besteuerung vum Kapital, iwwert den Droit d'apport, iwwert d'Iddi vun der Dette notionnelle beziehungsweise d'Intérêts notionnels, iwwert den Taux d'imposition vun de Betriber an esou weider an esou fort.

Eng interessant Steierlandschaft ass haut méi wéi jee wichteg, a besonnesch fir Lëtzebuerg, fir kompetitiv ze bleiwen. Et ass och de Garant, fir weider Aktivitéiten um Standuert Lëtzebuerg, fir sécher Aarbechtsplazen an eben och fir gesond Statsfinanzen. Mir sollten de Schrëtt schnell ugoen, well et ass vill méi einfach, e Betrib heizehalen, wéi en duerno nees sichen ze goen.

Eng kompetitiv Betriebsbesteuerung eleng mécht awer nach keng dynamesch Economie. De Präis vun der Energie, schnell an effizient Administratiounen, e Guichet unique fir Betriber, eng oppen Haltung zu Zukunftstechnologien, Flexibilitéit, fir ze produzéieren an ze verkafen, Innovatioun duerch Fuerschung, Virfahrt fir eise Mëttelstand, a ganz besonnesch gutt forméiert Personal; alles dat muss zesummekommen, fir datt muer eis Economie genuch ofwerft, fir datt mir eis grouss a kleng Wënsch kënnen erfüllen. Och dat ass Budgetspolitik, wa mëttelfristeg assuréiert ass, datt kompetitiv Betriber hei am Land hir Steiere bezuelen. Dat bréngt Recetten. Dat reduzéiert den Defizit.

Et ass an eisen Aen net alles falsch, wat de Premierminister d'lescht Woch hei presentéiert huet. A bei deem engen oder anere Schrëtt wäert en d'Demokratesch Partei als Alliierten hunn: Dann, wann et drëms geet, d'Steiertabell un d'Inflatioun unzepassen, fir d'Betriebssteiere punktuell unzepassen, fir esou am internationale Kontext konkurrenzfäeg ze bleiwen.

Mat der Iwwerleeung, fir mëttelfristeg Reserven unzeleeën, fir eng Rei vu Risiken op der Recettësäit, wéi zum Beispill den Tanktourismus, ze provisionéieren, hu jo och mir eis scho beschäftegt. Wann et drëms geet, fir nei Margen ze schafen, fir esou nei an noutwendeg nei Politike kënnen ze développéieren, wäert d'DP gäre mathëllefen. Nëmmen esou ass eisen Engagement an der Fuerschung, fir d'Uni, fir d'Kannerbetreuung ze finanzéieren.

Mä finanziell a politesch geet dat doten alles eleng net op. Wann een dat do alles wëllt maachen, da muss ee jo iwwert déi Reforme

vun der Tripartite erausgoen, da sinn déi jo wierklech nëmmen den Ufank, wéi de Rapporteur Lucien Thiel d'lescht Woch hei gesot huet.

Ech froen duerfir: Wéi wëllen d'CSV an d'LSAP elo weiderfueren, wann alles nëmmen en Ufank ass? Wéi wëllen d'CSV an d'LSAP dann nei Margë schafen, d'Zukunft attackéieren, a fir déi schlecht Zäite spueren? Sot eis dat, wann ech gelift!

Hei ass et, wou et da roueg gëtt op de Bänke vun der Majoritéit!

Kee Wuert doriwwer, wéi mir muer eis sozial Ofsécherung wëlle finanzéieren, wann de Budget déi grouss staatlech Participatioun un de Kessen net méi packt. Kee Wuert mat wat fir enger Aarbechtsmaartpolitik d'Ausgabe vum Fonds pour l'Emploi solle reduzéiert ginn, andeems d'Leit nees an den éischten Aarbechtsmaart integréiert ginn.

Keng Iwwerleeungen, wéi den Transfert vu Sozialleeschtingen an d'Ausland ka gebremst ginn. Mir hunn näischt héieren iwwer méi eng kloer Orientatioun an der Familljepolitik. Kee Wuert iwwer méi eng selektiv Sozialpolitik, wou deen, deen déi Hëllef brauch, och méi gehollef kritt, amplaz déi elektoral motivéiert Géisskanepolitik, déi kaum nach ze finanzéieren ass.

(Interruption)

Wie mengt, datt de Budgetséquiber mëttelfristeg kann erreecht ginn, d'Steiere kënnen erofgoen, Reserve kënnen op d'Säit geluecht ginn, an nei Dépenses engagéiert ginn, dee kënnst net laanscht dës Froen. Et sief dann, déi hätte Recht, déi soen, d'Situatioun wär vill besser, wéi d'Regierung se géif duerstellen. Dat wär zwar vläicht den einfachsten Zeenario, ob et dee realisteschsten ass, dierf awer dohinnergestallt sinn.

Wien d'Ziler, déi d'lescht Woch hei développéiert goufen, wierklech wëllt erreechen, deen deet gutt drun, nach emol e Bléck an déi 33 Propositionne vun der Demokratescher Partei ze werfen, déi mir am Abrëll vun dësem Joer vigeluecht hunn. Propositionen, wéi de Stat besser mat sengem Geld eens gëtt, wéi d'Mënschen an Aarbecht kommen a bleiwen, wéi eis sozial Ofsécherung op déi grouss Erausfuerderunge vun der Zukunft kann agestallt ginn, wéi eis Betriber der globaler Konkurrenz trotz ze kënnen.

Propositionen, déi net d'Ambitioun hunn, all Beauty-Contest ze wannen, mä eng éierlech Politik ausmaachen, déi eist Land nees kann op déi richtig Schinn bréngen. Eng Politik, déi vu jiddferengem eppes ofverlaangt, dofir eis de Scholdestat géif erspueren, dee jiddferengem hei am Land seng Fessel duerno géif ulerëen. Eng Politik, déi der Economie nei Perspektiven opmécht, eng Politik fir d'21. Jorhonnert, an net eng Perspektiv just bis 2009. Mä fir esou eng Politik schéngen d'CSV an d'LSAP net ze begeeschteren ze sinn.

Wat fir eng Politik begeeschtert dann nach d'CSV an d'LSAP? Et weess keen et esou richtig. Wann den Här Bodry, Parteipresident vun der LSAP, dem Premier an aller Däitlechheet ze verstoe gëtt, datt den Här Boden laang genuch Zäit gehat hätt, fir nozekucken, wéi d'Situatioun um Wunnengsmaart sech Joer fir Joer verschlëmmert, da kann d'Ähnlechheet an der Koalitioun jo wuel net besonnesch grouss sinn.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Ech wëll lech awer soen: Beim Här Boden a mir klappt et awer nach.

(Hilarité)

»»» **M. Claude Meisch** (DP).- Här Premierminister, dovun hunn déi Leit, déi op der Sich no enger Wunneng sinn am Land, awer nach net ganz vill.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Jo, jo.

(Interruptions)

»»» **M. Claude Meisch** (DP).- A wann dann och nach de Budgetsrapporteur Lucien Thiel, deem ee muss fir seng Fläissaarbecht félicitéieren - wat ech dann heimadder och ausdrécklech wëll maachen -, vum LCGB virgeworf gëtt, hie wär de Wollef am Schofspelz, da versteet een,...

»»» **M. Jean-Claude Juncker**, *Premier Ministre, Ministre d'État, Ministre des Finances*.- Dat ass net de Fall.

»»» **M. Claude Meisch** (DP).- ...datt se an der CSV alleguerten un engem Strang zéien, awer leider a verschidde Richtungen.

(Interruptions diverses)

Den CSV-Deputéierte Lucien Thiel wëllt weider den Index manipuléieren an de Rente-

system ëmbauen. Fir den CSV-Deputéierte Marc Spautz an anerer sinn dat „Visiounen, déi futtimaachen“! Dobäi sëtzen den Här Thiel an den Här Spautz hei an därselwechter Fraktioun. D'CSV probéiert vu lénks bis riets de ganze Politspektrum...

»»» **M. Jean-Claude Juncker**, *Premier Ministre, Ministre d'État, Ministre des Finances*.- Voilà!

»»» **M. Claude Meisch** (DP).- ...ofzedecken, a si mierken emol net, datt se amgaange si bei wichtige Zukunftsthemen, déi d'Zukunft vun deem Land hei markéieren, an der Mëtt auserneenzebriechen.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Dat mécht d'Differenz tëschent 36 an 20.

»»» **M. Claude Meisch** (DP).- Den Här Thiel mécht sech Suergen ëm déi laangfristeg Finanzéierbarkeet vun eise Renten; d'Demokratesch Partei och. Wann déi Suerge awer eescht gemengt sinn, da muss den Här Thiel a vill anerer och géint de Projet de loi 5611 stëmmen, well domadder zum Beispill duerch den Transfert vun de Babyjoren oder den Transfert vun der Prise en charge vum Complément différentiel fir 2007 méi Ausgabe vun 29 Milliounen aus dem Statsbudget an d'Rentekeese verlagert ginn. Dat nodeems mam Budget vun 2006 emol schonns 17 Milliounen zu Laaschte vun de Pensionskeesen transféréiert goufen.

Dat heescht: manner Reserven, manner Kapitaldeckung! An d'Rentemauer réckelt domadder e weidert Stéck méi no. E Problem vun haut gëtt einfach op déi nächst Generatiounen ofgewälzt.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Ah!

»»» **M. Claude Meisch** (DP).- Dir Damen an Dir Hären, dëst ass keng responsabel Politik!

»»» **Une voix**.- Très bien!

»»» **M. Claude Meisch** (DP).- Jorelaang ass dem Land...

»»» **M. Jean-Claude Juncker**, *Premier Ministre, Ministre d'État, Ministre des Finances*.- Vous ne manquez pas de culot!

»»» **M. Claude Meisch** (DP).- ...a senge Bierger gepriedegt ginn, d'Zukunft hätt dräi Buschtawen:...

»»» **M. Jean-Claude Juncker**, *Premier Ministre, Ministre d'État, Ministre des Finances*.- Vous ne manquez pas de culot!

»»» **M. Claude Meisch** (DP).- ...IVL! Programme directeur, Programmes sectoriels, Plans régionaux, Stadentwécklungsplang, en neit Gesetz iwwert den Aménagement communal, nei PAGen uechtert d'Land; alles dat gëtt elo vum Premier selwer iwwer Bord gehäit, wat eng kohärent Landesplanung ausmécht, andeems e proposéiert, de Stat soll Terrainen ausserhalb vum Perimeter opkafen an als Bauland op de Marché bréngen. Dovunner ofgesinn, datt duerch esou eng Äusserung d'Präisser vun den Terrainen och ausserhalb vum Perimeter an der Sekonn explodéiert sinn, ass et contraire zu alle Virstellunge vun enger kohärenter Entwécklung vun eisen Uertschaften.

Et geet der Regierung hei just drëms, ee Joer nom Mea culpa vum Premierminister, den Échec vun hirer Politik ze cachéieren. Datt d'Regierung an der Wunnengsbaupolitik scho laang kapituléiert huet, gëtt jo spëitstens kloer, wann de Premier seng lescht Hoffnung domadder verknäppt, datt d'Leit, oder déi ganz räich Leit, bereet wären, hir Terrainen emol ënnert dem Maartpräis ze verkafen.

»»» **M. Jean-Claude Juncker**, *Premier Ministre, Ministre d'État, Ministre des Finances*.- Jo!

»»» **M. Mars Di Bartolomeo**, *Ministre de la Santé*.- D'DP war géint all couragéiert Moossnamen.

»»» **M. Claude Meisch** (DP).- De Premier kann esou vläicht op de Comptoiren uech-

tert d’Land punkten. Et wäert awer ni een doduerjer eng Wunneng méi bëlleg fan-
nen.

» **M. Jean-Claude Juncker**, *Premier
Ministre, Ministre d’État, Ministre des Fi-
nances*.- Jo. Bestëmmt net um ieweschte
Stack vum Interconti. Dat ass wouer.

» **M. Claude Meisch** (DP).- Wann et
lech mat esou Äusserungen, Här Statsmi-
nister, eescht gemengt ass, da kann ee jo
dovunner ausgoen, datt de Stat deem-
nächst och wäert bereet sinn, Terrainen, déi
em selwer gehéieren, ënnert dem Präis ze
verkafe,...

» **M. Jean-Claude Juncker**, *Premier
Ministre, Ministre d’État, Ministre des Fi-
nances*.- Jo.

» **M. Claude Meisch** (DP).- ...wéi dat
zum Beispill um Kierchbiereg kéint de Fall
sinn...

(Interruption)

...respektiv ganz massiv op de Modell vum
Bail emphytéotique zrëckgräifen, wéi d’Stad
Lëtzebuerg dat jo an der Lescht gemaach
huet.

(Interruption)

Wéi een et fäerdeg bréngt, als Premier an
enger Woch souwuel déi fréier wéi och déi
heiteg Educatiounsministesch ze désa-
vouéieren, dat ass dem Här Juncker säi Ge-
heimnis. Fir d’éischt stellt de Premier sech
voll hannert d’Madame Delvaux a léisst kee
gutt Hoer un der DP-Bildungspolitik aus der
leschter Legislaturperiod, an da schléit e
sech nees op d’Säit vun der Madame Bras-
seur; wou jo awer jiddferree weess, datt d’DP
e ganz aneren Usaz an der Educatiouns-
politik huet, wéi déi jëtzege Regierung. Inter-
sant wär et emol ze héieren, wat d’CSV an
der Bildungspolitik virhuet. Oder wëllt d’CSV
hei wierklech nees d’Madame Hennicot
reaktivéieren?

Amplaz datt de Premier de Gemengen
d’Schold gëtt un der héijer Inflatioun, soll
hien emol kucken, wat den Innenminister
dovunner hält. Dee priedegt vu Rëmeleng
bis op Huldang nämlech, datt d’Gemenge
sollen de Käschtedeckungsprinzip uwen-
nen, an datt d’Fudder Waasser an Zukunft
bis zu 4,5 Euro kéint kaschten. Et däerf ee
gespaant sinn, wéi deen dote Richtungs-
sträit innerhalb vun der Regierung ausgeet,
ob de Premier wénnt oder säin Innenminis-
ter.

» **Une voix**.- Très bien.

» **M. Claude Meisch** (DP).- Och wäert
et drop ukommen, ob de Stat bereet ass,
nach déi grouss an deier Infrastrukturpro-
jete bei der Ofwaasserklärung wéi bis elo
mat 90% ze subsidiéieren. Sollt dat net de
Fall sinn - an dat stoung jo emol schonn am
Raum -, da wäert nach eng weider Well vun
Taxenerhéijungen op d’Leit duerkommen.

Och dierf ee gespaant sinn, ob d’LSAP
d’Meenung vum Här Juncker deelt. Ëmmer-
hin huet d’Lëtzebuurger Sozialistesch Aar-
bechterpartei nach viru sechs Méint per
Communiqué matgedeelt, datt d’Regierung
eenzeg an eleng un den Taxenerhéijungen
an de Gemenge schëlleg ass, well de Stat
d’Gemenge géif finanziell ausdréchnen.

Wie bei dëser Regierung no Kohärenz an
der Aktioun sicht, gëtt batter enttäuscht.
Den Zickzackkurs veronséichert net nëm-
men d’Leit hei am Land, en ass och den
Ausdrock vun enger grousser Hëllefloseg-
keet vun der Regierung.

„Réformer“ heescht laut Petit Robert: „chan-
ger en mieux“! D’Regierung schwätzt vum
engem Reformbudget fir d’Zukunft. Nu gëtt
vun neie Margë geschwat, mä bei engem
Defizit vun enger Milliard si keng ze fannen.
Nu sollen déi nächst Generatioune mat an
d’Boot geholl ginn; a Wierklechkeet ginn
d’Budgetsreserven opgebraucht an d’Ren-
tereserven ugeknabbert.

Oft, wann een dem Premier a munche vu
senge Ministeren esou nolauschtert, mengt
een, si wélten tatsächlech eppes besser
maachen: D’Madame Jacobs huet den
Term „selektiv“ schonn an de Mond geholl;
den Här Krecké schwätzt dovun, d’Kompeti-
tivitéit ze verbessern; den Här Biltgen wëllt
sécher méi Leit an Aarbecht bréngen; an
den Här Frieden wëllt och d’Statsfinanzen

ofsécheren. Dat Wonschdenke wëlle mir
duerfir och guer net a Fro stellen, mä dee
Wonschconcert do hält allenfalls a Sonn-
desrieden d’Strooss. Mat enger reeller a fir
d’Bierger positiv spierbarer Politik huet dat
awer näischt ze dinn.

Dem Premier seng Wierder vum 12. Oktober
2005 kënne mir mat zwou Hänn ënner-
schreiwen. Deemools sot hien hei am Haus:
„Eisen Usproch, eis Ambitioun fir déi nächst
Zäit an déi Zäit no der nächster Zäit ass
kloer. Mir brauche Modernisatioun do, wou
mer net virukommen, a Remoderniséierung
do, wou mer amgaang sinn zrëckzefalen.
Innovatioun, Transformatioun, Integratioun:
Ronderëm dës Begrëffer organiséiere sech
d’Modernisatioun an d’Remodernisatioun.
(...) D’Objektiv ass et, déi kuerz- a mëttel-
fristeg Kompetitivitéit vun eiser Wirtschaft
méi solidd ze maachen an hir Stärkten ze
notzen, fir d’sozial Solidaritéit an de sozialen
Zesummenhalt iwwer Jorzéngten, dat
heescht och a grad fir déi nei Generatioun,
méi nohalteg staark ze maachen.“

Et gesäit een, datt d’Kommunikatioun an
d’Rhetorik wuel stëmmen. Mä d’Wierklech-
keet ass eng aner, a ganz oft komme mer
net iwwert déi blouss Rhetorik eraus. An dat
ass et, wat d’Bierger am meeschten ent-
täuscht. Et gëtt a Wierklechkeet net vill zum
Bessere geännert. Dat, wat schlecht leeft,
gëtt elo wéi an engem alen Auto gefléckt.
D’Raschtflecke ginn iwwerpinselt, an iwwer-
all do, wou op de Sëtzer de Stoff ofgenotzt
war, gëtt en nei iwwerzunn. Mä d’Rascht-
flecken iwwerpinsele geet an den Ae vun
der DP net duer.

Wou hu mir da bis elo moderniséiert a remo-
derniséiert? War et net esou, datt mer
duerch äusserlech Zwäng dozou gezwonge
gi sinn, wa mir emol eppes geännert hunn?
War et net esou, datt mir méi oft duerch
Bréissel Bee gemaach kruten, wéi datt mir
selwer d’Zepter an d’Hand geholl hätten an
eppes moderniséiert a remoderniséiert hät-
ten?

Ass d’Regierung wierklech der Meenung,
datt mir mat der Verschiebung vun den In-
dextranché genuch fir d’Kompetitivitéit vun
eise Betriber gemaach hunn? D’Banque
centrale kënnt jiddefalls zu enger anerer
Konklusioun.

Wëllt d’Regierung wierklech net dofir suer-
gen, datt d’Geschäfte hei am Land hir Die-
re kënnen opmaachen, wann d’Leit wëllen
akafe goen?

Wou bleift d’Simplification administrative?

Wéini kënnt den neien Aktiounsplang fir de
Mëttelestand?

Wéi vill Leit hu sech da bis elo scho getraut
a sinn hiren eegene Patron ginn?

Wéi kréie mer eis jonk Leit esou forméiert,
datt se eng vun deene ville geschafenen
Aarbechtsplaze kënnen unhuelen?

Si mer wierklech no zwee an en halleft Joer
CSV-LSAP besser ginn? Hu mer eis besser
op d’Zukunft virbereet? Hu mer schonn alles
gemaach, wat ze maachen ass, oder si mer
den einfache Wee gaangen an drécken
d’Problemer virun eis hir?

Et bleift dëser Regierung nach zwee an en
halleft Joer fir konkret Politik kënnen ze ge-
stalten. Dës Zäit muss och genotzt ginn. Mir
däerfen eis elo op kee Fall bis no den
nächste Wahle vertagen. Dës Zäit huet Lët-
zebuerg net!

D’Demokratesch Partei hëlleft gären dobäi
mat, wann et drëms geet, d’Zukunftschancë
vun de Mënschen hei am Land ze verbes-
seren.

Fir datt och déi Jonk mat rouegem Gewës-
sen an de Rentensystem kënnen abezuelen!

Wa mir eis kloer Ziler an der Familljepolitik
setzen!

Fir datt och an Zukunft Krankheet net Aar-
mut heescht!

Wann de Courage, sech selbststänneg ze
maachen, nees belount gëtt!

Wann d’Prozedure solle vereinfacht ginn, fir
datt d’Administratiounen nei Chancë kën-
nen opmaachen!

Fir eis oft verstëbste Gesetzter der gesell-
schaftlecher Realitéit kënnen unzepassen!

Fir datt de Wee op d’ADEM nees mat Hoff-
nung an net mat Frustratioun verbonnen
ass!

Fir datt déi kommand Generatioune mat um
Dësch sëtzen, wann haut d’Finanz- a Bud-
getspolitik definéiert gëtt!

Fir wierklech schnell méi Wunnengen ze
bauen, an domadder wunne kee Luxus méi
ass!

Fir eis Schoul nei auszeriichten, datt se eng
Äntwert gëtt op déi sozial, wirtschaftlech a
gesellschaftlech Realitéiten, eng Schoul,
déi de Schlëssel ass zur Réussite!

Zéng Aktiounsfelder, op deene vill Aarbecht
op d’Politik waart. Zéng Aktiounsfelder, wou
mir an deene kommenden zwee an en hal-
left Joer nach villes kënne bewegen.

Wann d’Richtung stëmmt, da fannt Dir an
der Demokratescher Partei e responsabele
Partner. Wann d’Richtung stëmmt, da wäert
och déi gréissten Oppositiouspartei
d’Äerm eropstréppen, fir eist Land op d’Zu-
kunft ze preparéieren.

Nun ass am Budget fir d’Joer 2007 awer
keng kloer Richtung ze erkennen. Et gesäit
een net, ob d’Regierung bereet ass, déi ver-
bleiwend Zäit ze notzen, fir weider wichteg
Struktureformen op de Wee ze bréngen. Et
huet een net d’Impressioun, wéi wa sech
d’CSV an d’LSAP ëmmer esou eens wären,
wouhinne et soll goen. Et huet ee manifes-
tement d’Gefill, wéi wann d’Politgewerk-
schaften a béide Parteien op der Brems géi-
fe stoen.

Wann Dépensen einfach emol op déi kom-
mend Generatiounen ofgewälzt ginn, d’Pro-
blemer um Bockel vum Steierzueler geléist
ginn, a wichteg Struktureforme leie blei-
wen, bis et ze spéit ass, dann ass dat dee
Wee, deen d’Demokratesch Partei net ka
matgoen.

Eng Regierung, déi duerch Hëlleflosegkeet
a Fantasielosegkeet bestécht; eng Regie-
rung, déi reagiert amplaz ze agéieren; eng
Regierung, déi net de Courage huet, och
onbequem Wourechten anzegestoen, esou
eng Regierung kritt keng Opbrochsthëm-
mung hei am Land verbreet.

Dëse Budget léist dem Land seng Proble-
mer net. Dës Politik ass eng schwéier Hypo-
théik op d’Zukunft, well mir haut riskéieren,
d’Zukunftschancë vu muer ze verschwilen. An
duerfir, Här President, wäert d’Demokra-
tesch Partei dësem Budget net zoustëm-
men.

Ech soen lech Merci fir d’Nolauschteren.

» **Plusieurs voix**.- Très bien!

» **M. le Président**.- Merci, Här Meisch.
Nächste Riedner ass den honorabelen Här
Fayot. Här Fayot, Dir hutt d’Wuert.

» **M. Ben Fayot** (LSAP).- Här President,
ech wollt och am Numm vun onser Fraktioun
dem Budgetsrapporteur ons Unerkennung
ausdrécke fir seng Analysen, déi oft wich-
teg a richtig sinn, fir seng Visiounen wäit no
vir, an och fir seng Iddien, déi mer gär dis-
kutéieren, besonnesch seng perséinlech Id-
dien, déi en an dësem Rapport ausgedréckt
huet.

Här President, déi europäesch Währung
huet gemeinsam Regeln an der Eurozon
mat sech bruecht. Déi Regeln erlaben ze
zielen, wéi vill Sue mer erakréien a wéi mer
se ausginn. Mir kënnen ons Finanzsituatioun
mat där vun den Eurolänner vergläichen, an
d’Zil ass et, den Defizit an d’Schold ze be-
grenzen.

Nach hu mer zwee Systemer fir de Budget.
Dat ass net kloer, weder fir d’Politik nach fir
d’Bierger. Dofir ass d’LSAP mat der Dé-
marche vun der Finanzkommissioun d’ac-
cord, fir no enger Iwwergangszäit vun dräi
Joer, vun 2007 un, een eenzege Budget
nom Système européen des comptes ze
verlaangen. Et gëtt dogéint nëmmen tech-
nesch - keng politesch - Awänn. Mir droen
dofir déi gemeinsam Motioun, déi déi ver-
laangt, mat.

D’Fuerderung no engem eenzege Budget fir
d’Gesamtausgaben an -einnahme vum Stat
an all deenen öffentlechen Institutiounen
ass eng weider wichteg Etapp op dem Wee
vu méi Transparenz a Rigueur. Dozou ge-
héiert d’Kontabilitéitsgesetz vun 1999, déi
nei Cour des Comptes, d’Schafung vun en-
ger Commission du Contrôle de l’exécution
budgétaire an der Chamber an déi nei Pro-
zedur fir massiv Kreditiwwerschreidungen
ze verhënneren, déi mer d’nächst Woch hei
initiéieren.

Méi wichteg wéi d’budgetär Technicitéit ass
dat politesch Zil, datt hannert de gemeinsa-
me Budgetsregele stécht. Déi gemeinsam
Währung vun zwielef EU-Länner soll stabil a
staark sinn. D’Inflatioun soll bekämpft ginn.
Wa se an d’Luucht geet, setzt d’Zentralbank
d’Zësen erop. D’lescht Woch, de 7. De-
zember, op 3,5%. Dat concernéiert ons
Wirtschaft, ons Importer wéi ons Exporter,
mä och all Leit, déi Präten oder Spuerbicher
hunn.

Et gëtt Politiker, déi déi Zëspolitik vun der
Zentralbank bedauern. Si mengen, dat géif
den Élan vum Wirtschaftswuesstum brem-
sen. Si fannen déi Politik ze vill enk. Dëst
ass besonnesch de Fall a Frankräich, vu
riets no lénks iwwert d’Mëtt. Soulaang wéi
mer awer keng gemeinsam Wirtschaftspoli-
tik an der Eurozon hunn, ass déi Währungs-
politik richtig.

Lëtzebuerg - ech erënneren drun - hat ni
eng eege Währung. Et konnt d’Währungs-

politik ni fir seng Wirtschaftspolitik asetzen,
wéi zum Beispill fréier Frankräich oder Ita-
lien. Do ass d’Geld entwäert ginn, an do-
duerch kruten déi Länner e kompetitiven
Avantage, ouni en eegenen Effort ze maa-
chen. Verschidde Leit a Frankräich dree-
men nach haut dovunner.

Lëtzebuerg huet seng Konkurrenzféegkeet
ëmmer duerch eng héich Produktivitéit vu
sengen Aarbechter a Beamten, de soziale
Fridden, politesch Stabilitéit an den Dyna-
mismus vu senge Betriber erreecht, net
duerch Geldentwärtung.

Mir si grad wéi déi aner Länner an Europa,
déi aner Länner vun der Eurozon an enger
niddreger Inflatioun interesséiert, déi d’Zen-
tralbank duerch hir méi restriktiv Zëspolitik
verfollegt. Dës erhält d’Kafkraaft beson-
nesch vun de klengen Akommessen. Et ass
aus soziale grad wéi aus wirtschaftlechen
Ursaache wichteg, d’Präisser grad wéi
d’Taxen am Grëff ze behalen.

Här President, d’Budgetsentwécklung an
d’Budgetszuele weise vu Joer zu Joer, wéi
déi politesch Prioritéiten ausgesinn.

Verglach mat de Joren 2002 bis 2006 ass
eng Prioritéit am Budget 2007 d’Straffung
vun den Ausgaben. Dat verlaangt Sacrificer
vun de Leit. Et verlaangt och eng konse-
quent Haltung vun Stat: E muss méi selek-
tiv virgoen, méi effikass schaffen a säin Train
de vie duerno ausrichten.

Wesentlech Prioritéite leien op dem Kampf
géint de Chômage an op der Beschäfte-
gung, op Schoul a Bildung, op Fuerschung
an Innovatioun. E wichtigen Akzent ass déi
finanziell Maîtrise vun der öffentlecher Kran-
ken- a Fleegeversécherung, ouni Ofbau.

Eng weider Prioritéit läit op dem öffent-
lechen Transportwiesen. Ons Kyoto-Enga-
gementer sinn Investissementer an d’Ëm-
welt fir d’Generatiounen no ons. Ons
Entwécklungshëllef soll de Mënschen an
den Entwécklungslänner Perspektive fir
sech doheem opmaachen. D’Investisse-
menter zu Lëtzebuerg bleiwen op engem
héijen Niveau.

Här President, de Statsminister huet a sen-
ger Ried leschte Mëttwoch vum Bléck no
hannen, vum Bléck no vir a vum Bléck ron-
derëm geschwat. De Bléck no vir ass wuel
néideg. Kyoto an de Kampf géint d’Aarmut
an enger Welt, déi zesummewiisst, weisen
dat. D’Problemer vun de Leit vun haut dærf-
fen dobäi net vergiess ginn.

De Bléck no vir dærf keng Entschëllegung
sinn, fir ze trätelen. Munch Visionären, déi
30, 40 Joer virauskucken a grouss Projete
fir muer an iwwermuer entwerfen, vergies-
sen d’Drénglechkeet, d’Urgence vun haut.
Eng Schoul, déi haut gebraucht gëtt, dærf
keng zéng Joer brauchen, fir gebaut ze
ginn.

Mir wollten de Konferenzcenter um Kierch-
biereg fir d’Présidence vun 2005 fäerdeg
kréien. Elo musse mer zidderen, ob e fir déi
nächst Présidence 2015 fäerdeg gëtt. Et
ass net akzeptabel, dass ons Nationalbiblio-
théik oder ons Nationalarchiven a miserabe-
le Konditiounen iwwer Jorzéngte schaffe
gelooss ginn. An niewebäi gesot, dës Insti-
tutioune si fir ons Identitéit méi wichteg, wéi
eng Diskussioun iwwer en neien, ale Fändel.

De Bléck no hannen ass sécher instruktiv.
Wat onsen heitegen Defizit ugeet, verstënn
ech, dass d’offiziell Liesaart fir d’Entstoe
vum Defizit vun 2002 un déi ass, dass d’Sta-
bilisateurs automatiques spille gelooss gou-
fen. Dat steet elo offiziell am Stabilitéits-
plang.

Woubäi ee sech d’Fro stelle muss, wéi mer
iwwerhaapt an enger oppener Economie
d’Konjunktur mat onse relativ bescheidene
Mëttele beaflosse kënnen. Egal wat een do-
zou menge kann, dærf keng Regierung an
Zukunft de Budgetsdefizit esou aus dem
Rudder lafe loossen, wéi dat zwëschent
2002 an 2005 geschitt ass.

A schliesslech, de Bléck ronderëm ass obli-
gat fir e klengt Land wéi Lëtzebuerg, deem
seng Währung, seng Wirtschaft, seng ganz
Existenz vun der Gesondheet an der Stabi-
litéit vun der Europäescher Unioun ofhän-
ken.

Wesentlech bleift awer och de Bléck op
haut. Et geet ëm d’Besoinë vun de Leit vun
haut. Et geet ëm d’Zukunftsängschte vun
der Jugend vun haut. Dat huet sécher
näischt mat der Hand an de Mond ze dinn.
Dat heescht, schnell a permanent op d’Be-
soinë vun haut ze reagéieren.

Sécher ass de Wuelstand zu Lëtzebuerg
reell. D’Ëmverdeelung fonctionnéiert. De
Sozialstat erfëllt déi héchsten Uspréch.

Mä d’Mënsche vun haut si mat neie Proble-
mer konfrontéiert. Wunnen ass esou deier
wéi nach ni. Eng Schaff ass vill manner liicht
ze fannen. D’Leieren ass am Ëmbroch. Eng
Famill grënnen an zesummenhalen ass haut

manner evident wéi jee. Kanner erzéien ebenfals.

Et gëtt nei a wäit verbreet Risike wéi Aarmut an Exklusioon, Isolatioun an Elengsinn, Iwwerscheldung, Drogen, Onsécherheet a Gewalt, Récksiichtslosegkeet an Intoleranz. All Generation huet hir spezifesch Problemer. Mir kënnen duerfir net jorelaang waarden, fir déi nei Problemer unzegoen.

Oft ass d'Politik ze lues an der Reaktioun an ongenügend an der Previsioun. An der Schoul zum Beispill hu mer jorzéngtelaang gemengt, d'Kannerzuel géif erofgoen. Mir hunn net genuch Schoule gebaut an net genuch Enseignanten age stellt. D'Kanner vun haut mussen elo direkt eng Schoul kréien, déi hire Besoinen entsprécht. Si kënnen net waarden, bis d'Politik hir Schouldiskussioun ofgeschloss huet.

Dohier onst Onverständnis, wann eng Lëtzebuerger Bildungspolitiklerin an enger Motion vun dëser Chamber verlaangt, et misst elo emol gewaart ginn, bis eppes an der Schoul geschitt.

Här President, et ass an den 80er an 90er Joren, an de Jore vu rasanter wirtschaftlecher a finanzieller Entwécklung, gäre gesot ginn, de Stat wär allgéigewäerteg, e misst zrëckgestutzt, méi schlank ginn. Haut gesi mer, dass dat falsch war an ass.

D'Realitéit zu Lëtzebuerg verlaangt nom Stat. Eng Bevëlkerung mat enger Halschent Lëtzebuerger an enger Halschent Netlëtzebuerger, eng Wirtschaft an engem globale Wettbewerb, e Land konfrontéiert mat dem Awunnerzeenario a puncto wunnen, Transport, Infrastruktur vun all Zort, Aarbechtslosegkeet, Ëmweltschied: Déi Erausfuerderunge kënnen net iwwert d'Privatinitiativ oder d'Liberalisatioun vu wesentleche Services geléist ginn.

Dofir brauche mer e moderne Stat mat der Haaptmissioun, déi sozial a wirtschaftlech Kohäsion zu Lëtzebuerg ze garantéieren. An der globaler Logik vun der Maartwirtschaft muss een d'Wärter vu kollektiver Solidaritéit a Verantwortung duerstellen. An dësen Zäite mussen de Stat an d'öffentlech Hand insgesamt staark bleiwen.

De Stat brauch Suen, fir ze fonctionnéieren. Déi kritt en an der Haaptsaach aus Steieren a Bätträg. Duerfir muss hie seng Steuerbasis erhalen, a jiddferree soll senge Méiglechkeeten no bezuelen. Mä e muss zugläich seng Steuerlaascht op déi vun de Konkurrenten ofstëmmen, an duerfir muss Europa sech géint de Steierdumping staarkmaachen.

D'Gläichgewicht zwëschen dem individuellen Akomes an der gesamter Steuerlaascht ass schwiereg. Jiddferreen hätt gär esou vill wéi méiglech Suen an der eegener Täsch. En hätt awer och gär gutt öffentlech Déngschter, eng anstänneg Pensioun, eng performant Krankekeess.

Duerfir sinn d'Zilsetzunge vun engem modernen Sozialstat Chancéglichheet, Bekämpfung vun der Aarmut, Recht op eng dezent Wunneng, Schutz am Krankheitsfall. Mä och de Kader vun enger moderner a performanter Wirtschaft schafen an d'Erhale vun enger gesonder Ëmwelt ugoen.

De moderne Stat muss och effikass, onbürokratesch a bürgerorientéiert sinn. E muss flexibel un nei Aufgaben erugoen. Dat ass net onproblematesch.

De Stat kritt reprochéiert, oniwwersiichtlech ze wucheren. Effektiv schafft en ëmmer nei Établissements publics, souguer Privatgesellschaften. Déi Instrumenter kënnen llicht aus der Budgetsdisziplin lafen.

De Problem ass, dass den eigentleche Stat oft onflexibel ass. Et huet jorelaang gedauert bis d'Techniques de l'information et de la communication sech am Lëtzebuerger Stat duergesat hunn. D'Schwieregkeet vun der Equatioun ass, op déi nei Aufgabe schnell ze reagéieren, ouni iwwerméisseg nei Strukturen um Bord vum Stat ze schafen.

De moderne Sozialstat muss och selektiv, méi selektiv sinn. Vill vun den Ëmverdeelungsmechanismen zu Lëtzebuerg sinn net selektiv. Den Index ass net sozial selektiv. D'Steieren ëmmer manner. Déi kleng Akommessen hunn näischt vu Steiererlicherungen, well se keng Steiere bezuelen.

D'Tripartite huet gesot, d'Désindexatioun vum Kannergeld wär sozial gerecht ausze gläichen. Deen Ausgläich ka wuel a Form vun Zoulagen oder Entlaaschtunge gescheien, mä wat fir Ausgläicher? Et gëtt vu Crédit d'impôt geschwat. Wat ass dat dann? Kënne mer dann endlech emol klären, wat dat heescht?

Vill méi wichteg ass awer a mengen Aen den Ausgläich duerch öffentlech Déngschtleeschungen vun der beschter Qualitéit fir jiddferreen. D'Chancéglichheet an der Schoul an e gudden Encadrement ausser-

halb der Schoul stellen e sozialen Ausgläich duer, besonnesch fir Kanner aus manner gutt situéierte Milieuen. Öffentlech Altersheime a Kliniken, öffentlech Infrastrukturen, öffentlech Déngschtleeschungen, d'Solidaritéit duerch e Pensiounssystem mat der Repartitioun vun de Chargen téschent de Generatione schafe sozial Cohésion a Gläichheet.

De Budgetsrapporteur huet hei länger Ausfuerungen iwwert d'Entwécklung vum Pensiounssystem zu Lëtzebuerg gemaach. Hei gesäit hien éischter d'Leisung an engem Kapitalisatiounssystem wéi an dem Umlagesystem, an hie fuerdert den Ausbau vun Zousazpensiounen.

Mir hu säit 1999, ech erënneren lech drun, e Gesetz iwwer betriblech Zousazpensiounen. Et wär emol interessant ze wëssen, wéi dann de Bilan dovunner ass. Et wär interessant ze wëssen, wéi d'Leit op déi Méiglechkeeten, déi an deem Gesetz sinn, reagéiert hunn. Insgesamt, muss ech awer soen, ass meng Partei der Meinung, dass deen heitege System, deen op dem Generationevertrag berout, sozial gerecht ass a jiddferengem et erlaabt, eng anstänneg Pensioun fir seng Retraite ze kréien.

Wa mer et net fäerdeg bréngen oder wa mer et net fäerdeg bréngen kënnen oder net wëllen, dass sozial Gerechtegkeet a gläichen Zougang fir jiddferreen zu gudden öffentlechen Ofseicherungssystemer an Déngschtleeschungen bestinn, da muss mer wëssen, op wat mer erausginn, da verschafen déi, déi sech et leeschte kënnen, dat heescht déi, déi d'Revenuen dofir hunn, sech Privatschoulen, Zousaz- an aner Pensiounen, Privatsécherheet a Privatkliniken. An esou eng Entwécklung, Här President, ka meng Partei op jidde Fall net matdroen.

Här President, am Budget 2007 fanne mer d'Objektiver vu sozialer Cohésion erm. Et gëtt kee Sozialofbau zu Lëtzebuerg, et gëtt keng konfiskatoresch Steuerpolitik, och wann d'Steierlaascht an der Akomessteuer weinst der Netupassung vum Barème säit 2002 an d'Luucht gaangen ass. Et gëtt kee Réckzuch vum Stat an de Gemengen aus den öffentlechen Déngschtleeschungen. Et gëtt weider eng héich Investitionsquot, besonnesch fir d'Schoul, fir d'Altersheimer a fir d'Kliniken. Weider Efforté muss fir den Encadrement vun de Kanner gemaach ginn. De Sozialstat muss weider ausgebaut ginn. Et gëtt scho vill flexibel Mëtelen, fir ze hëllefen.

D'Regierung ass ëm d'Kompetitivitéit vun de Betriber beméit. Si ass ëm Innovatioun a modern Infrastrukture beméit. Dat verhenert net, dass de Stat de finanziellen Equilibre siche muss. En dierf sech net endlos verschelden. Deen Equilibre ass nach net erreecht. En ass um Wee dohin.

Dem eigentleche Stat feelen 2007 991,8 Millione bei Gesamtausgabe vun 10,1 Milliarden. D'Bruttoschold vun Land geet erop op 9,9% vum PIB, also bal 10%. Si wäert an de kommende Joren nach weider klammen, well d'Reserven an de Fongen déi héich Investissementer, déi mer a verschiddene Beräicher wëllen hunn, net méi bezuele kënnen. Fir d'Investissementsfonge bleiwen Enn 2007 507 Millioune, géint 2,6 Milliarden am Joer 2001. Mat de verleienden Engagementer sinn d'Fongen Enn 2008 eidel.

Eng wesentlech Tatsaach ass net ewechzeleegnen. Et geet dem Lëtzebuerger Stat manner gutt wéi virun 2002. Dat ass eng laang Tendenz, déi eréischt 2009 opgehale soll ginn, hoffentlech.

D'Regierung huet dës Situatioun am Oktober 2005 dénoncéiert. D'politesch Majoritéit, déi d'Regierung dréit, war d'accord ze spueren, awer am Zesummespill mat de Sozialpartner, net vun uewen erof. D'Regierung huet am Abrëll 2006 mat de Sozialpartner en Accord fir e Spuerpak fonnt. D'Sozialpartner waren an der Tripartite am Abrëll 2006 d'accord fir dem Stat ze hëllefen, 400 Millioune Euro ze spueren.

E Spuerpak, dat si Mesuren, déi net eenzel, mä als Ganzt gesi mussen ginn. Dat ass d'Method vun der Tripartite, en Ausgläich téschent Interessen a soziale Kräften. D'Tripartite huet a schwiereger Zäit eng Situatioun débloquent. Wéi d'Pétrolspräisser fortgelaf sinn, huet d'Indexmodulatioun Rou an der Präisbewegung bruecht. Si huet d'Orientéierung fir d'Bekämpfung vum Chômage ginn. Si ass deenen neien Erausfuerderunge vu Kyoto begéint. Si huet d'Ausgabe vun der Fleegeversécherung fir de Stat gebremst. Si huet de Statut unique fir d'Salariat an Aussicht gestallt.

Dat war en Duerchbroch an dat huet d'Politik zu Lëtzebuerg weiderbruecht. Dat huet schwiereng sozial Ausenanersetzunge gespuert, huet der Wirtschaft Rou bruecht, huet gewisen, dass d'Participatioun vun de soziale Kräfte keen eidelt Wuert ass.

Dat ass nach net ganz duergestant. Mir stëmmen de Projet 5611 virun Enn des Joers, fir dass de Budget 2007 vum Accord an der Tripartite profitéiere kann. Dëse Projet betrëfft de Kampf géint de Chômage, mä och d'Ëmweltpolitik an Aspekter vun der Sozialversécherung.

Mir stëmmen de Projet 5611, fir dass d'ADEM schnellstens hir individuell Betreuung vun all Chômeur ausbaue kann. Keen Dag dierf dobäi verluer goen, wann déi Mesurë vum 1. Juli 2007 un asetzen a gräife sollen.

Mir stëmmen domat och de Kader fir de Maintien dans l'emploi, dee bei Ëmstrukturéierungen an der Wirtschaft virbeugend den Iwwergang an eng aner Beschäftegung ouni Passage an de Chômage erméigleche soll.

Et bleift de Statut unique. D'Schafung vun engem eenzege Salariatsstatut fir Aarbechter a Beamten ass eigentlech déi eenzeg strukturell Reform, déi an der Tripartite ofge-seent gouf.

Mir wëssen, dass d'Regierung all Efforté mécht, fir dat esou schnell wéi méiglech ëmzesetzen. Et gëllt e Kalenner bis November 2008 ze respektéieren. Dofir ass de Stéchdatum vum 31. Dezember 2006 e wichtegen Datum fir de soziale Friden zu Lëtzebuerg. Mir ënnerstëtzen d'Ministere Biltgen an Di Bartolomeo bei där schwieriger Missioun, Patronat a Salariat op eng Léisung anzeschwieren, déi dës epochal Neierung ouni weider Belaaschtunge fir d'Betriber erméiglecht.

Här President, am September-Oktober 2006 ass et och lues a lues kloer ginn, dass d'Einnahme vum Stat am Joer 2006 ënnerschat gi waren. Am Bericht vun der Cour des Comptes zum Budget gëtt annoncéiert, de Stat géif 2006 700 Millioune Euro méi u Steieren eranhuele wéi virgesinn. Wann déi dann erakommen, wann dat effektiv esou wäert sinn, solle mer onser Meinung no déi Sue fir d'Sanéierung vun den Investitionsfongen an Zukunftsaufgabe gebrauchen, grad ewéi d'Arcelor-Millioune, wéi dat vun der Regierung décidéiert ginn ass.

Här President, d'Steierschrau bleibt en Haaptinstrument vun der Politik. De Budgetsrapporteur huet fir de Finanzsektor geschwat, wéi hien d'Ofschaffung vum Droit d'apport verlaangt huet. Hien huet fir d'Wirtschaft geschwat, wéi hien e Geste op der Besteuerung vun de Betriber gefuerdert huet.

De Finanzminister huet an der Chamber d'lescht Woch ze de Steieren Zeeche gesat - loosse mer et emol esou nennen. Et misst een - ech verfolge säi Rasonnement - e kritesche Bléck op d'Steierlandschaft werfen. Bei der Betribssteuer wäer mer am internationale Ranking zréckgefall. Taxe d'abonnement, Droit d'apport, Kollektivitéitssteuer, do soll un eng - ech zitéiere wuertwärtlech - „cibléiert Ofsenkungspolitik an de kommende Joren“ geduecht ginn, mä et soll een och ëmmer un d'Lach denken, dat am Budget ass.

Hien huet dann an deenen Iwwerleeungen alldéngs och dat ekologescht Element ginn, wat ons och bei de Steierinstrumenter ëmmer méi wichteg schéngt, fir déi Ziler ze erreechen, déi mer ons och op deem Plang gesat hunn.

Bei der Akomessteuer sollt d'Belaaschtung 2008-2009 iwwerduecht ginn. Wann eng Adaptatioun vum Barème kënnt, sot de Finanzminister, soll fir déi, déi keng Steiere bezuelen, e Steierkredit an d'A gefaasst ginn, dat awer keng Negativsteuer soll sinn. Dat ass sécher gerecht am Usaz, am Iwwerleeën; d'Fro ass just, wéi dat praktesch soll geschéien.

De Barème soll also un d'Deierecht ugepasst ginn, a mir wëssen och, dass d'Betriber an de Finanzsektor an enger schwieriger Konkurrenzsituatioun sinn, well ëmmer méi Länner ronderëm ons Avantagen ënnerbitten. Mä nach eng Kéier: Wa mer un der Steierschrau dréien, mussen mer d'finanziell Basis vum Stat a behalen. Mir waarden also elo, no deenen Aussoe vun der leschter Woch, op prezis Propositione vun der Regierung, fir dës schwiereng Equatioun ze erreechen.

Ech wëll och nach e Wuert iwwert d'Lëtzebuerger Quellesteier fir d'Résidentë soen. Mir hunn den 21. Dezember 2005 hei de Projet 5504 gestëmmt, fir eng Quellesteier op Kapitalertrag anzeféieren an d'Vermögenssteuer fir Persounen ofzeschaffen. Am Budget 2006 sinn dofir 40 Millione Recettë virgesinn; am Budget 2007 25 Millioune. Der Steiervverwaltung no sollen dat der 2006 nëmmen 18 Millione ginn. Dat erklärt déi niddreg Previsioun fir 2007.

D'Chamber hat deemools eng Motioun gestëmmt, an där se gefrot huet, d'Auswier-

kunge vum Gesetz Enn 2006 ze evaluéieren. Et soll ënnersicht ginn, ob de Fräibetrag vun 250 Euro duer géif goen, fir déi kleng Spuerer vun der Quellesteier ze befreien. Et war och gefrot ginn, fir eventuell eng Gesetzesännerung virzeleeën. Ech wollt dofir d'Regierung froen, ob se Erkenntnisser an där Hisiicht huet, an ob se aus deenen Erkenntnisser Konklusione wëllt zéien.

Här President, ech wollt méi genee op zwee Problemer agoen, an zwar op d'Schoul an op de Logement, woubäi ech natierlech d'Aarbechtsmaartpolitik net vergiessen.

Vläicht eng Remarque wat d'Chamberaarbecht zum Budget selwer ugeet: Ech hu keen Avis vun iergendenger Kommissioun iwwert déi sektoriell Budgete gesinn. Mä niewent der allgemenger Finanzanalys vun der Finanzkommissioun schéngt de Budget an deenen anere Kommissiounen weider keen Thema gewiescht ze sinn. Ech hunn op jidde Fall keen Avis gesinn. Ech fannen dat schued, well d'Budgetspolitik muss jo an den eenzelne Beräicher och déi allgemeng Orientatioun confirméieren.

Kuerz e Wuert zum Chômage, op dee mer d'nächst Woch ausfuerleech zréckkommen. De Chômage geet 2007 net entscheidend erof. Wéi d'Regierung selwer am Budget seet, d'Politik vun der Regierung kascht 2006 401 Millioune, an 2007 402 Millioune. Et ass fir den Ablack net ze iwwerkucken, wéi vill d'Ëmsetzung vum Gesetz 5611 kaschte wäert, fir déi zéng nei Mataarbechter agestallt ginn an eng Rei Mesurë virgesi ginn, fir d'Sich no enger Schaff méi effikass a méi individuell ze maachen. Mir komme bei der Diskussioun iwwert de Projet 5611 dorobber zréck, dofir wëll ech dës wichteg Prioritéit vun der Regierung elo net verdéiwen.

Dofir just déi zwee Punkten: engersäits de Logement an anersäits d'Schoul. De Logement fir d'éischt. Do seet d'Regierung an hire Commentaires, dass de Gros vum budgetären Effort nach net 2007 ze spieren ass, mä eréischt kënnt, wann de Wunnengspakt mat de Gemenge virläit. Et gëtt awer och do eng Drénglechkeet, eng Urgence. Hei geet et net ëm d'Zukunft, ëm grouss Visiounen fir an zéng oder 20 Joer; et geet ëm haut.

Et kann net akzeptéiert ginn, Här President, dass eng ganz Generatioun vu jonke Leit a Stéit duerch d'Spekulatioun an de Mangel un öffentlecher Interventioun sech e Liewe laang héich verschelde muss, fir en Eegehëm ze kréien. Ech mengen, et muss méi schnell gehandelt ginn, an et muss géint d'Spekulatioun op Haiser, Terrainen a Lotissementser virgaange ginn.

De Regierungsprogramm ass zu deem Thema ganz explizit. Och d'Dokumente vum zoustänneg Ministère fir d'Tripartite. Et gëtt also kee Grund, fir net schnell déi néideg Gesetzgebung op de Wee ze bréngen.

D'Ursaache fir d'Wunnengs- a Baulandnout si bekannt: Weder de Stat nach d'Gemengen hu substanzuell Grondstéckreserven. Privatpromoteuren hu massiv Terrainen opkaaft; Terraine ginn aus Spekulationsgrënn zréckgehalen; d'Gemengen- a Statsautorisatiounen daueren ze laang.

Well nach ëmmer kee Projet iwwert de Pacte logement mat de Gemenge virläit, ass et schwéier, iwwert de Präis vun de Mesuren am Budget ze schwätzen.

Mir mussen Méiglechkeete fir de Stat an d'Gemenge schafen, fir op deem Gebitt aktiv ze ginn. D'Gesetz iwwert d'Enteengnung duerch Stat a Gemenge fir öffentlechen Notze muss geännert ginn. Et kann een d'Baugelot aféieren, fir dass d'Terrainen an engem Lotissement bannen enger Zäit bebaut mussen ginn. D'Emphytéose soll verallgemeinert ginn. D'Virkaftsrecht vun de Gemengen a vum Stat beim Verkaf vu Bauland ass eng effikass Mesure géint d'Präisdreiwerei. D'Modulatioun vun der Grondsteuer fir Baulücken am Baupermeter ass eng aner Mesure, déi hëllefe kënnt, Bauland op de Maart ze bréngen.

Et gëtt gesot am Commentaire vum Budget, de Budget vun deem Departement géif hëllefen, d'Präisser vun Terrainen an Haiser ofzedrécken oder ze stabiliséieren. Ech weess net, wou dat am Budget ze fannen ass. Déi Hëllefe fir d'Gemengen, déi op zéng Millione pro Joer geschat ginn, sollen eréischt 2008 asetzen an hu keng Inzidenz

op de Budget 2007. Insgesamt ginn déi Dépenses courantes vum Logement kaum erop a bleiwe bei 57 Milliounen.

Méi zolidd ass allerdéngs d'Augmentatioun bei den Dépenses en capital, déi op 42 Millioune steigen, vis-à-vis vun 38 Milliounen 2006 a 25 Milliounen 2005. Dat sinn all déi Hëllefen, déi duerch vireg Gesetzer am Wunnengsbau geschaf goufen an déi verstärkt an Usproch geholl ginn.

Ech hunn de Statsminister gehéiert en Op-ruff un d'Propriétairë maachen, hiert Bauland zu engem anstännege Präis ze veräusseren. Dat ass sécher gutt gemengt, wärt awer kaum op oppen Ouere bei de Speculateure falen. Onse Kolleeg Michel Welter...

» **Plusieurs voix.** - Oooohh!

» **M. Ben Fayot (LSAP).** - Onse Kolleeg Michel Wolter huet verlaangt, d'Regierung soll Bauterrain opkafen an zu engem anstännege Präis op de Maart bréngen, fir d'Präisser ze drécken. D'Regierung kann awer déi Terrainen net zu egal wat fir engem Präis kafen. Dat wär héchstgeféierlech a géif d'Spekulatioun nach weider unheizen.

De Bericht vum Ministère du Logement fir den État de la Nation vun 2006 seet zwar, dass d'Zuel vun den autorisiéierte Wunnen-gen 2005 ëm 19,7% vis-à-vis vun 2004 eropgaangen ass. Dat ware 4.692 Unitéiten. Wann een a Rechnung zitt, dass vun der Autorisatioun bis zur Realisatioun zwee Joer verginn, da këntt een - esou sot de Bericht - fir 2006 eng Stabilisatioun vun de Präisser erwaarden. Wann dat dann antriede géif, wär et op jidde Fall eng Stabilisatioun op engem héije Präisniveau.

Ech muss lech soen, dass ech allerdéngs do éischter skeptesch sinn, dass dat esou séier geet. Ech kréie vu Leit vum Fach gesot, dass villes am Tube ass an och villes - PAGen, PAPen - duerch kompliziéiert a laangwiereg Prozedure verschleëft gëtt.

» **M. Fernand Boden, Ministre des Classes moyennes, du Tourisme et du Logement.** - Déi 4.692 Unitéiten, dat sinn ausgestallte Baugenehmegungen.

» **M. Ben Fayot (LSAP).** - Baugenehmegungen; mä ech mengen, et sinn der och nach am Tube, déi nach kënnten hëllefen d'Situatioun verbessern.

Mäin Opruff also un d'Regierung, esou schnell wéi méiglech de Projet iwwert de Pacte logement an d'Maîtrise du foncier virzeleeën, dee schonns beim État de la Nation - iwwregens - an och bei der Tripartite annoncéiert gi war.

» **M. Fernand Boden, Ministre des Classes moyennes, du Tourisme et du Logement.** - Kann ech eppes dozou soen, wann ech gelift?

» **M. Ben Fayot (LSAP).** - Jo, selbstverständlech.

» **M. Fernand Boden, Ministre des Classes moyennes, du Tourisme et du Logement.** - De 15. Mee hu mer dat ugekënnegt. Du sinn ech an d'Chamberskommissioun gaangen, do hu mer gesot: Elo gëtt e Projet de loi gemaach, do kommen all déi Moossnamen, déi Der elo opgezielt hutt, dran. Dat dauert sechs, siwe Méint, an um Enn vum Joer, da gëtt de Projet déposéiert.

Da verstinn ech am Fong net, wat all puer Woche gemaach gëtt, datt gesot gëtt, et wier e Skandal, datt dee Projet nach net do ass. Vun Ufank u war gesot ginn: Dee brauch siwe Méint, dee këntt den Enn dës Mounts. Ech wëll dat just nach eng kéier soen.

» **Plusieurs voix.** - Très bien!

» **M. Ben Fayot (LSAP).** - Also, wann e Projet këntt, Här President, wäre mer natierlech frou, wann en och ëmfaassend all déi Mesurë géif begräifen, vun deene mer geschwat hunn, och am Regierungsprogramm, a mir wären dann och frou, wa mer schnell kënnten duerch d'Prozedur kommen. Et ass nämlech d'urgence, an dofir verstitt Der dat, Här President.

(M. Jos Scheuer prend la Présidence)

Ech wëll dem Här Minister soen, dass bei de Leit dobausse wierklech eng grouss Frustratioun ass iwwert déi Entwécklung um

Wunnengsmaart. An d'Regierung ass geuerdert, fir eppes ze maachen. Ech mengen, den Här Minister weess dat. Dofir insistéiere mir drop, dass dat esou schnell wéi méiglech geschitt.

» **Plusieurs voix.** - Très bien!

» **M. Ben Fayot (LSAP).** - Här President, d'Schoul ass fir d'LSAP eng absolut Prioritéit. D'Schoulpolitik ass mat groussen Erausforderunge konfrontéiert. Fir d'Chancëgläichheet...

(Interruption du Président)

...ze erreechen an den Échec scolaire ze bekämpfen, muss d'öffentlech Schoul hir Offer diversifiéieren. Si muss derniewent Hëllefstellung an an ëm d'Schoul bidden. Si muss d'Inhalter an d'Methode moderniséieren, net fir alles ëmzewerfen, mä fir et un d'Besoinë vun haut unzepassen.

Wann zum Beispill grouss Zuele vu Schüler weinst de Sprooche keen Ofschloss kréien, da muss ee sech froen, wat se u Sprooche brauchen, wéi mer dat evaluéieren, a wéi mer déi Sproochenniveauen erreechen, déi si brauchen an déi mir brauchen. Déi Aarbecht ass amgaangen an ass wesentlech fir d'Zukunft vu ville Kanner.

Mir däerfen net vergiessen, dass niewent der öffentlecher Schoul och Privatschoulen Héichkonjunktur hunn - dat ass jo anscheinend en Thema. Ech wëll hei kloerstellen, dass d'LSAP ni an der Privatschoul e Mëttel fir d'Léisung vu Bildungsproblemer zu Lëtzebuerg gesinn huet. Si huet och déi zwee Gesetzer iwwert d'Privatschoule vun 1983 an 2003 net ze veräntwerthen.

Dass Privatschoulen haut Héichkonjunktur hunn, huet vill Ursachen. Eng dovunner ass, dass d'Schülerzuel mat der steigender Bevölkerung an d'Luucht geet. An eng aner ass, dass an der Vergaangenheet net genuch gemaach ginn ass, fir d'öffentlech Schoul...

Här President, ech hoffen, dass ech déi Hären net stéieren, wann ech hei schwätzen.

(Hilarité)

» **M. le Président.** - Lauschtert dem Här Fayot no, wann ech gelift!

» **M. Ben Fayot (LSAP).** - Här President, si mussen net nolauschteren, mä si misste probéieren, déi aner ze respektéieren.

» **M. le Président.** - Besser ass natierlech, wa se nolauschteren.

(Hilarité)

» **Une voix.** - Zumools den Här Di Bartolomeo.

» **M. Ben Fayot (LSAP).** - Eng aner Ursach fir déi Héichkonjunktur vun de Privatschoulen ass, dass an der Vergaangenheet net genuch gemaach ginn ass, fir d'öffentlech Schoul no de Besoinë vun de Kanner ze diversifiéieren. Vill friem Familljen, déi zu Lëtzebuerg wunnen, brauche verschidde Schoulöffere fir hir Kanner, déi se bis elo net an der Lëtzebuurger Schoul fonnt hunn. D'Entwécklung vun der Wirtschaft, d'Presenz vu villen Auslänner a Betriber, Banken, internationalen Institutiounen, oft nëmme fir e puer Joer, verlaangt aner Schoulstrukture wéi déi lëtzebuergesch. Dëst war laang virauszegesinn.

Duerfir war a sinn ech der Meenung, dass d'Lëtzebuurger Schoul sech intern diversifiéiere muss. Et ass gutt, dass d'Regierung endlech op dee Wee geet. A wat d'Erhéijung vun de Kreditter fir d'Privatschoulen ugeet, kann een der Regierung net reprochéieren, Gesetzer ze executéieren, fir déi se net responsabel ass, an et kann een hir och net reprochéieren, nei Weeër ze goen, fir de Problem ze leisen.

D'Regierung huet Enn 2006 eng Partie wichteg Realisatiounen an där Hisiicht ze verzeechnen. Den Neie Lycée fonctionnéiert säit September 2005. Eng Ganzdagsprimärschoul fonctionnéiert säit September 2006. Fir auslännesch Kanner, déi rezent am Land sinn, fonctionnéiere säit September 2006 Studien, déi op de Bac international préparéieren, an d'nächst Joer fänkt de Schengener Lycée un.

D'Sich no Léisunge fir d'Schoulproblemer vun haut ass schwiereg. Dat weess jiddferen. Mä et ass an der Schoul net anescht wéi soss am Liewen: Et geet ni zrëck; et geet ëmmer nëmmen no vir. D'Reformaarbecht vun der Madame Delvaux ass exemplaresch fir ons, andeem se dat unerkennt, wat aus der pedagogescher Aarbecht an de Schoulen un Neierungen erauskënnt, a se zugläich nei Impulser iwwer wichteg Recherche wëllt ginn.

Et ass an deem Zesummenhang ze begréis-sen, dass en Accord mat den Enseignantë vum Secondaire iwwer hir Aarbecht fonnt

konnt ginn. Dat erlaabt méi individuell Be-treuung vun de Schüler, méi Kontakter mat den Elteren a besonnesch méi Zesummen-aarbecht ënnert den Enseignanten. Wann net och d'Enseignanten aus hirer dagdeeg-lecher Praxis eraus d'Noutwendegkeet do-vunner agesinn hätten, dann hätte se déi Ëmgestaltung vun hirer Aarbecht sécher net ugehall.

Et ass hei net d'Plaz, fir op d'Detailer anze-goen. Ech wëll awer fir d'LSAP soen, dass vun där Reformaarbecht villes fir d'Zukunft vun all Kand an der Schoul ofhänkt.

Mir begrüessen duerfir de budgetären Effort fir 2007. Et gëtt der Regierung elo repro-chéiert, Fonctionnementskäschte vun de Lycéeë géifen net esou séier an d'Luucht goe wéi am allgemenge Budget. Et kann een dach awer net der Regierung repro-chéieren, d'Verwaltungskäschten ze duerchforsten, an doraus d'Argument op-bauen, si wär géint d'öffentlech Schoul. De Contraire ass nämlech de Fall!

De Budget vun den Ausgabe vum Er-zéiungsministère geet vun 805 Milliounen am Joer 2006 op 841 Milliounen am Joer 2007 erop, an d'Investissementer am Fong fir d'Schoule klammen op 121 Milliounen am Joer 2007, vu 85 am Joer 2006.

Ech kann also déi Polemik vu verschiddener Säit géint d'Erzéiungsministesch net novoll-zéien. Nach ni war esou en Élan an der Re-formtätegkeet op deem Gebitt. Nach ni war et esou wichtig, dass déi Reforme réus-séieren. Och dat sollten d'Gewerkschaften an aner Verdeedeger vun der öffentlecher Schoul zur Kenntnis huelen.

(Interruption)

Här President, ech huele jo un, dass de Statsminister och d'Zeitungen zu Lëtze-buerg liest, an dofir brauch ech elo hei am Detail net dorobber anzegoen.

Här President, de Budget 2007 ass keen Austeritéitsbudget, mä et ass e Budget, deen op Gläichgewicht hischafft, well Lëtzebuerg sech net an d'Spiral vun der Schuld zéie léisst. Et ass de Budget vun engem staarke Stat, dee sech ëm sozial Kohä-sioun a sozial Gerechtegkeet beméit. Mir hätten dobäi gäre méiglechst vill Selektivitéit, fir déi nei sozial Problemer effikass un-zegoen.

Et ass e Budget, deen dréngend Aufgaben ugeet. An der Schoul, an der Innovatioun, am Kampf géint de Chômage, do soll de Stat schnell an effikass handeln. Et ass e Budget, deen duerch gutt Infrastrukturen an Innovatioun d'Kompetitivitéit vun de Betriber ënnerstëtzt, an et ass e Budget, deen d'Verantwortung vu Lëtzebuerg fir de Klimawan-del esocht hält. Aus all deenen Ursachen, an och, well mir Vertrauen an d'Regierung hunn, dëst Land an dem Reformkurs wei-derzebréngen, si mir fir dëse Budget a wäerten en och stëmmen.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Fayot. Den nächste Riedner ass den Här François Bausch. Här Bausch, Dir hutt d'Wuert.

» **M. François Bausch (DÉI GRÉNG).** - Här President, Dir Dammen an Dir Hären, et ass schonn eng cocasse Situatioun, an där eist Land sech befënnt. Mir hunn 2006 e Wuesstum gehat vum PIB vu 5,5%, a mir wäerte viraussiichtlech 2007 e Wuesstum hu vu 4%, an trotzdeem ass eise Budget an-scheinend am Déséquilibre.

Mir haten 2005 7.000 nei Aarbechtsplaze geschafen. Mir wäerte viraussiichtlech 2006 12.000 neier schafen, an trotzdeem ass de Chômage zënter de Wahlen 2004 vu 4 op 4,2 an op haut 4,5% geklommen.

Et gëtt sécherlech villfältig Ursachen, iw-vert déi ee muss diskutéieren, fir déi Dés-équilibreren do ze erklären.

Beim finanziellen Déséquilibre stellen ech ëmmer erëm fest, oder meng Fraktioun stellt dat ëmmer erëm fest, datt mir do am Mo-ment haaptsächlech iwwert d'Dépensë schwätzen, an datt iwwert d'Recetten am Ufank vun de Budgetsdebatten quasi guer net geschwat ginn ass. A leschter Zäit gëtt awer e bësse méi doriwwer geschwat, an ech hunn d'Impressioun, wa mir nach e bës-sen evoluéieren, wärt och ëmmer méi iw-vert d'Recettë geschwat ginn. Ech mengen, dat ass och richtig esou, well den Déséqui-liber am Budget, dee këntt net nëmmen duerch d'Dépensen, mä dee këntt duerch Problemer bei de Recetten a bei den Dé-pensen.

» **Une voix.** - Très bien!

» **M. François Bausch (DÉI GRÉNG).** - Här President, mir hunn Eckdaten an dësem Budget, déi soen eis, datt d'Recetten ëm 5,6% wäerte klammen an d'Dépensen ëm

3,6%, an trotzdeem wäerte mir e Budgets-defizit vun 991,8 Milliounen Euro hunn.

Och iwwert dee Budgetsdefizit ass scho villes gesot ginn, mä ech mengen awer, datt eng Rei Saachen nach net gesot gi sinn an deem Zesummenhang, ënner anerem och am Zesummenhang mat de Recetten. Ech wëll dann och bei de Recetten ufänken a mech awer natierlech beschränken, sou-wuel bei den direkte wéi bei den indirekten, op déi grouss Steierkategorien, well et ass jo schlussendlech virun allem op déi wou et ukënnt. An et ass virun allem och do, wou eiser Meenung no sech eng Rei Problemer stellen.

Bei den direkte Steieren hu mir am Moment bei der Lounsteuer am Budget 2007 eng viraussiichtlech Recette stoe vun 1.775 Mil-liounen Euro. Bei der Kierperschaftssteuer 1.300 Milliounen Euro, an dann iwwert d'As-siette nach eng kéier 430 Milliounen Euro.

Opfalend ass hei déi ganz speziell Entwéck-lung vun der Kierperschaftssteuer. Vlächit emol nach eng kéier fir déi Zuele réckwier-kend ze kucken: 2002 war d'Kierperschafts-steier bei 1.431 Milliounen; 2003 bei 1.439 Milliounen; 2004 ass se erofgefall op 1.167; 2005 ass se erëm eropgaangen op 1.206; 2006 bei 1.369 Milliounen, a viraussiicht-lech, wéi gesot, 2007: 1.300 Milliounen.

Déi Zuelen hei geheien och lech natierlech net un de Kapp, fir lech duercherneen ze maachen, mä fir ze ënnersträchen, datt mer bei der Kierperschaftssteuer eng Entwéck-lung hunn, déi an där Hisiicht ganz speziell ass, well d'Recetten iwwert d'Kierper-schaftssteuer, eiser Meenung no, net méi dem Niveau vum Wuesstum, dee mer reell hunn, entspreichen, dee misst erakommen.

Dat fënnt een am beschten eraus, wann een d'Joer 2006 vergläicht mam Joer 2003. Mir sinn am Joer 2006 op engem Niveau ukomm vun der Kierperschaftssteuer vum Joer 2003. Dat heescht, mir hunn éischter en Tassement, fir net ze soen eng Tendenz no ënnen, an dat trotzdeem datt mer erëm 2006 e Wirtschaftswuesstum erëmfonnt hu vu 5,5% respektiv d'nächst Joer emol vi-raussiichtlech eent vu 4%. Dat heescht, d'Steierrecetten, déi iwwer Betriber erakom-men, entspreichen a kenger Hisiicht, eiser Meenung no, der Wuelstandsvermehrung, déi awer bei de Betriber stattfënnt.

Do gëtt et eiser Meenung no zwee Effekter, déi dat mat sech bréngen. Deen éischen, dat ass bekannt, mir haten 2002 eng Stei-erreform; an deem zweeten, dat ass deen, dee schonn an de leschte Wochen och vill kom-mentéiert ginn ass, vun engem intelligenten „fiscal engineering“ vun de Betriber, haapt-sächlech vun deene grouss Banker zu Lëtzebuerg.

Ech wëll fir d'éischt awer nach eng kéier zrëckkomme bei d'Steierreform fir d'Betriber vun 2002, well och erëm d'lescht Woch hei am Kontext vum Statsminister senger Ried eng Duerstellung gemaach ginn ass, wéi et zu där Steierreform do komm ass, wat d'Be-weggrënn dozou waren, déi menger Mee-nung no dem Historique net standhält. Mir musse wëssen, datt déi Steierreform vun 2002 - dat heescht, déi Steierreduktiounen vun 2002 vun de Betriber - net 2001 déci-déiert ginn ass, mä schonn Enn Juli 2000.

Dir këntt lech nach vlächit erënneren, deen aarmen deemolege Fraktiounspresident vun der Demokratescher Partei, den Här Rippinger, huet nach an där enger Woch gesot: Dës Regierung wëllt keng Steierre-duktiounen virzéien; an annerhallef Woch duerno sinn d'Eckwäerter vum Budget vir-gestallt gi fir 2001, an do huet de Statsmi-nister ugekënnegt, datt souwuel fir d'phy-sesch Persounen 2001 wéi och fir d'Betriber 2002 massiv Steierreduktiounen géife kom-men.

» **M. Jean-Claude Juncker, Premier Ministre, Ministre d'État, Ministre des Fi-nances.** - Dat war deemools, wéi d'DP d'Steierreform duerchgezunn huet.

» **M. François Bausch (DÉI GRÉNG).** - Dat iwwerloossen ech elo Ärem Jugement.

Wat mech hei interesséiert, datt ass am Fong elo och net, wien deemools d'Steierreform bei der leschter Regierung duerchgesat oder proposéiert huet, mä mech interes-séiert virun allem d'Argumentatiounsschinn, Här President, déi deemools gefouert ginn ass, fir zum Beispill déi Steierreduktiounen bei de Betriber ze argumentéieren.

Mir hu souwuel virdru beim Här Wolter wéi och d'lescht Woch beim Premierminister hei héieren, dat wär eigentlech eng intelligent antizyklesch Moossnam gewiescht, fir eben d'Konjunktur ze stäipen zu engem Moment, wou se géif abriechen. Dat ass eng Ap-proche, déi een - dat ass sécher - eventuell kann deelen. Dat gëtt sécherlech oft ge-maach.

Mä am Juli, August, Här President, Dir Dammen an Dir Hären, am Joer 2000, du ware mer an engem ganz aneren Zeenario. An ech wëll awer vläicht emol nach eng Kéier an Erënnerung ruffen, wat deemools de Finanzminister a Premierminister öffentlech gesot huet, wéi e seng Steuerreduktiounen fir 2002 presentéiert huet. An ech zitéieren do aus dem Artikel vum „Luxemburger Wort“, also eng Zeitung, déi jo, mengen ech, dem Budgets- a Finanzminister net onbedéngt negativ géigeniwwersteet. Do stoung deemools Folgendes geschriwwen, do gëtt den Här Juncker folgendermoossen zitéiert:

„Als Erklärung für die vorverlegten Fiskalentlastungsmaßnahmen nannte der Premier- und Finanzminister den Umstand, dass kein Rückgang des Konjunkturzyklus auch im benachbarten Ausland zu erkennen ist, alle Zeichen vielmehr auf Wachstum stehen, das Steuerbelastungsvolumen genauer eingeschätzt werden kann und der von einem dauerhaften Wirtschaftsaufschwung begleitete definitive Übergang zum Euro bevorsteht.“

Dat heescht, 2000 ass net gesot ginn: Mir maachen hei aus enger antizykluscher Iwwerleeung eraus eng Steuerreduktioun fir d'Betriber, well mer an engem Konjunkturof-schwong sinn, mä et ass gesot ginn: Mir kënnen dat dote maachen, well all Parameter deiten drop hin, dass am Ausland an och zu Lëtzebuerg dee formidabelen Op-schwong - an ech wëll nach eng Kéier drun erënneren: 2000 hate mer e Wirtschaftswuesstum vu bal 9% vum PIB - wahrscheinlech mat grousser Sécherheet kéint weidergoen, an den Euro dat nach géif renforcéieren.

Dat heescht, et muss een dat awer wourechtkeetshalber hei nach eng Kéier rappeléieren, dass dat net d'Resultat war vun enger enormer Wäitsicht deemools bezüglech engem eventuelle Konjunkturabroch, dee géif kommen, firwat dat gemaach ginn ass, mä éischer aus deem Grond eraus, deen den Här Wolter och zum Deel ugeschnidden huet virdrun: Well effektiv am Land, am Joer 2000, den Hunger esou grouss gi war, fir Gelder ze verdeelen, an den Drock op d'Regierung effektiv esou grouss ginn ass, dass am Juli du relativ, ech géif emol e bësse soen, awer an engem Schnellschoss déi Décisionen do geholl gi sinn, an dat net onbedéngt esou wueliwwerluecht war, wéi se nawell heiandso gäre verkaaft ginn.

» **M. Henri Grethen** (*DP*).- Do iert Der lech awer.

» **M. François Bausch** (*DÉI GRÉNG*).- Oh, Här Grethen, ech mengen, dass ech mech do net iren. Ech kéint där Zitatiounen souwisou hei, och vu Verrieder vun Ärer Partei, mä och souguer aus der ziviler Gesellschaft, eng ganz Rei virleeën, wéi déi Zäit applaudéiert ginn ass bei deene Steuerreduktiounen. Do ware rosewéineg Iwwerleeungen, wat d'zukünftig Konjunktur vu Lëtzebuerg ubelaangt, hannendrun, dat kann ech lech soen. Wann ech domadder ufänken - ech hu se zwar all hei leien, wann Der wëllt, kann ech lech se alleguerte virlesen -, mä da musst Der lech laang haut de Mëtteg hei gedëlegen.

(Interruption)

Wat ech domadder wëll soen, dat ass - Dir wësst jo, mir hunn deemools eng aner Meenung gehat, a mir hunn och net gesot, wéi dat oft hartnäckeg duerno an och nach haut behaapt gëtt, mir hätte keng Steuerreduktiounen gemaach -, dass, wann ee sech do e bësse besser Zäit geholl hätt an effektiv och schonn e bësse méi an d'Zukunft vu Lëtzebuerg gekuckt hätt, ee wahrscheinlech eng ganz Rei méi cibléiert aner Saachen hätt kënne maachen, wahrscheinlech och zum Deel Saachen, déi op eis wäerten zoukommen an deenen nächste Joren. Mä déi kommen dann zousätzlech dorobber. An ech kommen nach dorop ze schwätzen.

Ech stellen natierlech och dann d'Fro vum Finanzement. Dann hätte mer mat Sécherheet eppes Besseres gemaach wéi dat, wat deemools 2000 décidéiert ginn ass. Well, an dat ass eppes, Här President, Dir Dammen an Dir Hären, wat mech besonnesch stéiert, wann iwwert d'Steieren an d'Fuerderunge fir Steuerreduktiounen diskutéiert gëtt: Déi si jo extrem villfältig, an et ass jo och einfach déi opzeustellen. Et ass ganz einfach, d'Steieren erfzesetzen, mä et ass ganz schweier, se erëm eropzesetzen. Dat ass ganz evident. Dat hunn ech iwwregens och deemools hei gesot.

Dir gitt hei eiser Meenung no e Schratt ze wäit, well mer net genuch drop vibereet sinn, well et ass psychologesch gesinn natierlech net ubruecht, scho guer net an enger Situatioun vu konjunkturellem Of-schwong, fir d'Steieren dann erëm eropzesetzen. Mä och duerno, och wann een op engem Niveau ass vu méi enger héijer Kon-

junktur, ass dat net esou evident. Dat beschte Beispill erliewe mer jo iwwregens am Kader vun den Diskussiounen ronderëm d'Tripartite-Moossnamen an dësem Budget.

Déi puer Steiererhéijungen - an effektiv, do muss ech dem Här Meisch Recht ginn, et sinn eng Rei Steiererhéijungen an dësem Budget mat dran -, wann ee scho kuckt, wéi déi de Moment diskutéiert ginn angesichts dem Wuesstum vun iwwer 5%, wéi vill On-verständnis deenen entgéintkënn, da gesäit een eleng wéi schweier dass dat ass.

Elo si mir natierlech an der Situatioun, dass effektiv dee steuerlechen Niveau, dee mer zum Beispill fir d'Betriber geschafen hunn 2002, wou mer op eng Gesamtfiskalbe-laaschtung fir d'Betriber komm si vu ronn 30%, dass mer duerch dat, wat virun allem an Däitschland envisagéiert gëtt, nämlech ab 2008 eng Steuerreform fir d'Betriber ze lancéieren, wou dann an Däitschland d'Situatioun derbäi erauskënn, dass se wëllen ënner 30% Gesamtbelaaschtung fir d'Betriber goen, erëm eng Kéier zolidd wäerten ënner Drock geroden.

An d'Erklärung läit jo op der Hand, firwat. Dee wichtigsten ekonomesche Secteur zu Lëtzebuerg ass d'Finanzplaz. An déi wichtigst Banken op der Finanzplaz sinn déi däitsch Banken. Mir brauchen eis do näischt virzemaachen. Mir kënnen do als Gréng duerchweegs verstoen, dass d'Regierung sech elo scho vill, vill Gedanke muss maachen, wéi se domadder ëmgeet 2008 an 2009.

Mä wéi gesot, mir hätte sollen deemools méi cibléiert virgoen, zum Beispill iwwer verschidden Elementer ronderëm d'Taxe d'abonnement. Mir schafe jo elo en neit Gesetz fir d'Fonds spéciaux, wou mer wëssen, dass d'Taxe d'abonnement en zimlech negativen Impakt op déi Spezialfongen huet, virun allem och wann een déi wëllt promovéieren an der Zukunft. Do kann een iwwert d'Taxe d'abonnement geziilt vill méi Saache maachen, fir de Finanzsecteur da geziilt ze ënnerstëtzen, wéi am Contraire, dass een higee, zum Beispill wéi 2002, andeem ee generell einfach fir all Betriber am Land, déi ënnert d'Gewerbekapitalsteuer falen, fir deenen hiren Taux einfach emol erfzesetzen.

Duerfir wär e Ciblage méi sënnvoll gewiescht. Mä Steuerreduktiounen, dass ass e Manque à gagner, donc ass et eng Ausgab. Dat heescht, ech hunn der elo haut de Mëtteg eleng hei eng ganz Rei héiere soen, wéi se wëllen d'Steiere reduzéieren. Si hunn awer mat kengem Wuert a kengem Saz erwähnt, wéi se dat op där anerer Säit bei den Dépensë wëlle sträiche goen.

An et deet mer leed, Här Meisch, wann Der sot Dir wëllt d'Steiertabellen un d'Inflatioun upassen, okay, dat kann ee maachen, mä da musst Der soe wéi Der deen Ausfall, deen Der doduerch bei de Recettë kritt, bei den Dépensë kompenséiere wëllt. Mä beim beschte Wëllen, ech hunn awer bis elo bei all deenen, déi de Moment duerch d'Land jäizen, fir Steuerreduktiounen ze kréien, net héieren, wou se op där anerer Säit da wëlle kierzge goen; oder - dat ass déi aner Méiglechkeet - wéi se nei Recettë wëlte schafen. Well wann een effektiv e Manque à gagner huet, duerch de Fait, dass een d'Steieren erfosetzt, da muss een entweder d'Dépensen op där enger Säit kierzgen oder et muss een eng nei Steuer schafen oder aner Recettë schafen; ansonste kritt een en zolitte Problem.

Här President, wat eis awer besonnesch als Gréng stéiert, dat ass, wann een entre-temps d'Verhältnis kuckt bei den direkte Steieren, tëschent der Kierperschaftssteuer an de Steiere fir déi Leit, déi géint Loun a Gehalt schaffe ginn. Vläch och do e puer Chifferen: 2000 hunn déi Leit, déi géint Loun a Gehalt geschafft hunn, 1.273 Milliounen Euro Steieren an d'Keess erabruecht; 2001 waren et der 1.311; 2002 ass et erëm e bëssen zrëckgaangen, dat war duerch dee konjunkturellen Abroch: 1.261; an 2003 ass et awer schonn erëm eropgaangen op 1.300, an dunn 2004: 1.452; 2005: 1.612; 2006: 1.649 Milliounen, an am Budget fir 2007 sinn 1.775 Milliounen Euro virgesinn u Steieren, déi déi Leit bezuelen, déi géint Loun a Gehalt schaffen.

Fir dann e Verglach ze maachen: 1.775 Milliounen Euro bezuelen déi Leit u Steieren, déi géint Loun a Gehalt schaffe ginn, an op där anerer Säit d'Kierperschaftssteuer - dass heescht déi wichtig Steuer op de Gewënner vun de Betriber -: 1.300 Milliounen.

Just zur Erënnerung, Här President, Dir Dammen an Dir Hären: Am Joer 1988 war dat Verhältnis nach 1.000 Milliounen géint 1.000 Milliounen. Dat war total équilibréiert. Mir stellen also fest, dass mer entre-temps eng enorm Diskrepanz hei zu Lëtzebuerg bei de Steieren hu fir déi Leit, déi géint Loun a Gehalt schaffe ginn, par rapport zu deene Steieren, déi op dem Kapital erhuewe ginn.

(Interruption)

Dat stëmmt, Här Juncker, do louche se wäit méi héich. Souwisou, op de Spëtzesteiersätz läit se och méi héich. An den 80er Jore louch de Spëtzesteiersaz zu Lëtzebuerg wäit iwwer 50%. Wann een d'Solidaritéitssteuer derbäigerechent huet, louch en eng Zäit bal bei 60%. Dat wësse mer. Mir si jo och scho virdrun e wäite Wee gaangen. Dat muss ee jo och mat aberechnen; bei de Betriber idem. Wann een emol géif zrëckrechnen bis 1990, wat mir zu Lëtzebuerg bei den direkte Steieren no ënne gefuer sinn, haapt-sächlech natierlech fir déi Leit,...

» **M. Jean-Claude Juncker**, *Premier Ministre, Ministre d'État, Ministre des Finances*.- Dir dääft net drun denken.

» **M. François Bausch** (*DÉI GRÉNG*).- Jo.

...fir déi Leit, déi héich Revenuen hunn.

(Interruption)

Dat ass enorm.

Mä, wat ech wëll soen, Här President, hei stellt sech en zolitte Problem vu Steiergerechtegkeet entre-temps. Et stellt sech en zolitte Problem vun Ëmverdeelung vu gesellschaftlechem Räichtum. Fir mech ass Steierpolitik och nach ëmmer en Instrument an enger Gesellschaft, fir fir Verdeelungsgerechtegkeet ze suergen. A wa mer op deem heite Wee esou weiderginn - a mir sinn do natierlech a gudder Gesellschaft an deene 25 respektiv an Zukunft 27 EU-Länner -, da kréie mer e Problem, Här President.

Wann ech da gläichzäiteg esou Saache muss liese wéi d'lescht Woch op der Wirtschaftssäit vum „Wort“, wou eng interessant Statistik opgestallt ginn ass iwwert d'Vermögensbildung an der Europäescher Unioun - et war eng Statistik, déi weltwäit opgestallt ginn ass, wou ënner anerem déi Superräich an de Vereenegte Staten opgezielt gi sinn -, a wou een da muss erschreckend feststellen, dass an der Zwëschenzäit de Wuesstem vun deene Superräichen an Europa - dat heescht d'Zuel vun de Leit, déi superräich ginn an Europa - vill méi séier zouhëlt wéi an de Vereenegte Staten, wann ech dass dann am Verhältnis kucken zu deem, wat ech virdu gesot hunn, da muss ech feststellen, dass mer entre-temps zu Lëtzebuerg an a ganz Europa en zolitte Problem hunn.

Här President, Dir Dammen an Dir Hären, mir maachen eis wierklech Suergen, wa mer et net fäerdeg bréngen, a mir wësse ganz genee - dat soen ech hei ganz däitlech -, mir kënnen als klengt Lëtzeburger Land net eleng deen dote Problem an de Grëff kréien. Dee kënne mer nëmmen um europäeschen Niveau geléist kréien. Mä dat ass eng enorm Erausfuorderung!

Wa mer wëlle verhënneren, dass an deenen nächste Joren Haideren, „Le Pen“en oder Peter Martinsen wëllen Héichkonjunktur feieren, an dass se eis laanscht d'Ouere geschloe ginn, méi wéi et eis léif ass, da muss mer op deem dote Gebitt eppes ënnerehuelen. Da muss mer e gewëssene Rééquilibrage an der ganzer Europäescher Unioun bei de Steiere kréien. Well soss, Dir Dammen an Dir Hären, wäert Der gesinn, da wäert d'Renationaliséierung an de Käpp vun de Leit méi séier goe wéi et eis alleguerte léif ass, an och d'Problemer, déi domadder verbonne sinn.

An natierlech ass een éischten Usaz, deen een do kréie muss, eng gewëssen Harmoniséierung vun de Betribssteieren, sief et bei der Bemessungsgrondlag, mä awer och wahrscheinlech - mä dat ass net fir haut oder muer, mat Sécherheet -, fir gewësse Minimae festzeleeë bei de Betribssteieren, fir dass dee Steierdumping bei de Betribssteieren op europäeschem Niveau endlech en Enn fënn. Mir hunn dorunner näischt ze gewinnen.

Mir sollen ons keng Illusiounen maachen. Wann dat esou weidergeet, da wäerte sämtlech europäesch Länner dobäi nëmmen ze verléieren hunn. Da wäert et zu soziale Spannunge feieren an Europa, déi net eng Verdéiung vun Europa wäerten erbäiféieren, mä éischer eppes ganz, ganz aneschters.

» **M. Jean-Claude Juncker**, *Premier Ministre, Ministre d'État, Ministre des Finances*.- Très bien!

» **M. François Bausch** (*DÉI GRÉNG*).- Här President, ech wollt dann zu den indirekte Steiere kommen. Och do gëtt et nees grouss Kategorien. D'TVA: 1.350 Milliounen, d'Taxe d'abonnement: 550, an Accisen: 940. Et muss een natierlech soen, bei der TVA hu mer eng Situatioun - dat wësse mer alleguerten -, wou mer speziell staark profitéiert hunn duerch dee glécklechen Ëmstand, dass eng Direktiv an Europa ëmgesat ginn ass, déi e Pays d'origine festgeluecht huet beim Akasséiere vun der TVA, an dass

mer iwwert dee Wee eng Rei Déngscht-leeschungsbetriber, wann een et esou wëllt nennen, op Lëtzebuerg kritt hunn, oder zumindest en Deel vun hinnen op Lëtzebuerg kritt hunn; deen Deel, deen dann heihinner transféiert ginn ass, well hei dann d'TVA bezuelt gëtt. Dat ass e glécklechen Zoufall.

Dat sinn natierlech Gelder, déi mer wëllkomm huelen. Mä mir sollen eis awer keng Illusiounen maachen. Vu dass et relativ evident ass, dass de Commerce électronique insgesamt an all senge Formen éischer wäert zouhuele wéi ofhuele wäert et net onendlech esou weidergoen, dass de Chiffre d'affaires do wäert terribel klammen, an all déi aner europäesch Länner eis einfach wäerten nokucke wéi mir hei d'Steieren dovun anzéien. Dat wäert d'Strooss sécherlech net laang halen. Duerfir solle mer natierlech déi Suen do wëllkomm huelen, mä mer solle se eiser Meenung no haut schonn asetzen, fir d'Zukunftssecteuren opzebauen.

Ënner anerem kéint ech mer och virstellen, dass, wann ee schonn iwwert dee glécklechen Ëmstand do en neie Secteur op Lëtzebuerg kritt huet, een och duerch e gewëssene Kader, deen ee schaaft, duerch e gewëssent Liewensëmfeld och fir déi Leit zu Lëtzebuerg, kann dozou bäidroen, dass, souguer wann eng Kéier dee glécklechen Ëmstand do ewechfält - dat heescht, mer déi Nisch do verléieren -, mer da vläch awer déi Betriber kënnen halen doduerch, dass mer e bessere Kader, e gutt Ëmfeld fir déi Leit geschaf hunn oder effektiv déi Recetten do notzen, fir an nei Beräicher ze investéieren.

Mä mir sollen eis op alle Fall haut och bewosst sinn, dass dat doten net e Secteur ass, an dass déi Recetten an déi Plus-valuen, déi mer do kréien - an et sinn der net wéineg gewiescht déi lescht Joren an am Moment -, op alle Fall net dierfen an de Konsum gestach ginn.

Dann, Här President, bei den indirekte Steieren natierlech den Tanktourismus. De Rapporteur beschreift et a sengem Rapport: 866 Milliounen Euro kommen direkt eran iwwert d'Carburanten a 518 Milliounen nach eng Kéier duerch Produits du tabac, déi mat grousser Wahrscheinlechkeet an direkter Relatioun heizou stinn. De Rapporteur mécht sech - an dat begrëssen ech - a sengem Rapport relativ vill Suerge ronderëm déi dote Recette.

(M. Lucien Weiler reprend la Présidence)

Hie beschreift en éischte Problem, deen eis och schonn d'nächst Joer wäert betreffen an eis mat grousser Wahrscheinlechkeet do wäert zu enger Mannerrecette feieren, dass ass d'Aféierung vun deem berühmte Camionneur professionnel, dat heescht, dass professionell Camionë sech an der Belsch an Zukunft ravitailléiere kënnen iwwer e Spezialpräis, esou e Prix professionnel eigentlech.

De Rapporteur mengt, dass dat scho géif mat grousser Wahrscheinlechkeet zu enger Moins-value vun 350 Milliounen Euro bei den Accisen d'nächst Joer feieren. Bon, déi aner Punkte geet hien nëmmen zum Deel un, déi sträift en nëmme just, mä ech mengen, dass déi awer kuerz- a mëttelfristeg dozou féiere wäerten, dass beim Tanktourismus mat Sécherheet nach vill méi grouss Abréch ze erwaarde sinn.

Et gëtt méi Grënn. Et gëtt natierlech een éischte Grond fir eis, dass ass déi ganz Klima- an Energieproblematik. An, Här President, Dir Dammen an Dir Hären, mir kënnen eis natierlech nach ëmmer der Illusioun hingginn, an et huet een eigentlech e bëssen d'Impressioun, dass mer hei zu Lëtzebuerg mengen, dass 2012 de Klimaproblem geléist ass, dass heescht, dass, wann de Kyoto-Prozess ofgeschlossen ass, de Klimaproblem da geléist wär. Neen! Ech soen lech, 2012 geet et érischt un, da geet d'Diskussioun érischt richteg lass an da wäert den Drock érischt richteg entstoen.

Well mir wësse jo all, dass dat, wat mer eis do fixéiert hu bis 2012, emol net am Geréngsten duergeet, fir iwwerhaapt de Klima stabiliséiert ze kréien, geschweig dann d'Rad zrëckzedréinen. Dat heescht, no 2012 wäerten déi Diskussiounsphasen, déi jo schonn amgaangen sinn, en terribelen Drock maachen.

All Expertë soen eis entre-temps, datt mer nach ongeféier 15 Joer Zäit hu weltwäit, fir d'Rudder erëmzegeheien, an datt, wa mer dat net fäerdeg bréngen an deenen nächste 15 Joer, duerno irreversibel Schied entstinn, och irreversibel Schied fir eis Ekonomien. An den engleschen Economist, den Här Stern, huet dat jo wierklech ganz gutt zu Pa-beier bruecht. Hien huet eis och virgere-chent wat fir eng désastréis ekonomesch Konsequenzen an och wat fir eng désas-tréis héich Käscht punkten dat wäert hunn: Honnerte Milliarden Euro ginn der Economie wahrscheinlech verluer oder kascht et se, wa mer an deene 15 Joer - an ech betoune 15 Joer, dat ass keng Éiwegkeet, dat ass net ganz laang - näischt maachen.

Et ass och duerfir net verwonnerlech, Här President, Dir Dammen an Dir Hären, datt ganz rezent Émfroen, zum Beispill eng, déi elo an Däitschland gemaach ginn ass, er-ginn, datt d'Klimaproblematik als eng vun deene gréisste Bedrohunge vun der Bevöl-kerung émfonnt gëtt.

Mir müssen och do oppassen, do erwaar-den d'Mënsche vun eis, datt mer conse-quent handelen, datt d'Politik net de Kapp an de Sand stécht. Well, wa mer d'Leit an hi-rer Angscht loossen a se dobäi loossen, datt se de Konsequenzen ausgeliiwert sinn an hinne müssen nokucken, da soen ech lech, da wäert och do gesellschaftleche Sprengstoff draleien, an allen Hisiichten, am soziale Beräich esou gutt wéi och an anere Beräicher. Dat wäert et a sech hunn an duerfir menge mer och, datt ee sech haut schonn en Zeenario muss gi wéi een aus där Ofhängegkeet erauskënn.

A virun allem, wat mer haut awer schonn dé-cidéiere müssen, an zwar direkt, dat ass: Wat geschitt mat deem Geld, wat mer am Moment erakréien iwwert deen Tanktouris-mus an och mat grousser Wahrscheinlech-keet nach e puer Joer oder eng Rei Jore wäerten erakréien? An do héieren ech och ëmmer déi abenteuerlechste Saachen. Et gëtt nach ëmmer Leit, déi mengen, datt een déi Sue misst prioritär notzen, fir Sozialaus-gaben ze tätegen, oder déi wäeren haapt-sächlech dowéinst do.

Mir soen op alle Fall, datt ee muss ufänken déi Suen ze notzen, fir d'Rekonversiou vun eiser Economie ze finanzéieren, well, wa mer dat net maachen, haut an déi nächst fénnef, zéng, 15 Joer, da wäert et schwéier ginn iwwer Sozialpolitik ze diskutéieren an zéng, 15 Joer. Duerfir menge mer, datt een déi Diskussioun aus deem Bléckwénkel kucke muss.

Mir sinn duerfir engersäits frou a begréissen also, datt am Kader vun der Tripartite eng Rei Mesuren emol weinstens elo themati-séiert gi sinn an och eng Rei Mesurë getraff gi sinn.

Mir bedauern awer nach ëmmer, datt mer et net fäerdeg bruecht hunn zu Lëtzebuerg méi eng global Diskussioun iwwer eng méi gesamt ökologesch Steuerreform ze defi-néieren. Dat heescht, et misst goen, fir ein-fach emol ze kucken, eise gesamte Steuer-system no ekologesche Kritären an och Zil-setzungen ze definéieren. Wou wëlle mer eng Kéier hikomme mat deem Ganzen? Mir müssen och hei oppassen, well d'Leit do-bausse mussen jo kënnen novollzéien, wat mer mat där Operatioun do maache wëllen. An dat ass de Moment net de Fall, well déi Mesuren, och wa mer se zum Deel begreís-sen, eiser Meinung no awer ze vill hallef-häerzeg sinn a virun allem net konzeptuell genuch ugaange gi sinn.

An, Här President, an deem Kontext kënnst een natierlech och net derlaanscht, fir e puer Wuert ze verléieren iwwert deen ak-tuelle Sträit mat der Kommissioun ronderëm den Allocatiounsplang. Eis stéiert do virun allem d'Aart a Weis vun der Reaktioun vun der Regierung op d'Verwerfe vun der Bréis-seler Kommissioun.

Ech mengen, jiddferen ass besuergt, dass mer och hei an deem Land nach eng Schwéierindustrie oder Schwéierindustrie-secteur, déi mer haut hunn, méiglechste kënne behalen. An et ass keen heibannen, deen einfach elo esou géing soen, lapidar, eis ass dat alles egal, d'Haaptsaach ass, mir ginn elo einfach blann derduerch, fir Kyoto-Allocatiounspläng ze decidéieren, déi esou restriktiv wéi nëmme méiglech sinn, sief et dann och, datt d'Schwéierindus-

trie, déi mer de Moment hunn, d'Baach erof-geet. Där gëtt et keen! An déi, déi dat be-haapten, datt et där géing ginn, déi wëlle just Polemik bedreiwen.

Mä et ass awer e Fakt, Här President, Dir Dammen an Dir Hären, datt an deenen ale 15 EU-Länner, wou natierlech déi méi héich Lounkäschten, déi mer hunn, scho souwi-sou groussen Drock maachen op d'Schwéierindustrie, op déi doten Industrie-secteur, et souwisou ganz schwéier wäert sinn déi an deenen Industriestaten nach ze halen. Et dierf een awer och bei där Debatt do allerdéngs net vergiessen, datt mir schonn eng laang Geschicht hunn am Be-räich vun der Pollutioun, a wa mer duerfir driiwwer schwätzen, ass net ze vergiessen, datt mer e 40 Joer laange Virsprong op vill Länner an aneren Deeler vun der Welt hunn.

An duerfir sollte mer och an deem Kontext net ze vill grousspureg optrieden, well et geet hei bei der Klimaproblematik jo och ëm méi eng gerecht insgesamt global Verdee-lungslogik, déi sech hannendru verstoppt.

Duerfir menge mir och, datt et am Kontext vun där Diskussioun hei awer och wichteg ass, datt Drock bestoe bleift, datt een net mécht wéi wann alles selbstverständlech ass. Well et ass relativ kloer, och am indus-trielle Sektour wäerten déi Industrien, déi mer zu Lëtzebuerg nach hunn, déi besche-ten Iwwerliewenschancen hunn op deenen dee meeschten Drock ass an déi, déi am meeschte capabel si sech ze veränneren. Well mir sollen ons och do näischt virmaa-chen, do wäerten an deenen nächsten zéng, 15 Joer gewaltig Mutatiounen kom-men. An ech kommen och nach eng Kéier op déi interessant Saachen ze schwätzen, déi de Rapporteur a sengem Rapport an deem Zesummenhang beschriwwen huet.

Duerfir, wa mer eisen Allocatiounsplang wëlle verdeedegen, da wäert dat sécher am schlechteste goen, wa mer esou eng Aart kuerzsiichteg Épiciersmentalitéit un den Dag leeën. Domadder wäerte mer kaum Leit iwwerzeegt kréien.

Mä souwisou stellt sech eiser Meinung no iwwert deen dote Konflikt eraus, Här Presi-dent, Dir Dammen an Dir Hären, wa mer iw-ert d'Diversification économique schwät-zen, déi generell Fro wéi eng Industrie, jo, wéi eng wirtschaftlech Diversifizierungspo-litik mer iwwerhaapt realistesch kënnen a sollen ustriewen.

Natierlech, wéi gesot, mussen mer versichen déi Schwéierindustrie ze erhalen, déi mer haut hunn an déi - datt muss een awer och nach eng Kéier dobäisoen - entre-temps nëmmen nach 10% vun eise PIB duer-stellt. Mä ëmmerhi sinn et nach 10%, dat ass net näischt. Mä déi Gréng sinn awer doriwwer eraus scho laang der Meinung, dass et an engem Héichlounland eng Illu-sioun ass, fir ze mengen, et kéint een nach op enger Industrieromantik vun de 70er Jo-ren opbauen, fir méi produktiv Secteuren hei am Land opzebauen. An datt mer nach méi produktiv Secteuren niewent de Finanz- an Déngschtleeschtungssecteure brauchen, där Iwwerzeegung si mir och.

Et huet eis duerfir och erfreet ze liesen, dass de Rapporteur do ganz däitlech eis Vuen deelt, an ech wëll hien zitéieren op Säit 11 vu sengem Rapport, wou hie schreift: „D'ou la nécessité de miser sur des produits et des services à haute valeur ajoutée qui sont seuls en mesure de satisfaire à nos exigences en matière de niveau de vie. (...) Au risque d'offusquer les romantiques de l'in-dustrie traditionnelle, il faut se rendre à l'évi-dence que dans nos parages l'ère de la manufacture touche à sa fin.“

Also, ech mengen, dat sinn däitlech Wier-der och vun Rapporteur. Ech kënnst déi Zita-tioun hei nach weiderféieren, wou e be-schreift wéi hien, och à la lumière vun enger Culture écologique d'une part an enger Si-dérurgie de recyclage d'autre part, de Poids économique vun den Industrien zu Lëtzebuerg an Zukunft gesäit. Mir deelen op alle Fall seng Analys do total a si frou, datt hien déi esou däitlech beschriwwen huet a sengem Rapport.

Här President, duerfir, mir befannen eis an enger Mutatioun, an enger Transitioun zu enger Wirtschafts- an Industriepolitik aus dem 21. Jorhonnert. An, Här President, et sinn net déi, déi där Tatsaach wëllen an d'A kucken, déi an deem Kontext Ideologen oder Dreemer sinn, mä et sinn déi, déi mor-dicus esou wëlle maache wéi wann dës Mu-tatioun opzehale wär, déi domadder all Perspektiven an all Chancen och fir eng Lët-zebuurger Industriepolitik vum 21. Jorhon-nert wäerte verschlofen.

» **Une voix.** - Très bien.

» **M. François Bausch (DÉI GRÉNG).** - An deem Kontext kann een och als Beispill eraushuelen - an de Rapporteur huet et och

zum Deel hei gemaach mat engem gewës-sene Sënn fir Humor -: d'Iwwernahm vun Arcelor duerch Mittal.

Hien huet hei nach eng Kéier drun erënnert, an zu Recht menger Meenung no, wat alles zu Lëtzebuerg an och op dëser Tribün ge-zielt ginn ass, wéi dee Prozess ugaangen ass. Ech ka mech hei u Rieden erënnern op dëser Tribün, an déi koumen och net vun där grénger Fraktioun, bei deenen huet ee geduecht, et wär een um 1. Mee!

An hien huet och dat Beispill vun enger Lët-zebuurger Dageszeitung zitéiert, wat ech net nach eng Kéier widderhuele wëll. Och dat ass eigentlech e Beispill vun där Muta-tioun, an där mer amgaange sinn, a vun en-ger Realitéit mat där mer entre-temps kon-frontéiert sinn, déi een endlech muss zur Kenntnis huelen. An et soll een net esou maache wéi wann déi net géing stattfannen, well een dann op alle Fall Verléierer gëtt, ier et ugeet.

Här President, ech wëll och an deem Kon-text nach e puer Wuert soen zu där Politique de promotion vun der Regierung respektiv zu där nei ze schafender Agence de promo-tion, well déi jo bekanntlech iwwert déi ee-moleg Recette vun dem Arcelor-Mittal-Coups soll finanzéiert ginn, oder zum Deel sollen déi Gelder genotzt ginn, fir déi ze fi-nanzéieren.

Mir als Gréng fannen d'Iddi vun där Agence de promotion eng ganz gutt Iddi. Si stoung och an eise Wahlprogramm. Ech wëll soen, datt mir an eise Wahlprogramm, wéi mir eis d'Diversification économique virge-stallt hunn, eng ganz Rei Saache gefuerdert hunn. Ënner anerem war dat do och eng vun deenen Iddien. Deemools hu mir am Kader vun de Wahlen vu verschiddene Säite gesot kritt - net vu Parteien, mä vun aneren -, mir hätten an eise Wahlprogramm vill Va-ges stoen. Ech stellen da fest, datt eng vun deene vagen Iddien an d'Realisatioun wäert iwwergoen.

Mä et stellt sech awer d'Fro, Här President, Dir Dammen an Dir Hären, wat fir eng Piori-téitesetzung ee mécht mat där Agence de promotion. Mir mengen, datt un éischer Stell natierlech hei misst gekuckt ginn, datt mer dee Sektour, deen entre-temps zu Lët-zebuerg largement d'Nummer eent ass, fes-tegen, well et huet kee Wäert iwwer anerer ze schwätzen, wa mer deen, deen de Mo-ment eist eenzegst Standbeen ass an deen iwwerhaapt mécht, datt mer finanziell an deem Land nach iwwerliewe kënnen, datt mer net emol fir d'éischt no deem kucken.

Dofir läit déi éischt Prioritéit eiser Meinung no bei där Agence de promotion fir d'Feste-gung vum Finanzsecteur, fir ze kucke wéi mer haaptsächlech bei der Fongenindustrie nach diversifiéiere kënnen, wéi mer dee Be-räich stabiliséiere respektiv wéi mer deen ausbaue kënnen. An da menge mir, datt et duerchwees méiglech ass fir iwwert dee Fi-nanzsecteur do a seng Produkter, déi en ubitt, nei innovativ, héich technologesch Secteure kënnen unzezéien.

Ech wëll nëmmen ee Beispill eraushuelen. Dir wësst, datt de Moment ee Sektour welt-wäit boomt, dat ass dee vun den Energieef-fizienz-Techniken, vun den alternativen Energien, déi ganz Palette, déi dozou ge-héiert, déi ëmmer méi breet gëtt. An entre-temps hutt Der sécherlech och scho mat-kritt, datt et Finanzfonge gëtt an deem dote Beräich, an datt déi enorm boomen. Et ass souguer e gewësse Risiko de Moment do, datt do eng nei Bulle entsteet mat alle Risi-ken, déi dat jo beinhalt.

Mä wa mer dee Finanzsecteur an déi Finan-zéierungsméiglechkeeten hunn, fir esou e Sektour wéi dat doten, deen innovativ ass, op Lëtzebuerg ze kréien, ma da kommt mir notzen dach dee Sektour do, fir iwwert deen och esou produktiv Beräicher op Lëtze-buerg ze kréien. Déi befanne sech éischerter am innovative Mëttelbetriebsberäich wéi a ganz groussen Industriesecteur.

Wann Der de Moment kuckt, wat fir eng Be-tribler och do an deem Sektour weltwäit in-novativ sinn, un der Spëtzt si vun der Inno-vatioun, da sinn dat éischer Mëttelbetriber. Si ginn zwar oft duerno vu Groussen iwwer-holl. Et ass do net anescht wéi och am Sektour vun den Neien Technologien, vun den Internet-Technologien um Enn vum 20. Jorhonnert, wou herno, wéi ëmmer esou schéi gesot ginn ass - et ass eng Zäit gesot ginn -, déi al Industrie, dat wär d'Dinosau-rier-Industrie, an déi si just nach gekuckt ginn als Zukunft. Et hunn déi Zäit och scho vill Ekonomiste gewart: Passt op, d'Dino-saurier oder déi al Industrie wäert schonn herno och do erëm fir gewëssen Uerdnung suergen, an déi wäert dann déi vill Klenger, déi et do gëtt, opfriessen.

An hei ass et e bëssen ähnlech. Dir hutt de Moment ganz vill innovativ Mëttelbetriber an deem Beräich an déi ginn oft duerno vu

groussen iwwerholl. Mä mir, mengen ech, kënnst hei och iwwert d'Finanzplaz eng Strategie opbauen, fir esou Secteuren hei-hinner unzezéien. Duerfir si mer och der Iw-erzeegung, Här President, datt mer eis net solle verzettelen, mä datt mer op eis Stärk-te sollen opbauen a realistesch Zeenarien esou ausbauen.

Duerfir d'Konklusioun, Här President, bei de Recetten:

Éischstens, verschidde Steiere wuessen ei-ser Meenung no net esou wéi se wuesse misste bei héijem Wirtschaftswuesstem. D'Ursaachen dovunner, op alle Fall wéi mir se gesinn, hunn ech virdu beschriwwen. Do gëtt et och eng Rei Saachen, haapt-sächlech um europäeschen Niveau, déi ee kann oder muss ënnerrhuelen.

Zweetens, verschidde Recettë wéi Tanktou-rismus oder héich TVA-Einnahmen duerch Commerce électronique kënne ganz séier abriechen. Mir kënnen op alle Fall an Zu-kunft net op déi opbauen.

Drëttens, mir hunn eng staark, eng ze vill staark Ofhängegkeet vum Finanzsecteur. Déi Recettë sinn awer ganz volatil, well se an Tëschenzäit och en vue vun de Produk-ter, déi mer hei op der Finanzplaz hunn, bal total tributaire si vun der Entwécklung vun de Boursen. D'Platze vun der Internetblos an d'Reaktiounen vun der Bourse duerno, am Joer 2001, hunn ons während dräi Joer virun Ae gefouert, wat passéiere kann, wann et do zu engem Abroch kënn.

A véiertens, Här President, mir mengen, datt duerch déi Diskrepanz beim Verhältnis vun den Einnahmen, déi erakommen, déi Leit, déi géint Loun a Gehalt schaffe ginn, par rapport zur Besteuerung vum Kapital, e Phe-nomeen vu Steuerungerechtegkeet sech och hei am Land, genee wéi an aneren EU-Län-ner, drastesch verstärkt huet, wou mer on-bedéngt müssen dergéint ugoen, well et soss zu Lëtzebuerg an och an Europa zu gréissere soziale Spannunge wäert kom-men.

Här President, aus deene Risiken, déi ech natierlech hei beschriwwen hu bei de Re-cetten, ergi sech natierlech scho logescher-weis och eng Rei Konsequenze bei den Dépensen. Et ass ganz kloer fir eis, mir sinn dergéint, obscho mer eng héich Konjunktur hu vun iwwer 5% 2006 an iwwer 4% - wahr-scheinlech, wann alles esou bleibt - 2007, datt mer net erëm d'Verdeelungsmaschinn sollen ulafe loossen, mä datt mer déi Gelder sollen notzen, fir d'Reconversiou vun eiser Economie ze finanzéieren. Dat heescht, datt mer déi Gelder sollen notzen, fir an d'Zu-kunft ze investéieren.

Mir müssen eis bewosst sinn, datt mer effek-tiv eng maximal Notzung vun den öffent-leche Mëttele mussen während deenen nächste Jore bereetstelle, fir déi gewaltig Mutatioun ze finanzéieren, fir an d'Zukunft ze investéieren. Duerfir: Keng grouss Ver-deelungsaktiounen, mä Ofsécherung vun eise heitege Wuelstand, an deem mer eis haut befannen, och fir déi kommend Gene-ratiounen. Dat ass dat, wat eiser Meinung no an deenen nächste Joren usteet.

Duerfir menge mir och, datt déi absolut Piori-téit bei den Dépensé muss bestoen, fir an d'Zukunft ze investéieren, fir déi Strukturde-fiziter, déi mer am Ufank vum 21. Jorhonnert hunn, ze behiwen.

Un éischerter Stell steet natierlech d'Schoul. Här President, et kéint ee laang doriwwer diskutéieren. Mir hu just e puer Saachen er-ausgestrach. Mir wëssen et alleguerten, mir hunn eng Schoul, déi eiser Gesellschaft net méi Rechnung dréit. Mir hunn eng Immigra-tioun hei zu Lëtzebuerg, déi eng aner ass wéi nach viru 40 oder 50 Joer. Déi schaaft eis Problemer am Schoulsystem. Mir hunn entre-temps eng Situatioun, datt bei deene ganz, ganz villen, vill ze villen Échecen an eise Schoulsystem der vill och aus dem Beräich vun der Immigratioun kommen.

Mir hunn och eng Schoul, déi sech net méi genuch ausriicht op d'Wirtschaft an d'Ge-sellschaft. Mir hunn eng Schoul, déi derzou gefouert huet, datt entre-temps zum Beispill op der Finanzplaz dës Joer e puer honnert Plazen net konnte besat ginn, well einfach d'Finanzplaz um Lëtzebuurger Aarbechts-marché a souguer doriwwer eraus an der Groussregioun keng Leit méi fënn. Dat muss ee sech emol virstellen. Dat muss ee sech op der Zong zergoe loossen. Wann een dat vergläicht mat de Problemer, déi Nopeschlänner vun eis hunn, da gëtt et héich Zäit, datt mer bei der Schoul wierk-lech zolidd Reformen ugin: nei Forme vun Enseignement, Opbau vun der Uni Lëtze-buerg, Recherche-Centeren.

D'Schoulpolitik, Här President, Dir Dammen an Dir Hären, ass fir eis ee vun deene wich-tegste Reformchantiere vun deenen nächste 15 Joer. A fir eis ass et och relativ kloer, mir brauchen elo alles anescht wéi

eng Denkpaus an der Schoulpolitik, an der Schoulreform. Mir brauchen au contraire Handelen; an Handele relativ séier, well déi eenzeg wierklech Ressource, déi mer eis opbaue kënnen ass d'Wëssen an d'Wëssengsgesellschaft, soss hu mer keng.

Zweete Punkt, Här President, d'Mobilitéit. E puer Zuele just: 450.000 Awunner an 315.000 Aarbechtsplazen, dovunner iwwer 100.000 Frontalieren haut schonn, Tendenz: massiv steigend. Eigentlech soen déi Zuelen alles aus. An dee gewaltege Mobilitéitsproblem, dee mer haut hunn, wou jorzéngtelaang gemengt ginn ass mir kéinten deen iergendwann eng Kéier an de Grëff kréien, andeems mer méiglechst vill an deier Stroosse bauen, do musse mer haut awer definitiv feststellen, datt en och een eenzege Constat d'échec vun der Politik ass.

Dat erstaunt eis vläicht manner wéi anerer, mä ech wëll net méi an d'Vergaangenheet kucken. Et gëtt héich, héich Zäit, datt mer an der Mobilitéit elo déi Weeër ginn, déi mer goe mussen, well soss riskéiere mer e Problem ze kréien. Well ech behaupten, datt zu Lëtzebuerg de Mobilitéitsfacteur méi wéi an allen anere Länner an der Europäescher Unioun zu engem ganz, ganz haarde Standuertfaktor fir eise Wirtschaftsstanduert ginn ass.

An, Här President, ech hat d'Chance, well ech an enger anerer Responsabilitéit elo an enger Institutioun sëtzen, nämlech der Agglolux - dat ass déi Konvention, déi den Innenministère mat der Stad Lëtzebuerg a mat de Randgemenge vun der Stad huet -, wou mer amgaange sinn eng ganz Rei Zee-narien ze detektéiere fir déi nächst 15 Joer. Ech schwätzen do vun Horizonten, net vun 30 a 40 Joer, mä bis 2020. Mir hunn do déi neiste Strukturdate kierzlech op den Dësch geluecht kritt, an ech kann lech soen, déi sinn net erschreckend, wat d'wirtschaftlech Potenzialitéiten ubelaangt vu Lëtzebuerg, mä déi sinn erschreckend, wann ee gesäit wat op eis zoukënn, wa mer net an deem Beräich e Revirement an der Mobilitéit kréien.

Da wäerte mer eleng um Gebitt vum Zentrum an d'Situatioun kommen, wa mer e Status quo hu par rapport zu haut zum Beispill, datt mer Bewegung mam Auto a Richtung Zentrum - also net nëmme Stad Lëtzebuerg, mä Stad Lëtzebuerg an d'Randgemengen - vun haut also ronn 200.000 op 400.000 Bewegung bis d'Joer 2020 wäerte kréien.

Här President, Dir Dammen an Dir Hären, et ass relativ kloer, wa mer net ëmdenken, dann ass dat net ze bewältegen. An donc sinn dann och déi wirtschaftlech Entwécklungspotenzialer gehemmt, déi mer reell hunn.

A wann ech dat do soe fir den Zentrum, da soen ech lech, dann ass et net wesentlech aneschtens fir déi aner wirtschaftlech Entwécklungspoler, déi mer hunn, sief et am Süde vum Land ronderëm d'Frichen, wa mer do déi nämlechte Feeler maachen oder och an der Nordstad ronderëm Ettelbréck an Dikrech.

Duerfir, dat wäert eis eng déck Staang Geld kaschten. D'nächst Woch wäerte mer bei der Motioun, déi hei an der Chamber zur Diskussioun wäert stoe fir d'Budgetsjoer 2007, wann een eleng déi Lëscht kuckt, déi do opgezielt gëtt, wat alles misst geschéien an deenen nächste Joren eleng am Beräich vum öffentliche Transport, da wäert dat eis eng déck Staang Geld kaschten.

Logement, Här President, de Premier huet selwer gesot, et wär ee vun deene schlëmmste Constaten, deen hien a sene leschte Joren Innenpolitik huet misse maachen, dass et e risegen Échec wär, d'Logementspolitik. Et kann een deem natierlech nëmmen zoustëmmen.

Bon, et kéint een elo laang driwwer diskutéieren iwwer d'Responsabilitéiten an deem Beräich, mä ech muss lech éierlech soen: Ech kucke léiwer no vir wéi nacch laang no hannen. Well de Problem ass esou grave, datt mer hei souwisou all zesummen - all Parteien zesummen; de Stat mat de Gemengen zesummen - eppes mussen ënnerhuelen, well ansonsten mer kee Millimeter wäerte weiderkommen.

Mir menge virun allem, datt dat och muss geschéien an engem gewëssene Respekt vu Landesplanung. Virun allem musse mer ons endlech Moyenné ginn - an do ginn ech dem Här Fayot Recht -, fir d'Spekulatioun ze bekämpfen. Ech hoffen, datt mer da mat deem Gesetz, wat mer elo gläich wäerte kréien, jo dann hoffentlech vum Logementsminister endlech déi Instrumenter wäerten insgesamt an de Grapp kréien, fir dat kënnen ze maachen.

E weidere Punkt, Här President, ass d'Moderniséierung vun eiser Verwaltung.

Mir hunn zu Lëtzebuerg ze lues Prozeduren. Et ass net ëmmer esou wéi behaapt gëtt, datt eis Gesetzter esou schlecht wieren, mä eis Prozedure sinn ze lues. Se sinn ze laang, an dat huet oft ze di mat enger insgesamt schlechter Organisatioun vun eiser Verwaltung. Lëtzebuerg ass ze vill am Hannertreffen, nach ëmmer.

Mir mussen och eis Verwaltung - an do zéien ech inklusiv och d'Parlament, d'Chamber mat an - besser op d'EU-Erausforderunge virbereeden, déi op eis zoukommen.

D'Vitesse an Europa, iwwert deen neie Ban-nemaart, ass méi schnell gi fir eis. Mir musse méi séier kënnen vun der Plaz trëppelen. Mir sinn net méi eleng, wa mer Décisioune mussen huelen, an dat musse mer alles berücksichtegen. Dofir brauch eis Verwaltung eng Moderniséierung.

Dat kascht och eppes. Wann ech soen eLëtzebuerg oder eGovernment, da weess ech genee, datt dat och mat Käschte verbonnen ass. An do hannendrun hänkt sécherlech och d'Weiderbréngung vun der Réforme territoriale, déi eng wierklech Bluttoutwendeg-keet zu Lëtzebuerg ass.

An da leschte Punkt, Här President, bei den Dépense Recherche an Innovatioun.

D'Regierung ass do um gudde Wee, well se Kreditter zur Verfügung stellt, fir d'Recherche massiv eropzesetzen.

Mir vermëssen de Moment nach e bëssen eng kloer Strategie an och wou d'Schweierpunkte solle leien. Mir kréien nach eng Rei Geleeënheeten, och am Kader vun enger Rei vun Interpellatiounen, an deenen nächste Méint doriwwer ze diskutéieren a mir hoffen, datt mer do méi Kloerheet kréien.

Dann awer, Här President, e puer Kapitelen, déi och mat den Dépensen ze dinn hunn, wou mer och gréisser Reforme musse maachen, wou mer an Zukunft Choixë mussen treffen. Dat éischt ass d'Familljepolitik.

Här President, mir sinn der Iwwerzeegung, datt een am 21. Jorhonnert der Familljepolitik muss eng nei Definitiou ginn. Mir mus-sen natierlech an enger Gesellschaft alle Leit de Choix loosse wéi se sech privat organiséiere wëllen, mä mir mussen awer zur Kenntnis huelen, datt d'Aart a Weis haut schonn, wéi d'Leit sech organiséiert hunn, och an hirer Familljepolitik, sech gewaltig verännert huet par rapport zum leschte Jorhonnert a sech ganz rapid wäert weider ver-änneren.

Mir hunn haut schonn eng Gesellschaft, wou e groussen Deel vu béide Partnere beruffstäteg sinn an déi Tendenz - egal wat Verschiddener eis wëllen ziele kommen, - wäert rapid weidergoen.

Mir brauchen haut jo nëmmen ze kucke wéi et an eise Schoulen ausgesäit. Do gëtt et ëmmer manner, fir net ze soe gläich guer keng Ënnerscheeder méi. Au contraire. Et ass souguer esou, datt entre-temps Frae besser aus dem Schoulsystem erauskomme wéi Männer, ëmmer méi an ëmmer méi zahlreich, an duerfir léist sech déi dote Fro gesellschaftlech an deem Sënn selwer.

Mä mir hunn awer ee Problem, well d'Mechanismen an eiser Gesellschaft, eis sozial Strukturen nach ëmmer op d'lescht Jorhonnert ausgeriicht sinn.

Dat féiert dann dozou, Här President, datt mer am Moment zum Beispill, wann ech elo reng bei der Kannerversuergung kucken, finanziell ganz staark Geld verdeelen an och nach onselektiv, an op där anerer Säit ëmmer méi deier a qualitativ héichwäerteg Infrastrukture fir Kannerversuergung och nach ausbauen.

Nëmmen e puer Beispiller, dat ass sécherlech net exhaustiv wat ech hei maachen, mä ech wëll nëmmen e puer grouss Gruppen opzielen. Wann ech am Moment reng kucken, wat u Geldleeschungen bezuelt gëtt bei der Familljepolitik: Mir hu Gebuertsprimen; mir hunn e grousszügege Congé parental; mir hunn en héicht Kannergeld zu Lëtzebuerg; mir hunn en Abatement an der Steiertabell fir Kanner; mir hunn eng vill-schichteg Berücksichtigung vu Kanner bei deene verschiddenste steierlechen Of-schreiwungsméiglechkeeten; mir hunn eng grousszügeg Mammerent agefouert, wou d'Fro sech mat grousser Wahrscheinlech-keet och nach vun der Exportabilitéit wäert stellen an deenen nächste Joren, wat natierlech och erëm de Käschtepunkt wäert an d'Luucht driewen.

Gläichzäiteg, Här President, Dir Dammen an Dir Hären, maache mer ëmmer méi flä-chendeckend qualitativ héichwäerteg Crëchen, wa méiglech och nach - dat ass zu-mindest dat wat déi meescht Leit gären ha-ten - bal gratis fir jiddereen, Maisons relais an esou weider, datt heescht vill an deier Infrastrukture mat och nach héije Folgekäschte fir déi nächst Joren. Mir mussen endlech

do e Bilan zéien. Mir musse Selektivitéit do erabrëngen.

D'Prioritéit, Här President, ass fir eis als Gréng do relativ kloer. Mir sinn der Mee-nung, datt ee manner finanziell Leeschtun-ge soll fir Kannerversuergung ginn a méi héichwäerteg Betreibungsméiglechkeete fir Kanner soll schafen, a wann een op där anerer Säit selbstverständlech déi manner héich a méi selektiv finanziell Leeschtungen erfogesa huet, dann natierlech kann een och higoen an déi héichwäerteg Be-treibungsméiglechkeete fir Kanner zu engem ganz gönschtege Präis fir jiddfereen an der Gesellschaft schafen. Mä béides zesum-men, dat ass net ze finanzéieren, dat ass re-lativ kloer.

Dofir musse mer déi Diskussioun do eng Kéier féieren, en fonction vun deem Zenario.

Déi Diskussioun gëtt awer eiser Meenung no am Moment net genuch oder vill ze vill weénege gefouert. Dat huet dozou gefouert, datt mer eng deier Duebelstrategie de Mo-ment fueren, déi engersäits ëmmer manner Leit zefridde stellt an insgesamt fir d'Allge-mengheet kaum nach ze finanzéieren ass.

Duerfir menge mir, datt um Gebitt vun der Kannerbetreuung en enorme Reformchantier besteet, mat zolitte budgetären Impakter, jee nodeem wéi een et veranstalt bei de Re-cetten a bei den Dépensen.

Dee klassesche Sozialstat, Här President, fir d'éischt eise Rentesystem. De Rapporteur huet jo och vill a sengem Rapport doriwwer geschwat, mä ech mengen ier een iwwer-haapt iwwert de Rentesystem schwätzt, muss een emol fir d'éischt an der Öffent-lechkeet kloerstellen - dat ass ee sech schëlleg, wann een dat mécht - zu wat fir engem Rentesystem ee stoe wëllt.

Et gëtt zwou Méiglechkeeten: Et gëtt d'Um-lageverfahren an et gëtt d'Kapitaldeckungs-verfahren. Fir eis, an dat soen ech duerfir hei ganz däitlech, fir dass iwwerhaapt kee Mëssverständnis bei näischt opkënn: Mir stinn zum Umlageverfahren, well mer der Meenung sinn, datt dat dat eenzegst Verfah-ren ass, dat d'Solidaritéit tëschent de Gene-ratiounen an der Gesellschaft garantéiere kann.

Dat wëllt natierlech net heeschen, datt een net kann an d'Umlageverfahre verschidden Elementer vu Kapitaldeckung erabrëngen. Dat heescht, datt een zum Beispill Reserve ka besser uleeën.

Mä mir sinn awer net der Meenung, datt ee soll op d'Kapitaldeckungsverfahren ganz iw-wergoen, well dat géing mëttel- bis lang-fristeg en Ausenanerbriche vun der Gesell-schaft mat sech bréngen. An ech soen lech: Déi Länner, déi dee Wee gaange sinn, sinn um beschte Wee dat matzemaachen. Wann ee kuckt wat fir eng Diskussiounen ëmmer méi an de Vereenegte Staten zum Beispill entstinn, wou dee Wee do relativ staark for-céiert ginn ass, da kann een dat do scho feststellen.

Mä mir sollen eis awer och keng Illusioune maachen: Och wa mer eis Reserve besser uleeë wéi dat gemaach gëtt, da bewierke mer domat nach keng Wonner.

Mir sollen zwou Saachen do bedenken:

1. E bessert Uleeën hei heescht, datt déi Gelder do iwwer e längeren Zäitraum blo-ckéiert sinn. Dat heescht, wann ech dann ëmmer erëm héieren, datt mer bei de Rente-keesen am Geld géinge schwammen an ee sech do keng Suergen ze maache bräicht an ee gläichzäiteg verlaangt, datt ee soll d'Reserve besser uleeën, ausser et seet ee mer elo hei, ech wëll an héich riskant Beräi-cher d'Gelder uleeë goen, da muss ee wës-sen, dass, wann een do méi Rendement wëllt hu wéi een haut huet, een da laangfris-teg déi Gelder festleeë muss. Da kann een och näischt mat deene Gelder do maachen.
2. E bessert Uleeë vun eise Reserve léist eis net eise fundamentale Rentesystem, an dat geet iwwregens aus där Etüd, déi vu Price-waterhouse gemaach ginn ass, ganz däit-lech ervir. Et ass sécherlech richteg dat ze maachen, mä et léist eis net eise strukturelle Problem, dee mer hunn.

An dat vläicht nach eng Kéier zur Erënne-rung: Ech hunn, wa mer iwwer Renten zu Lëtzebuerg diskutéieren, ëmmer e bëssen d'Impressioun, datt dat alles einfach ver-giess gëtt. Et gëtt gesot, mir hunn héich Re-serven, an dofir ass kee Problem fir déi nächst 30 Joer.

Mir hunn 2001, 2002, 2003 gesinn, dass, wann e konjunkturrellen Abroch kënnst a wann d'Recettë vum Stat net méi esou héich sinn, da gëtt et ganz séier enk. An ech soen lech, de Moment hu mer een Drëttel vun eise Recettë bei de Rente fiscaliséiert. Dat ass eng Dramsituatioun. Vun esou enger Si-tuatioun dreemen aner Länner an Europa, datt d'office een Drëttel vun de Rentekee-sen iwwer Steiere finanzéiert gëtt.

Mä mir mussen ons bewosst sinn, mir kë-nen eis et natierlech nëmme leeschten dat ze maachen, wa mer permanent an engem Héichkonjunkturzeenario sinn. Et dierf op al-le Fall net eng längerfristeg Period anriede wéi 2002, well soss gëtt et do séier enk.

Dat Zweet, Här President, Dir Dammen an Dir Hären, wat oft vergiess gëtt, ass, mir schafen zu Lëtzebuerg an der Moyenne të-schent 6.000 an 10.000, jee nodeem - dëst Joer waren et der souguer 12.000 -, nei Aar-bechtsplazen. Och do musse mer wëssen, wat dat zur Konsequenz huet. Do komme jonk nei Bäitragzueler, déi natierlech relativ séier riseg Zommen an d'Keese spullen, wou mer keng Leeschtungen ze bezuele brauchen, wou Leeschtungen eréischt an 30 oder 40 Joer ufalen.

An dann hu mer nach ee Problem do dobäi, dat ass, datt mer - Gott sei Dank, kann ee jo nëmme soen - eng Liewenserwaardung vun de Leit hunn, déi bestänneg klëmmt. Et war elo kierzlech am „Lëtzebuerger Wort“, men-gen ech, e ganz sympathesch Artikel vun engem Här, deen 100 Joer al ginn ass, dee gesot huet: Wann ech et nach zwee Joer packen, da war ech esou laang an der Pen-sioun wéi ech aktiv geschafft hunn.

Mä ech soen lech, gitt emol eng Kéier d'Ge-schichtsbicher noliesen - eise Rentesystem, dee staamt jo vum Bismarck of - op wat deen déi Zäit opgebaut huet, dat war net op eng Carrière an der Rent vu 40 Joer, mä dee war op ganz aner Saachen opgebaut. Duer-fir musse mer och wëssen, datt dat eis e Problem schaaft. An do muss ee kënnen roueg driwwer diskutéieren, sous condition, wéi gesot, datt ee sech am Ufank dozou be-kannt huet wat een erhalé wëllt, an datt een dat net ofschafe wëllt.

Duerfir, Här President, dräi Punkten. Éisch-tens, d'Reserve besser uleeën. Zweetens, nei Finanzéierungsquelle schafen. Do den-ken ech haaptäschlech un d'ökologesch Steuerreform, déi sécherlech laangfristeg éischter soll no ënnen tendéieren, mä eis awer kuerz- a mëttelfristeg kann eng Recet-te bréngen, déi mer notze kéinten, fir ge-wëssen Transitiounen an eisem System vun haut matzefinanzéieren.

An dann, Här President, ass et relativ kloer, mir hunn zu Lëtzebuerg en Duerchschnëtts-pensiounsalter vu 57 Joer. Et geet sécher-lech net drëms driwwer ze diskutéieren, fir de Pensiounsalter insgesamt abenteuerlech eropzesetzen, mir mussen et awer ronn-bréngen, a wann ech soe Pensiounsalter vu 57 Joer, dann ass et nach laang net esou, datt all déi, déi mat 57 Joer - an dat ass jo nëmmen d'Moyenne, do sinn der éischstens emol vill, déi leie wäit drënner - an d'Pen-sioun ginn, och 40 Joer cotiséiert hunn. Loin de là!

Mir si jo hei an engem Assurancësystem - dat gëtt och heiansdo vergiess -, deen eig-entlech drop opbaut, datt ee 40 Cotisa-tiounsjoren huet. Bon, do kritt ee jee no-deem nach Saachen ugerechent, Joren, mä am Endeffekt ass et sécherlech net esou, datt all déi, déi mat 57 ginn, déi 40 voll Coti-satiounsjoren hunn.

Dat heescht, mir musse mindestens do mët-tel- a laangfristeg op e System kommen, datt mer déi 40 Cotisatiounsjore kréien. Dat ass sécherlech net bannent enger Genera-tioun hinczekréien. Souwisou kann een am Rentesystem, menger Meenung no, net bannent enger Generatioun grouss Verän-nerunge maachen, mä et muss een elo ufänken eng Rei Décisiounen ze huelen, déi laangfristeg hir Wierkung hunn.

Bei de Krankekeesen, Här President, ass 2006 gesot ginn: Mir hu keen Defizit a mir wäerten och wahrscheinlech 2007 kee kréien. Mä och do solle mer eis awer elo net eppes virmaachen. 2006 hu mer keen Defi-zit, well mer 12.000 nei Aarbechtsplaze ge-schaffen hunn, well mer natierlech och do enorm vill méi Cotisatiounen erakritt hunn, net well mer do esou dichteg waren am De-tekéiere vun Aspuerpotenzialer an am Spueren.

A mir wëssen alleguerten, datt mer dräi grouss Käschtefacturen an de Krankekee-sen hunn. Dat eent, dat sinn d'Infrastruktu-ren, deier Infrastrukturen, Spidolsinfrastruk-turen. Do musse mer Iwwerleeungen ustel-len. Mir hunn eng medezinesch Versuer-gung, déi héichwäerteg ass, déi awer nach laang net ëmmer effizient ass.

Ee Beispill, nëmme fir dat erauszehuelen, dat ass dat berühmte Gedréins, datt ee fir eng Krankheet bei 15 Doktere geet. Dat ass nëmmen een Aspekt. Et kéint een der vill opzielen. Och do spillt natierlech déi steigend Alterserwaardung géint de System, well natierlech, wat d'Leit méi al ginn - am Alter huet ee méi Pech krank ze ginn, kann een hei nëmme soen - wat se do natierlech och méi vum System profitéieren.

Duerfir, Här President, do gött et Problemfäll, datt ee se skizzéiert. Et gött och Léisungen. Déi muss ee roueg ugoen. Mä mer müssen se awer ugoen an och diskutéieren.

Da gött et an der Preventioun eng ganz Rei Beräicher, déi wichteg sinn: Ëmwelt, Ernährung, Bewegung, Drogen an esou weider. Eng Rei Saache sinn eiser Meenung no an deene leschte Jore richtiget thematiséiert ginn a mir hoffen, datt d'Regierung weiderfiert op deem Wee. Dat huet en immensen Impakt, net nëmmen op d'Liewensqualität an d'Liewenserwaardung vun de Leit, mä och op eis Krankekeesen. Duerfir musse mer déi weiderverfollegen.

Konklusiounen, Här President, bei de Recetten a bei den Dépensen: Mir hunn e Problem bei den Einnahmen a bei den Ausgaben. Mir hunn e Problem bei der Steiergerechtegkeet. Mir mengen, datt mer, wa mer och iwwer Steierreformen diskutéieren, endlech och déi ekologesch Steierreform musse eescht huelen.

Mir müssen eng gesellschaftspolitesch Zilsetzung kréien, déi an d'Richtung geet, datt mer eis net einfach doutspueren, et geet net doréms, mä datt mer Ëmschichtunge kréien, déi et eis effektiv erlaben, datt mer de Wuelstand, mat deem mer haut liewen, och fir déi nächst Generatioun nach erhale kënnen.

D'Prioritéit läit, wéi gesot, bei den Ausgabe fir Bildung, Fuerschung, Mobilitéit, Logement a Moderniséierung vun der Verwaltung.

Här President, Dir Dammen an Dir Hären, ech kommen zu menger Konklusioun.

De Rapporteur huet, eiser Meenung no, eng Rei Problemfäll opgeworf an Analyse gemaach, déi richtig sinn, déi awer eigentlech och net nei sinn. Déi si scho vun deene verschiddenste Rapporteurten, och vu verschiddenste Politiker vu verschiddenste Parteien an deene leschte Joren opgeworf ginn.

Hien huet awer ganz oft ausgelooos wéi hien déi Froen ugoe wëllt respektiv wat seng Virschléi sinn, fir déi Problemer do ze léisen.

Meng Fraktioun mengt, datt et awer endlech un der Zäit ass, fir net nëmme Problemfäll opzewerfen an ze analyséieren, mä och ze kucke wéi een endlech Reformen an d'Weeër geleet kritt.

Här President, mir sinn awer der Meenung, datt och wann dës Regierung eng Rei positiv Usätz ze verzeechnen huet; iwwregens muss ech lech soen, dat ass net meng Aart a Weis fir ze fonctionnéieren, fir ze mengen, datt et iergendeng Regierung iergendwou gött - dach, an Diktature sécherlech -, also an demokratesche Länner gött, déi einfach alles falsch mécht. Ech halen net vill vun der Schwaarzweißmolerei an ech mengen, datt déi Schwaarzweißmolerei vläicht gutt ass fir einfach banal am politesche Raum ze polariséieren, mä datt déi eis net ganz vill weiderbréngt.

Mä déi gutt Usätz, déi an dëse Reformusätz dra sinn, si wierklech nëmmen hallefhäerzeg.

Dat kënnt och dohier, well dës Regierung an dës Majoritéit ze vill verschidde politesch géigesätzlech Richtungen a sech selwer dran huet, esou gutt an hire Parteie wéi och an der Majoritéit.

Dës Regierung ass eiser Meenung no dividiéiert wéi kaum eng aner virdrun. Dat konnt een an deene leschte Wochen a Méint oft spieren. Sief et bei den Tripartitesaccorden, déi hei am parlamentaresche Raum ëmgesat gi sinn, bei der Schoulpolitik, bei der Logementspolitik. Mä, wéi gesot, déi Divisioun sinn net nëmmen an der Regierung, déi sinn och an deenen eenzelne Parteien. Et rappt jiddferen a géigesätzlech Richtungen an duerfir weess een net esou richtig, wou et mëttel- a laangfristeg soll hiféieren. Duerfir gött sech bei de Reformen eigent-

lech drop beschränkt, fir iwwert dës Legislaturperiod erauszekommen.

Här President, mir mengen awer, datt mer am Moment dréngend eng Majoritéit bräichten, déi net hallefhäerzeg un d'Reformen erugeet, mä déi solidaresch gëeent a mat aller Kraaft un engem kloren Zukunftsprojet vu Lëtzebuerg géif schaffen. Duerfir verstitt Der sécherlech och, datt mer aus deem Grond dësen hallefhäerzegem a widder-spréchleche Budget beim beschte Wëllen net stëmme kënnen.

Ech soen lech Merci.

» **Plusieurs voix.** - Très bien.

» **M. le Président.** - Merci, Här Bausch. D'Wuert huet elo den Här Stats- a Finanzminister Jean-Claude Juncker.

» **M. Jean-Claude Juncker, Premier Ministre, Ministre d'État, Ministre des Finances.** - Här President, Dir Dammen an Dir Hären, ech géif gär d'Wuert no deene véier Fraktiounscheffen elo huelen, well et opgrond vun de Virbereedunge vum europäesche Conseil vun en Donneschdeg an e Freideg esou ass, dass ech vun den Owend sechs Auer un - dat gött mer zéng Minutten - a muer eng Rei vun europäesche Kommissäre muss empfänken, esou dass ech d'Gelleenheet net méi hunn, fir muer am Laf vum Dag hei ze schwätzen; wuerfir ech mech bei deene Riedner wëll entschëllegen, déi als eenzel Riedner hei optrieden an net am Numm vun hire Fraktiounen schwätzen.

Ech géif gäre Merci soe fir déi Debatt, déi mer hei gefouert hunn, well déi Debatt eigentlech - dat muss een heiansdo feststellen, och wann ee mengt Eenzelner hätten et léiwer anescht - dach awer méi Konsensintersektiounen zu Dag gefördert huet wéi schroff Géigesätz an der Bewäertung vun der Politik oder am alternativen Entworf zu enger net fundamental kräfteg kritisierter Regierungspolitik.

Ech war besonnesch frou iwwert dem Kolleeg Claude Meisch seng Ried, deem, wat ech korrekt fannen, sech ouni Nuancé bekannt huet zu der Budgets-, Finanz- a Wirtschaftspolitik vun där Regierung, déi eist Land tëschent 1999 an 2004 regéiert huet. Et mécht weíneg Sënn - an duerfir soll een och eenzel Aussoen ni an deem Sënn interpretéieren, wann ech se maachen - Distanz ze huelen zu deem, wat een zesummen an enger Regierung gemaach huet. Keen ass do mat dem Koalitionspartner ëmmer honnertprozenteg averstan. A seltenste Fall ass ee mat sech selwer ëmmer averstan.

(**Hilarité**)

An et kann een awer e Land nëmme regéieren an eng Regierung och nëmme féieren, wann ee jiddferengem dee Spillraum gött, soulaang wéi en zukunftsmeisseg ze verantworten ass, deen e brauch, fir existéieren ze kënnen a Loft ze kréien. Dat ass eng Regel vun der Demokratie a vum Respekt, déi eenzel politesch Meenungen a Stréimungen eng virun där anerer müssen hunn.

An duerfir fannen ech et generell gutt, dass den Här Meisch hei d'Politik vun där aler Regierung an deene Beräicher, déi ech beschriwwen hunn, nojustifizéiert huet, wat eng utile Prezisioun war, wann ech dat vergläiche mat eenzelne Meenungsäusserunge vun him selwer respektiv vu Spriecher vu senger Partei an einschlägegen Dokumentatiounen, déi een heiansdo kann noliessen.

Ech sinn dankbar dofir an ech soen dat och wäit ewech vun all polemeschem Niewege-danken.

Hien huet gläichzäiteg dättelech gemaach, dass een déi Politik, déi déi lescht Regierung gemaach huet, muss änneren, well d'Zäite geännert hunn, well d'Erausforderungen anerer sinn a well dat, wat vun 1999 bis 2004 richtig war, logescherweis net méi ka richtig sinn am Zäitraum 2004 bis 2009 an duerno.

Well hätt een déi Politik virugefouert, déi ass guddem Grond entstanen ass, dann hätte mer an de Joren 2005 bis 2009 e kumuléierten zousätzleche Budgetsdefizit vun 20% par rapport zum Bruttoinlandsprodukt zsummegedroen. Dann hätte mer eis Stats-schold vu ronderëm 2007 op mindestens 15% an d'Luucht gesat, an esou wéi den Här Meisch mat Bléck op aner politesch Zesummenhäng gesot huet, dass d'Léisung net kënnt an enger Verscholdungspolitik stoen, esou richtig ass et, dass hien d'Konklusioun zitt, dass déi Politik vun där fréierer Regierung - aus guddem Grond entstan - eng aner Tournure muss kréien an dëser Legislaturperiod, déi dorop ausgeriicht ass, fir net an de Verscholdungsstat anzetrieden an net an der Defizitautomatik ënnerzegoen.

Doraus huet sech erginn, dass mer, wéi och schonn an der Ried vum 12. Oktober 2005 ugekënnegt, déi dem Här Meisch seng nogerechte breet Zoustëmmung haut fonnt

huet, eng Rei vu Gespréicher gefouert hu mat de Sozialpartner zu Lëtzebuerg an duerno och hei am Parlament, fir zu engem Richtungswiessel an der Budgetspolitik ze kommen, deen eben doranner besteet, dass een d'Automatisme sech net méi einfach brutalst op zukünftég Generatiounen doduerch exerzéiere léisst, dass se haut Käschten zeidegen, déi muer musse bezuelt ginn.

Doraus huet sech erginn, dass fir d'Joer 2007 opgrond vun deene Propositionen, déi d'Regierung gemaach huet, par rapport zu deem, wat fir d'Joer 2007 entstan wier, wa mer keng Reformschrëtt ageluecht hätten, eng Mannerdépense vu 400 Milliounen Euro entstan ass, wat dättelech iwwer 1% vum Bruttoinlandsprodukt läit. Hätt een déi Reformen net gemaach, wier een net zu deenen Aspuerunge komm, an déi Aspuerunge wieren och wesentlech méi schwéier um politesche Plang ginn, wa se hei am Haus, soufern wéi se bis elo scho votéiert gi sinn, net breet gedeelt gi wieren.

Ech halen hei trotzdeem fest, nodeem ech elo feststelle muss, wat mech net wonnert, mä wat mech awer iergert, dass déi klug Geeschter, déi ëmmer alles scho besser wossten - normalerweis gehéieren ech jo och zu deenen, mä dës Kéier emol ausnahmsweis net -, elo erëm meckeren un de Resultater vun der Tripartite.

Et ass elo modern ginn - an et war jo nach ëmmer modern, modern ze sinn -, fir ze soen, déi Tripartite, déi brauche mir eigentlech net. Dat gräift am politesche Raum ëm sech, dat gräift och bei eenzelne Sozialpartner ëm sech. Jiddferee wäert sech hei am Land nach wonneren, wa mir déi Konsensmaschinn zu Lëtzebuerg eng Kéier ofstellen, wouhinne dass mer da ginn. Et kann ee ronderëm kucken, wou ee lant, wann een op de Sozialkonsens, soufern wéi de Konsens ëmmer och eng Léisung an der Saach duerstellt, vu virera verzichte wëllt. Ech ka virun esou engem Sech-Ofwende vum Lëtzebuerger Modell, well et komplizéiert ass, nëmme warnen.

Jiddferfalls, ouni déi Gespréicher mat de Sozialpartner an ouni dat Verständnis, wat mer och hei am Haus fonnt hu fir eenzel Saachen, déi misste gemaach ginn, wier d'Budgetssituatioun am Joer 2007 dättelech méi schlecht wéi se, wann Der dee Budget hei stëmmt, wouzou ech lech gäre géif wëlen opfuederen, am Joer 2007 wäert sinn.

Den Här Meisch huet zu Recht gesot, dat wären intensiv Aspuerungen, déi am Budget 2007 gemaach ginn, well, zënter dass ech mech ëm d'Statsfinanze bekëmmern - dat ass säit 1985 -, ass nach ni esou eng staark Ofsenkung vun der programmierter öffentlecher Dépense vun engem Joer op dat anert gemaach ginn.

Fréier - Fréier? -...

(**Hilarité**)

..., viru Jore wier dat denkbar gewiescht, well d'wirtschaftlech Situatioun wesentlech méi schlecht war. Haut gött jo allgemeng an der Rosaroutmolerei vun den Zäitbetrulechter gesot, d'wirtschaftlech Situatioun wier gutt, wat och stëmmt, an an esou engem Kontext ass et besonnesch bemierkenswäert, dass op Punkten, wou ee fréier souguer bei ausgeprägte Wirtschaftskrise keen Accord fonnt huet, een dës Kéier en Accord fonnt huet fir deen ee muss dankbar sinn.

Intensiv waren déi Aspuerungen, mä wann ech den Här Meisch richtig verstanen hu gi se him awer nach net duer. An ech wëll soen, mir och net, mä ech weess awer, wat d'Schwieregkeet ass, fir zu weideren Dépensesofsenkungen ze kommen, well mam Här Meisch si mir der Meenung, dass den Ausgabeproblem vum Stat den Haaptproblem vun der öffentlecher Finanzgestaltung ass, an dass deen - an do distinguéiere mir eis e bësse vum Kolleeg Bausch - net esou séier op der Recettésäit läit wéi haaptsächlech op der Ausgabesäit.

Nun huet den Här Meisch aus engem Grond, dee mir schleierhaft ass, Steiererhéijunge kritiséiert. Ech kann esou an där brutalen Form, wéi vun him préformuléiert, Steiererhéijungen net erkennen. Ech gesinn allerdéngs och keng Steierofsenkungen. Ech gesinn och keng richtiget Steierneutralitéit. Mä ech gesinn op engem Punkt, nämlech an der Netindexéierung vum Steiertarif un d'Inflatioun, d'Fortsetzung vun der Politik vun där leschter Regierung, déi awer och d'Approbatioun fonnt huet vun de Sozialpartner an der Tripartite.

Et ass nozeliesen, dass d'Sozialpartner an d'Gewerkschaften, déi jo elo eng no där anerer eng Upassung vun der Steiertabell un d'Inflatioun froen, gesot hunn, am Prinzip wiere si domadder d'accord, dass bis un d'Enn vun dëser Legislaturperiod, dat steet am Avis vum Comité de coordination, keng Upassung un d'Inflatioun géif kommen.

Gradesou wéi d'Patronen an d'Gewerkschaften och averstane waren - Här Bausch, Dir hutt dat gelies am Avis vum Comité de coordination tripartite -, dass d'Tripartite Akt hält, an ech denken d'Chamber och, dat hu mir heibanne schonn oft erkläert, vun der Absicht vun der Regierung, sech konstruktiv un enger Harmoniséierung vun der Bemessungsgrondlag fir d'Betriebssteuer an der Europäescher Unioun ze bedeelegen, well mer wéi Dir der Meenung sinn, dass deen éiwege Steierdumping, dee mir an der Europäescher Unioun erliewen, sech zum Nodeel vun den öffentlechen Haushalter an domat och zum Nodeel vun deene méi Schwaachen an der Gesellschaft wäert auswirken. Insofern sti mer an där Affär am Wuert.

Wann ech gesot hu bei menger Interventioun, am Accord mat der Regierung, dass mer eis iwwerleeë wéi een d'Betriebssteuerlandschaft an d'Steierlandschaft vun de Privatpersounen - heiansdo regruppéiert dat sech jo och nach am mëttelstännegen Beräich - an de Joren 2008 an duerno ajustéiere wëllt, dann ass dat, well mer müssen zur Kenntnis huelen, dass opgrond vun eiser Fassong, fir Steierpolitik ze begräifen, wat duerchaus eng „schlächend Steiererhéijung“ ass, wat mer zënter 2002 hei virhuelen, dass een iergendwann, och fir Drock vun der Lounfront ewechzehuelen, erëm muss zu enger Ofsenkung kommen.

Ech hunn dat - an ech hätt gären, dass dat gutt an Erënnerung bleift - verbonne mat engem Hiwäis op déi budgetär Enkpäss, déi mer hunn an déi mer natierlech musse mat a Betruecht zéien.

Den Här Meisch huet iwwregens dankenswäerterweis mech do integral zitéiert, well hien deen Hiwäis op dat budgetäert Lach, wat een net dærf aus den Ae verléieren, wann een iwwer Steierpolitik schwätzt, mat a seng Zitatesammlung, déi mir beduecht war, opgehol huet.

Duerfir ass dat, wat den Här Meisch hei iwwert d'Regierungspolitik generell gesot huet an iwwert d'Steierpolitik in specie gesot huet, eng korrekt Reflexioun an e korrekte Reflet vun der Regierungspolitik gewiescht.

Wäert Dir net Chef vun der Demokratescher Partei, Här Meisch, ech géif lech direkt als Regierungsspriecher engagéieren, well ech hunn d'Regierungspolitik selten an hirer Kohärenz a Konsequenz esou propper exposéiert gesi wéi Dir dat während engem laangen Deel...

(**Interruptions**)

...vun Ärer Ried hei gemaach hutt.

(**Hilarité**)

Just dass - an dofir ass vläicht awer Äre Profil net de richtege fir deen Job, deen ech ee Moment an engem autobiographeschen Exkurs, deen op Schwächt hindeit hei, opblëtze gelooss hunn - Der d'Steierpolitik net integral richtiget beschreift, well, wann ech dat an Zesummenhang bréngen och mat deem, wat de Kolleeg Bausch gesot huet, iwwer ekologesch Usätz, déi een an der Steierpolitik brauch an déi mer an der Steierpolitik iwwregens och hunn zënter 1991, wann och net a genügend ausgeprägter Form, wéi hie wahrscheinlech denkt a wéi ech dat net total anescht gesinn, an uknäppt un de Verursaacherprinzip, deen och an der Fiskalpolitik eng Roll muss spillen, da kann een d'Erhéijung vun der Autossteuer a vun den Accisen net prinzipiell kritiséieren.

Wa mer et eescht huele mat dem Schlachtruff, dass mer a Saache Klimaschutz alleguer als Gemeinschaft musse vun der Plaz kommen; wa mer et eescht huele mam Verursaacherprinzip a wa mer eis vergläiche mat deenen Niveauë vu Besteuerung, déi mer ronderëm eis hunn, da kann een déi Augmentatiounen vun der Ursachebe-laschtung am breedeste Sënn vum Ëmweltberäich net als de Géigendeel vun der richteger Politik beschreiwen.

Gradesou wéi een och wësse muss, dass an deene „schlächende Steiererhéijungen“, déi mer duerch d'Netindexéierung un d'Inflatioun vum Steiertarif erziilt hunn, eleng 50 Milliounen Euro dobäi sinn aus dem Steierjoer 2004 fir déi eng aner Koalitioun bei der Festleegung vum Steierniveau zoustänneg war wéi déi Koalitioun, déi elo an der Verantwortung steet.

Och den Här Bausch huet sech jo do laang mat der Steierpolitik beschäftegt, wéi ëmmer op rouegem a sachlechem Toun, mä net all sachlech Beschreiwung ass eng richtiget Beschreiwung.

(**Interruptions et hilarité**)

Ech war e bëssen iwwerrascht beim Här Bausch hei en Auszuch aus enger Ried - aus dem Joer 2000 muss dat wuel gewiescht sinn - vum Stats- a Finanzminister,

Chambre des Députés

Compte rendu officiel

Supplément commun aux quotidiens:
d'Wort, Tageblatt, Lëtzebuenger Journal,
Zeitung vum Lëtzebuenger Vollek

Contenu rédactionnel:
Service du compte rendu de la Chambre des Députés
Service des relations publiques de la Chambre des Députés
Tél. 466 966-1

Conception, saisie de texte et mise en page:
Polygraphic Communication SA, Differdange

Concept et coordination générale:
BRAIN & MORE, agence en communication, Luxembourg

dat war deemools deeselwechten, iwwert d'Steierpolitik ze héieren.

Ech kann net richteg erkennen, wat dorunner falsch gewiescht wier, well hie wëllt u sech soen: Hei geschitt Nodichtung.

» **M. François Bausch** (*DÉI GRÉNG*).- D'Beweggrënn! D'Beweggrënn!

» **M. Jean-Claude Juncker**, *Premier Ministre, Ministre d'État, Ministre des Finances*.- Jo, jo, hei geschitt Nodichtung!

Kuckt emol d'Joer 2000. Liest d'Prévision économique vun der OECD no, liest se no vum Fonds monétaire international, liest se no vum Statec, liest se no vun der Europäescher Kommissioun. Déi hunn erkenne geden - dat ass de Misère mat de Konsensprognosen, do stécht jo een deen aneren un -, wéi wa mer an engem Rhythmus vu relativ héijem Wirtschaftswuesstem kënnnten heiheem an an der Eurozon virufueren.

Den immédiaten Haushaltsrisiko fir d'Joer 2001 an 2002 duerch d'Steierofsenkung war also opgrond vun der Konsensprognos net ginn, an duerfir och verantwortbar an deem Mooss wéi se geschitt ass.

Do war d'Tatsaach, dass mer duerno e konjunkturelle Redressement kritt hunn, zu Lëtzebuerg méi spierbar am massiven Ofstuerz vum Wirtschaftswuesstem, wuerfir mer vu ville Leit heibanne kritiséiert gi sinn, déi sech elo iwwerhaapt net méi wonneren, dass d'Statec-Zuelen all dräi Méint änneren, mä déi deemools awer der Regierung e grouse Prozess gemaach hunn, well mer net gesinn hunn, dass de Wirtschaftswuesstem sech géif no ënnen ofsenken.

D'Tatsaach, dass et zu där konjunktureller Verlangsamung komm ass, mécht déi Politik dofir awer nach net falsch, well mir hunn eis jo deemools och gemeinsam mat de Sozialpartner a mat aneren driwwer verstännegt, dass déi Politik, déi mer engagéiert haten, sollt virugefouert ginn, fir dass mer am Joer 2001, wat schonn e schwaacht Joer war, mä awer nach Excédents am klassesche Budget nom Kontabilitéitsgesetz vun 1999 produzéiert huet, déi Ofsenkung kënnnten ouni Gefore fir de Budget maachen a gläichzäiteg domat Impulser an d'Wirtschaft géifen eraginn, fir méiglechst séier aus där Dällt, an déi mer dunn erkennbar gerede waren, erauszekommen.

Duerfir kann ech, souguer am Zäitraum ënnerschiddlecher Begrënnung op d'Gesamtperiod bemieess an op dat, wat an där Period genee geschitt ass, wou déi Ried gehale ginn ass, net erkennen, wat fundamental un där Politik falsch gewiescht wier. An ech hunn dat, wat de Kolleeg Bausch hei virgelies huet, eigentlech och net als eng Remise en cause vun der Justificatioun vun där Politik gesinn, mä éischter als e Bémol un deem beharrlechen Insistéieren op engem Deel vun der Explikatioun: Hie wollt eigentlech soen, d'Explikatioun géif gewannen, wa se méi breet géif gemaach ginn.

» **M. le Président**.- Här Statsminister, erlaabt Dir eng Tëschefro vum Här Bausch?

» **M. Jean-Claude Juncker**, *Premier Ministre, Ministre d'État, Ministre des Finances*.- Selbstverständlech.

» **M. François Bausch** (*DÉI GRÉNG*).- Ech hunn dat nach eng Kéier zitéiert, well dat awer wichteg ass, och an der Explikatioun vun den Aspuerungen, déi mer musse virhuele mat dräi oder véier Joer Verspéidung.

Ech hunn 2001, wéi mer déi Steierreduktiounen hei am Parlament diskutéiert hunn, ëmmer gesot, datt wat ech vermësse géing, dat wär d'Géigefinanzéierung dovunner. Vu datt d'Géigefinanzéierung natierlech, wéi

aus deem Zitat ersiichtlech, an der Hoffnung bestanen huet, datt se an enger weider unhalender héijer Konjunktur an donc héije Plus-valuë géif leien, war dat natierlech aneschtters komm, wéi een et geduecht huet.

An donc ass dat, wat mer haut maache mat e puer Joer Verspéidung, och am Kader vun der Tripartite, menger Meenung no awer och zu engem Deel mindestens d'Resultat vun där net gemaachtener Géigefinanzéierung vun där Steierreform vun 2002.

» **M. Jean-Claude Juncker**, *Premier Ministre, Ministre d'État, Ministre des Finances*.- Doriwwer kann ee laang streiden, mä mir kënnen dat och maachen. Mä ech mengen net, dass et richteg ass déi Moossnamen, déi elo hei am Aspuepak geholl ginn, ze presentéieren als déi noutwendeg Géigefinanzéierung zu där ënnerloossener Géigefinanzéierung, wéi Dir se beschreift, vun der Steierreform vun de Joren 2001 an 2002 vun dësem Jorzéngt. Well richteg ass et, dass deen Deel Steieren, dee mer aus dem Bruttoinlandsprodukt, dat heescht aus dem nationale Räichtum erauszéien, haut nach genee op deemselwechten Niveau läit wéi dat de Fall virun der Steierreform war.

A richteg ass et, dass d'Dépense par conter an hirem Undeel par rapport zum nationale Räichtum sech ëm 5 oder 6% no uewen déplacéiert huet. Dat heescht, mir gi par rapport zu deem, wat mer am Joer verdéngen, méi aus wéi virun der Steierreform, mä mir kréie prozentual nach genee datselwecht era wéi virun der Steierreform, elo no der Steierreform. Insofern hätt d'Géigefinanzéierung vun der Steierreform dora bestanen, dass een déi Augmentatiounen vun de Budgeten, déi ee vun de Joren 2002 bis 2005 gemaach huet, net ënnerholl hätt.

Hätt een dat awer gemaach, nämlech déi Dépenses do gebremst, notament am Investivberäich, dann hätt ee weider Schwächungselementer an eng scho méi schwaach dohierkommend Konjunktur eraginn, wat d'Ursaach war firwat déi lescht Regierung précisément déi Politik do net gemaach huet.

De Problem sinn net d'Recetten.

» **Une voix**.- Net nëmmen.

» **M. Jean-Claude Juncker**, *Premier Ministre, Ministre d'État, Ministre des Finances*.- De Problem si virun allem d'Dépenses, an déi Tatsaach, dass mer haut esou vill aus dem PIB als Recette eraushuele wéi deemools, mä dass mer awer méi als Dépense aus dem PIB verbrauchen, fir eise Budget ze artikuléieren, weist, dass de Problem bei den Dépensë läit an net bei de Recetten.

Ech weess och, dass d'Leit fannen d'Betriber misste méi Steiere bezuelen, an dass ee kee Sträit mat de Leit kritt, wann een d'Betriebssteieren erhéicht. Wann de Finanzminister, deen ech sinn, d'Kierperschaftssteuer an d'Luucht setzt an d'Leit mam Index a mam Kannergeld a Rou léisst, dann hëlt seng Popularitéit zou, an deem Mooss, wéi e just de Géigendeel muss maachen, a seng Popularitéit eben deementspriedend ofhëlt.

Dat ass d'Regel vum Spill an dorunner dærf ee sech net allze vill stéieren, well et gëtt fundamental keng alternativ Konzeptioun zu där Gesamtpolitik do.

Wat mech e bëssen enttäuscht huet, nodeem ech esou vill gelueft hunn um Kolleeg Meisch senger Ried, dat ass, dass ech hei muss dee klassesche Saz vun all Regierungschef soen, nodeem d'Oppositioun geschwat huet, an deen doranner besteet, fir ze soen, hien hätt keng Alternativen héieren.

Ech fannen dat jo ëmmer esou stupid, d'Oppositioun gräift d'Regierung un, dat ass jo nach eenegermoossen normal, a seet déi Politik wier falsch, dat gëtt net ëmmer am Detail bewisen, och net an de graffe Linnen, well den Här Meisch huet jo eigentlech gesot hie wier mat där Politik averstanen, well hie seet, hie wier mat der Ried vum 12. Oktober vum leschte Joer averstane gewiescht, also och mat der Nullronn an der Fonction publique, well et geet jo drëm, fir méi ze spueren, et geet jo net...

(Interruption et hilarité)

Jo, wéi? Dir hutt dach hei eng Ried gehalen, wou Dir gesot hutt, eng Milliard Euro Verscholdung am Zentralbudget wier vill ze vill an et misste weider Effortë gemaach ginn, fir ze spueren. Da kënnt Dir jo décemment net - dat ass lech och net eescht gemengt -...

(Hilarité)

...hei derfir plädéieren, dass mer nach en Deel vun der Dépense no uewen ajustéieren.

» **M. Claude Meisch** (*DP*).- Dat hunn ech jo och net gemengt.

» **M. Jean-Claude Juncker**, *Premier Ministre, Ministre d'État, Ministre des Finances*.- Dat heescht, Dir mengt also, et soll bleiwe wéi et ass?

» **Plusieurs voix**.- Neen, neen.

(Interruptions)

» **M. Jean-Claude Juncker**, *Premier Ministre, Ministre d'État, Ministre des Finances*.- Gelift?

» **M. Claude Meisch** (*DP*).- ..., datt een och der Regierung ka vertrauen, datt, wa se verhandelt mat de Leit, fir sech un een Dësch ze setzen, da gesäit een herno wat fir ee Resultat dobäi erauskënnt.

(Interruptions et hilarité)

» **M. Jean-Claude Juncker**, *Premier Ministre, Ministre d'État, Ministre des Finances*.- Mä Dir sidd awer där Meenung, well Dir jo mat där Ried vum 12. Oktober averstane sidd a well Der sot weider Aspue-

Sommaire des séances publiques

Communications	page 93
Ordre du jour	page 93
Dépôt d'une proposition de loi	page 93
5600 - Projet de loi concernant le budget des recettes et des dépenses de l'État pour l'exercice 2007	
- Rapport de la Commission des Finances et du Budget	pages 93-96
- Exposé de M. Luc Frieden, Ministre du Trésor et du Budget	pages 97-100
- Exposé de M. Jean-Claude Juncker, Premier Ministre, Ministre d'État, Ministre des Finances	pages 100-102
- Discussion générale	pages 118-129
5535 - Projet de loi portant approbation des amendements au Statut de la Conférence de La Haye de droit international privé, arrêtés par la Vingtième session de la Conférence, le 30 juin 2005	page 102
5490 - Projet de loi modifiant	
- la loi modifiée du 26 mai 1988 relative au placement des personnes atteintes de troubles mentaux dans des établissements ou services psychiatriques fermés;	
- la loi modifiée du 31 mai 1999 sur la Police et l'Inspection générale de la Police;	
- la loi communale modifiée du 13 décembre 1988	pages 103-107
5543 - Projet de loi portant interdiction de la vente de boissons alcooliques à des mineurs de seize ans	pages 107-111
5592 - Projet de loi portant approbation de la Convention de l'UNESCO sur la protection et la promotion de la diversité des expressions culturelles, faite à Paris, le 9 décembre 2005	pages 111-112
5586 - Projet de loi portant approbation de l'Accord de coopération concernant un système mondial de navigation par satellite (GNSS) à usage civil entre la Communauté européenne ainsi que ses États membres, et l'Ukraine, signé à Kiev, le 1 ^{er} décembre 2005	pages 112-113
5604 - Projet de loi portant approbation de l'Accord de coopération entre le Gouvernement du Grand-Duché de Luxembourg et le Gouvernement des États-Unis du Mexique dans les domaines de l'éducation, de la culture, de la jeunesse et des sports, signé à Mexico, le 16 février 2006	page 113
5572 - Projet de loi portant:	
1. transposition	
- de la directive 2001/40/CE du Conseil du 28 mai 2001 relative à la reconnaissance mutuelle des décisions d'éloignement des ressortissants de pays tiers;	
- de la directive 2001/51/CE du Conseil du 28 juin 2001 visant à compléter les dispositions de l'article 26 de la convention d'application de l'accord de Schengen du 14 juin 1985;	
- de la directive 2002/90/CE du Conseil du 28 novembre 2002 définissant l'aide à l'entrée, au transit et au séjour irréguliers;	
- de la directive 2004/82/CE du Conseil du 29 avril 2004 concernant l'obligation pour les transporteurs de communiquer les données relatives aux passagers;	
2. modification de la loi modifiée du 28 mars 1972 concernant	
1) l'entrée et le séjour des étrangers;	
2) le contrôle médical des étrangers;	
3) l'emploi de la main-d'oeuvre étrangère	pages 114-117
Communications	page 117
5646 - Proposition de loi portant organisation d'un référendum populaire concernant la réalisation d'une ligne ferroviaire souterraine avec plusieurs arrêts sur le territoire de la ville de Luxembourg (Déclaration de recevabilité)	page 118
Ordre du jour	page 118
Dépôt d'une résolution par M. Charles Goerens	page 118